

Бахайн
Мөргөлийн
Түүвэр



Бахайн Мөргөлийн Түүвэр



БАХАЙН МӨРГӨЛИЙН ТҮҮВЭР



“Кармел” Хэвлэлийн газар

БАХААЙН МӨРӨӨЛИЙН ПҮҮВЭР

Selection of Baha'i Prayers in Mongolian

Англи хэлнээс орчуулав.

© Монголын Бахайчуудын Үндэсний
Оюун Санааны Чуулга, 2004 он
© The National Spiritual Assembly
of the Baha'is of Mongolia, 2004

ISBN: 99929-5-139-7

БАХААЙН МӨРӨӨЛИЙН ПҮҮВЭР

*Бурханы нэрийг дурьдан, Бурханаа магтан
мандуулсан тэр газар, гэр орон, хот суурин,
зүрх сэтгэл, уул хад, орогнох газар, агуй,
хөндий, далай тэнгис, арал, нуга бүхэн
буянаар дэлгэр.*

-Бахаулла

*Бурхан тэнгэр минь, миний хайрлан
биширдэг, миний зүрх сэтгэлийн мөрөөдөл
болсон Бурхан тэнгэр минь ээ.*

-Баб

ШАДАР ЗАРЦУ МҮННӨ,
өөрийнхөө олж авсан Бурханы
шүтэл найргийн Пүүнд ойр дотно
бологсдын нэгэн адил эгшигчүүд,
инхэнд имээтэй аялгуу өөрийн
инь болон хүн бүхний сэтгэлийн
улзуулан хайлгуула. Бурханаас
түүрхвисан шүтэл найргийн хэн
тийнхүү өөрийн эр оронд ганцаар
давтан уншваас Хамгаас хүтэн
Бурханы сахилсан тэнгэрүүд пэр
хүний амнаас гарсан үсгийн
афиун эгшийн дээгүүр тойрон
нис, сайн санаат хүн бүхний
сэтгэл догдлон булмлах болно.
Эхэн үедээ тэрбээр үүний нөлөө
анзаарахгүй байж болох боловч
түүнд болгоосон энэрэл
нигүүлэлтийн буян эрт орой хэзээ
нэгэн цагт оюун сэтгэлд нь
нөлөөлөх болно. Тийнхүү Бурханы
үүдэл нээлтийн нууцас бүх л
хүг гадал, мэргэн ухааны Эх
үүсвэр болсон Пүүний хүсэл
Зоригсоор айлдагдсан болой.

-Бахаулл

Гарчиг

ЗААВАЛ УНШИХ МӨРГӨЛҮҮД

ЗААВАЛ УНШИХ БОГИНО МӨРГӨЛ	11
ЗААВАЛ УНШИХ ДУНД МӨРГӨЛ	12
ЗААВАЛ УНШИХ УРТ МӨРГӨЛ	15

ЕРӨНХИЙ МӨРГӨЛҮҮД

АЯН ЗАМ	27
БУРХАНЫ ҮЙЛ ХЭРГИЙН МУТАРУУД	28
БУРХАНЫГ ТАНИН, ТҮҮНИЙГ	
ХАЙРЛАХУЙН ТӨЛӨӨ МӨРГӨЛ	29
БУРХАНД ИТГЭН НАЙДАХ МӨРГӨЛ	31
ГЭРЭЭСЭНД ҮНЭНЧ	32
ЖИРЭМСЭН ЭХЧҮҮД	34
МАГТААЛ БА ТАЛАРХАЛ	35
НАС НӨГЧИГСДӨД ЗОРИУЛСАН МӨРГӨЛ	40
ОГООРОЛ	43
ОЮУН САНААНЫ ӨСӨЛТ	48
ОЮУН САНААНЫ ЧУУЛГА	56
ӨВЧНӨӨС АНАГААХУЙ	60
ӨРШӨӨЛ	66
ПИОНЕРҮҮДЭД ЗОРИУЛСАН МӨРГӨЛ	72
САНД ХАНДИВ ӨРГӨХҮЙ	74
СОРИЛТ, БЭРХШЭЭЛ	76
СУРГААЛ ТҮГЭЭХҮЙ	82
ТУСЛАМЖ	87
ТӨӨРӨЛДӨГСДӨД ЗОРИУЛСАН УДИРДАМЖ	90
УУЛЗАЛТ ЦУГЛААН	91

ХАМГААЛАЛТ	94
ХУКУКУЛЛА	101
ХҮН ТӨРӨЛХТӨН	103
ХҮҮХЭД ЗАЛУУС	108
ЗАЛУУС	114
ШӨНӨ ҮДЭШ	115
ШӨНӨ ДУНД	116
ЭВ НЭГДЭЛ	117
ЭР НӨХӨР	121
ЭЦЭГ ЭХ	122

ТУСГАЙ МӨРГӨЛҮҮД

АБДУЛ-БАХАГИЙН ЭРГЭЛТИЙН ИЛГЭЭЛТ	127
АХМААДАД ИЛГЭЭСЭН ИЛГЭЭЛТ	130
БАХАУЛЛАГИЙН ЭРГЭЛТИЙН ИЛГЭЭЛТ	134
ГАЛЫН ИЛГЭЭЛТ	139
ГЭРЛЭЛТ	149
ЗАВСРЫН ӨДРҮҮД	152
МАЦАГ	154
НАВРУЗ	157
НАС НӨГЧИГСДӨД ЗОРИУЛСАН МӨРГӨЛ	160
ӨВЧНӨӨС АНАГААХ УРТ МӨРГӨЛ	162
РИЗВАНЫ ИЛГЭЭЛТ	171
АРВАН ЕС ХОНОГИЙН БАЯРЫН ХУАНЛИ	174
АСУУДАЛ ШИЙДЭХИЙН ТӨЛӨӨ	
МӨРГӨЛ УНШИХ НЬ	175
БАХАЙН АРИУН ӨДРҮҮД БА	
ТЭМДЭГЛЭЛТ ӨДРҮҮД	178

IV	Гариг	Талаагийн
III		Алхуурын
II		Нутгийн
I		Төрийн
IV		Төрийн
III		Төрийн
II		Төрийн
I		Төрийн
IV		Төрийн
III		Төрийн
II		Төрийн
I		Төрийн
IV		Төрийн
III		Төрийн
II		Төрийн
I		Төрийн

ЗААВАЛ УНШИХ МӨРГӨЛҮҮД



ЗААВАЛ УНШИХ МӨРГӨЛ

“Заавал унших мөргөлийг зайлшгүй унших шаардлагатай юм. Учир нь ийм мөргөл нь Бурханы зүг нүүр царайгаа хандуулж, Түүнд итгэл бишрэлээ илэрхийлж, даруу хүлцэнгүй чанарыг олоход нь аливаа хүнд тус буян болдог билээ. Ийм мөргөлийн ачаар хүн Бурхантай харилцаж, Түүнд ойртохыг хүсэмжилж, зүрх сэтгэлийнхээ үнэн Хайрттайгаа ярилцаж, оюун санааны байр суурийг олдог болой.”

-Абдул-Баха

“Бахаулла заавал унших гурван мөргөл (богино, дунд, урт) зохиосон бөгөөд тэдгээрийн аль нэгийг өдөр бүр сонгон авч, зааврын дагуу үйлдвэл үүргээ биелүүлнэ.

ЗААВАЛ УНШИХ БОГИНО МӨРГӨЛ

(Үд дундаас нар жаргахын хооронд өдөрт нэг удаа уншина)

Бурхан минь ээ! Та Өөрийгөө таниулан шүтүүлэхийн тулд намайг бүтээсэн гэдгийг би гэрчилнэм. Өчүүхэн би хүч мөхөс, үгээгүй ядуу, харин Та Хамгийг чадагч, хамгаас баян билээ.

Танаас өөр Бурхан байхгүй. Та бол Зовлон зүдгүүрт нэрвэгдэгсдийн аврал, эгнэгт Дангаар оршигч нь билээ.

-Бахаулла

ЗААВАЛ УНШИХ ДУНД МӨРГӨЛ

(өдөр бүр өглөө, өдөр, орой уншина)

Энэ мөргөлийг уншихыг хүссэн хэн боловч гараа угааж, угааж байхдаа ийнхүү хэлэг:

Бурхан минь, миний гаранд хүч тэнхээ оруулж хайрлаач. Чингэвээс гар минь энэ дэлхийн эздийн удирдлаган дор орохгүй болтол тийм их тууштай сэтгэлээр Таны Номыг барих болно. Гар минь өөрийнхөө бус зүйлст орооцолдохгүй байхын тулд түүнийг минь удирдан чиглүүлнэ үү. Та бол чухамхүү Хамгаас чадалтай, Хамгаас хүчтэй билээ.

Тэгээд нүүрээ угааж байхдаа ийнхүү хэлэг:

Бурхан минь! Би танд нүүрээ хандуулж буй билээ. Өөрийн зүс царайгаараа миний царайг гэрэлтүүлж хайрлана уу. Танаас өөр зүг хандахаас нь түүнийг минь хамгаална уу.

Дараа нь босон Киблич руу /Акка хотын Бахжи гэдэг газар байдаг Хүндэтгэлийн зүг/ харан ийнхүү хэлэг:

Түүнээс өөр Бурхан байхгүй гэдгийг Бурхан тэнгэр гэрчилнэм. Үүдэл нээлт ба бүтээлт орчлонгийн аймаг ханлигууд бүгд

Түүнийх билээ. Синай уулан дээр айлдвараа хэлж, Эрхэм дээдийн тэнгэрийн хаяаг гийгүүлсэн, ертөнцийн дээд хязгаар болсон тэрхүү Ариун модны дэлхий болон диваажинд буй хамаг амьтанд хандсан дуудлагыг Тэрээр дамжуулсан билээ. Энэ дуудлага нь гэвэл: “Зэ, Бүхнийг эзэгнэгч залран ирлээ. Хорвоо дэлхий ба хурмастын орон, алдар ба эрхшээл нь бүгд хамаг амьтны Эзэн хаан, дээдийн хийгээд энэ дэлхийн хүндэт Суудалд залрагч Бурханых билээ!”

Дараа нь тэрээр гараа өвдөг дээрээ тавин доошоо тонгойж ийнхүү хэлэг:

Таныг миний магтаал хийгээд надаас өөр хэний ч магтаал өргөмжилж үл гүйцэнэ. Таныг би ч, диваажингийн хийгээд энэ газар дэлхийн хэн ч үгээр алдаршуулж барахгүй!

Дараа нь гарын алгаа нүүр рүүгээ дээш харуулан дэлгэн зогсож ийнхүү хэлэг:

Бурхан тэнгэр минь, гараа сунган өршөөл гуйж, хайр ивээлд Тань хорогдон залбирсан хэний ч урмыг битгий хугалаач, Хамгаас өршөөлт, Нэн ивээн итгэгч минь!

Дараа нь суугаад ийнхүү хэлэг:

Таныг түгээмэл нэг болохыг, Таныг Бурхан гэдгийг, Танаас өөр Бурхан байхгүйг

би гэрчилнэ. Та өөрийнхөө үйл хэргийн учрыг нээн илрүүлж, гэрээслэлээ хэрэгжүүлж, диваажин хийгээд энэ дэлхийн хамаг амьтны өмнө хайр ивээлийнхээ хаалгыг дэлгэн нээсэн билээ. Хайр ивээл Тань орох итгэлээр энэ дэлхийн өөрчлөлтөнд үл автан өгч чадах бүхнээ Танд зориулагчдад адис, энхжин, баяр баясгалан ба алдар хайрла. Та үнэнхүү Хэзээд өршөөгч, Бүхнийг ивээн тэтгэгч билээ.

-Бахаулла

(Хэрэв хэн боловч энэ урт мөрүүдийн оронд: "Зовсон цагт аврагч, Хамгаас хүчтэй Түүнээс өөр Бурхан үгүй болохыг Бурхан гэрчилнэ" гэж уншихыг хүсвэл энэ нь хангалттай болно. Үүний нэгэн адил суугаад "Таныг нийтлэг нэг болохыг, Таныг Бурхан гэдгийг, Танаас өөр Бурхан байхгүйг би гэрчилнэ" гэж уншихыг хүсвэл энэ нь мөн хангалттай...)

ЗААВАЛ УНШИХ УРТ МӨРГӨЛ

(Хорин дөрвөн цагт нэг удаа уншина)

Энэ мөргөлийг уншихыг хүссэн хүн Бурхан руу харан зогсоод, зогсож байхдаа Хамгийн ивээлт, Хайрлан өрөвдөгч Эзнээсээ өршөөл хүсэн хүлээх байдлаар эхлээд зүүн гар тийш, дараа нь баруун гар тийш ширтэг. Тэгээд ийнхүү хэлэг:

Бүх алдар нэрсийн эзэн Та, Диваажинг бүтээгч Та! Мөргөлийг минь Төгс үзэсгэлэнгээс тань намайг далдлагч халхавчийг хуулан шатааж, Таны оршихуйн далай руу хөтлөх гэрэл гэгээ болгохыг Хамгаас өргөмжит, Нэн жавхлант таны үл үзэгдэх Мөн чанарын өдрийн цацраг бологчдын нэрийг барин залбиран гуйя.

Дараа нь Бурхан руу харж, гараа залбирангуй өргөн ийнхүү хэлэг:

Ертөнцийн хүслэн болсон Та, үндэстэн түмэнд хайрлуулсан Та! Үйл хөдлөлөөрөө дэлхий ертөнцийг сэргээсэн Танаасаа өөр хэнээс ч хамааралгүй болж, Таныхаа ивээлд хоргодон Таны зүг хандахыг минь Та харж байгаа билээ. Эзэн минь, би бол Таны зарц, Таны зарцын хүү билээ. Таны гэрээс, хүсэл

мөрөөдлийг биелүүлэхэд бэлэн, Таны тааллаас өөр юу ч үл хүсдэгийг минь болгоож хайрла. Зарцдаа юу хүссэнээ зарлиг болгохыг Таны өршөөлийн их далай, Таны энэрлийн өдрийн одноос хичээнгүйлэн гуйя! Магтан бахдаж баршгүй Таны суу хүчээр өчсү! Таны олж нээсэн бүхэн миний зүрх сэтгэлийн их хайр, миний оюун санааны мөрөөдөл билээ. Бурхан минь, Бурхан минь! Миний итгэл найдвар, үйлдлийг бүү хэрэгс. Дэлхий ба диваажинг бүхэлд нь багтаасан Таны хүсэл таалал л хамгаас чухал. Хамгийн дээд алдар нэр, үндэстэн түмэн бүхний Эзэн тэнгэр минь! Би Таны хүссэн бүхнийг хүсч, хайрласан бүхнийг тань хайрлаж яваа билээ.

Дараа нь өвдөг сөгдөн тонгойж, духаараа газар хүрэн ийнхүү хэлэг:

Таны тэнгэрлэг чанар Өөрөөс тань өөр хэний ч ой тойнд үл багтаж танигдахаар агуу билээ.

Дараа нь босоод ийнхүү хэлэг:

Эзэн тэнгэр минь, мөргөлийг минь Өөрийн ноёрхлын бүхий л хугацаанд намайг амьдруулж, Таны аль ч ертөнцөд Таныгаа дурсаж явах мөнхийн усны ундарга мэт болгож хайрлаач.

Дараа нь гараа дахин залбирангуй өргөж ийнхүү хэлэг:

Танаасаа хагацвал зүрх сэтгэл хайлж, Таны хайрын илч дэлхийг бүхэлд нь гал мэт дүрэлзүүлдэг билээ! Таныг үүрд дагагч намайг битгий орхиоч гэж амьтан бүхнийг бишрүүлэгч нэрийг тань барин гуйя, Хамаг амьтны эзэн Та минь! Эзэн минь, Гэгээн Таны саравчин доорх Таны ивээлийн хүрээнд багтаж буй их өргөмжлөлт гэрлүүгээ яаран буй энэ үл таних хүнийг Та үзэж байгаа. Энэ нүгэлтэн Таны өршөөлийн далай, энэ доорд амьтан Таны Алдрын суудал, энэ ядуу амьтан Таны баялгаас хувь хүртэх юмсан гэж эрэлхийлж байгаа билээ. Та юу л хүссэнээ захиран даатгах эрх мэдэлтэй. Та үйлсээрээ магтагдах ёстойг, Таны зарлигийг дагаж биелүүлбэл зохихыг, Таны хүсэл таалал юунаас ч хамааралгүй байна гэдгийг би гэрчилнэ.

Дараа нь гараа дээш өргөөд Агуу их алдрыг гурван удаа давтаг. Тэгээд хоёр гараа өвдөг дээрээ тавин доош тонгойн Бурханы өмнө ийнхүү хэлэг:

Таныг шүтэн бишрэх мөрөөдлөөрөө, Таныгаа дурсан санах, өргөмжлөх хүслээрээ миний сэтгэл бүх мөч, эрхтнээрээ мэдрэн

догдолж байгааг Бурхан тэнгэр минь Та үзэж байгаа. Таны захирамжилсан үг Таны айлдварын орчинд, Таны мэдлэгийн диваажинд нотолгоо болдгийг миний сэтгэлийн энэ мөрөөдөл бас гэрчилнэ. Эзэн тэнгэр минь, би ийм л байдалдаа өөрийнхөө өөдгүй ядууг илтгэн харуулахын зэрэгцээ Таны шан хишиг, Таны баялгийг арвижуулан, өөрийнхөө арчаагүйг илтгэж, Таны хүч чадлыг харуулахыг минь болгоохыг Танаас хичээнгүйлэн хүснэ.

Дараа нь тэрээр босч зогсоод гараа хоёр удаа хүндэтгэл бүхий өргөөд ийнхүү хэлэг:

Хамгаас хүчтэй, Хамгийн энэрэнгүй Танаас өөр Зарлиг буулгагч Бурхан үгүй. Юм бүхний эхлэлээс аваад эцэс төгсгөл хүртэл Танаас өөр Бурхан үгүй. Бурхан тэнгэр минь! Таны өршөөл намайг зоригжуулж, Таны нигүүлсэл надад хүч оруулан, Таны дуудлага намайг сэрээж, Таны хайр ивээл намайг босгон Таны зүг хандууллаа. Ингэхгүй юм бол Танд ойрхон хотын хаалганы өмнө зогсох юмуу Таны хүслийн диваажингийн цацарч буй гэрлийн зүг нүүрээ зоригтой хандуулах би хэн юм бэ? Энэ өөдгүй амьтан Таны ивээлийн үүдийг тогшиж, энэ өчүүхэн амьтан Таны хайр хишгийн гараас мөнх амьдралын рашааныг

хүртэхийг хүсэж байгааг Эзэн тэнгэр минь Та харж байгаа билээ. Бүх цаг үеийн тэнгэрлэг зарлиг тушаал Таных билээ, бүх алдар нэрсийн Эзэн тэнгэр Та минь! Харин Таны хүсэл тааллыг дагаж мөрдөх үүрэг бол минийх билээ, Диваажинг бүтээгч минь!

Дараа нь гараа гурвантаа өргөн ийнхүү хэлэг:

Бурхан тэнгэр ихэс дээдэс бүхнээс дээд! *Дараа нь өвдөг сөгдөн тонгойж, духаараа газар хүрэн ийнхүү хэлэг:*

Танд ойртохуйн диваажинд хүрч, Танд ойр буй тэд нар буюу Таны хаалганд хүртэл үнэнч сэтгэлээрээ тэмүүлсэн тэд нарын зүрх сэтгэлийн шувуудаас ч Та хэтэрхий өндөр билээ. Та бүх шинж чанараараа бүгдээс илүү гэгээн, бүх алдар нэрсээс ч илүү ариун гэдгийг би гэрчилнэ. Хамгаас өргөмжит, Хамгаас гайхамшигтай Танаас өөр Бурхан үгүй.

Дараа нь суугаад ийнхүү хэлэг:

Бурхан танаас өөр Бурхан үгүй гэдгийг ийнхүү тунхаглаж буй Тэрээр Далдын нууц бөгөөд “ахуй” хэмээх үгсийн үсгүүдийг нэгтгэн холбож өгсөн эрдэнийн бэлэг тэмдэг болохыг хамаг амьтад, Диваажингийн хурал, хамгийн дээд

хурмастад оршин амьдрагчид хийгээд тэдгээрээс гадна хамгаас алдарт тэнгэрийн хаяаны алсаас гойд сайхны хэлээр нотолсныг би нотолно. Тэрээр Хамгийн дээдсийн үзгээр нэр нь сийлэгдэж, нэр нь тэнгэр, газрын суудалд залрагч Эзэн Бурханы сударт дурьдагдсан нь мөн гэдгийг би гэрчилнэ.

Дараа нь эгц шулуун зогсоод ийнхүү хэлэг:

Амьтан бүхэн, нүдэнд үзэгдэгч ба үл үзэгдэгч бүхний Эзэн та! Та миний санаа алдахыг мэдэрч, миний ёолон уйлахыг, миний зүрх сэтгэл шаналахыг сонсож байгаа билээ. Таны хүч чадлыг барин өчсү! Миний гэм буруу Танд ойртохоос минь холдуулж, миний нүгэл ариун Танаас намайг хол байлгасан. Эзэн минь, Таны хайр халамж намайг баяжуулж, Танаас салж хагацсанаар би сүйрч, Танаас холдсон минь намайг үгүйрүүлнэ. Энэ зэрлэг орчинд гишгэсэн Таны хөлийн мөрт сөгдөн, энэ уудам ертөнцөд Таны сонгосон хүмүүс “Би энд байна, би энд байна” гэж дууддаг тэр үг, Таны Үүдэл нээлтийн амьсгал хийгээд Өөрийн Тунхаглалын үүрийн цолмонгийн эелдэг далавчаараа намайг Таны үзэсгэлэнт гайхамшгийн зүг ширтэн харж, Таны Сударт бичигдсэн бүхнийг дагаж мөрдөх

зарлиг буулгахыг Танаас хичээнгүйлэн хүснэ.

Дараа нь Агуу их Алдарыг гурвантаа давтан гараа өвдөг дээрээ тавьж, доош тонгойн ийнхүү хэлэг:

Бурхан тэнгэр минь, Таныгаа дурсаж, Танд мөргөж явдаг болоход минь тусалж, Таны шинж тэмдгийн Үүрийн цолмон болсон Түүнийг таниулж, Өөрийн эрхшээлийн өмнө намайг сөгдүүлж, Өөрийн өмнө хүлцэнгүй болгож, Өөрийн сүр жавхлант хэлээр айлдсан үгээ надад шүтүүлсэн Таны алдар нэр бадартугай.

Дараа нь босоод ийнхүү хэлэг:

Бурхан минь, Бурхан минь! Миний нуруу хийсэн нүгэлдээ бөгтийж, анхаарал болгоомжгүйгээс бий сүйрэлд орлоо. Өөрийнхөө хийсэн буруу, Таны сайн санааг эргэцүүлэх тусам зүрх сэтгэл минь хайлан уусаж, цус минь судсаараа буцална. Ертөнцийн хүсэл мөрөөдөл болсон Таны гоо үзэсгэлэнг барин өчсү! Таны зүг нүүрээ хандуулж, хүслийн гараа Таны хайр хишгийн диваажингийн зүг сунгахаас би ичих юм. Газар, тэнгэрийн эзэн Та, Таныг дурсан, Таны ариун чанаруудыг өргөмжлөхөд нулимс минь саад болж байгааг

Бурхан минь Та үзэж байна. Аяа, тэнгэр, дэлхийн Суудалд залрагч Эзэн минь, Хайрыг тань хүлээсэн тэдэндээ хишиг ивээлээ хайрлаж, тэднийг Өөрийн гоо жавхлангаас хүртэх гавъяатай болгохыг Хамаг ахуйн Эзэн, нүдэнд үзэгдэх ба үл үзэгдэх бүхний эзэн Таны занлигийн билэг тэмдэг, Таны ноёрхлын нууцын тань нэрийг барин хичээнгүйлэн хүсье!

Дараа нь Агуу их Алдарыг гурвантаа давтаж, өвдөг сөгдөн тонгойж, духаа газар хүргэж ийнхүү хэлэ:

Бурхан тэнгэр минь, биднийг Танд ойртуулсан Түүнийг, Өөрийн Сургаал, Судар номоороо бидэнд сайн сайхан бүхнийг авчирсанд Таныгаа талархан магтъя. Эзэн тэнгэр минь, элдэв үл бүтэх сэтгэмж, дэмий төсөөллөөс биднийг хамгаалахыг гуйя. Та үнэнхүү хүчтэй, Бүхнийг мэдэгч билээ!

Дараа нь толгойгоо өндийлгөн суугаад ийнхүү хэлэ:

Бурхан тэнгэр минь, Таны шилж сонгосон хүмүүсийн урьд нь нотолсныг би нотолж, хамгийн дээд Диваажингийн оршин суугчид хийгээд Таны хүч төгөлдөр Суудлыг тойрон хүрээлэгчдийн хүлээн

зөвшөөрснийг би даган зөвшөөрнө. Хорвоо дэлхий, хурмаст тэнгэрийн бүх ханлиг нь ертөнцийн Эзэн Таных!

-Бахаулла

“Зайлшгүй үйлдэх мөргөлийн үг, үйл хөдлөл бүхэнд хүний ухаан ойлгож хүрэхгүй, бичиг сударт илэрхийлж дийлэхийн аргагүй тийм санаа, далд утга, мэргэн ухаан агуулагдсан байдгийг мэдтүгэй”.

-Абдул-Баха

ЕРӨНХИЙ МӨРГӨЛҮҮД



АЯН ЗАМ

Бурхан минь ээ! Таны өршөөл ивээлээр би өглөө босч, Танд бүрэн итгэж, өөрийгөө Таны мэдэлд тушааж гэрээс гарсан билээ. Танд бодол санаагаа төвлөрүүлэн Таны хамгаалалтан дор гэрээс гарахад минь тусалсан шигээ өршөөлийн тэнгэрээс намайг адислаж, гэртээ элдэв осолгүй харихад минь туслахыг гуйя. Цорын ганц, Хосгүй, Бүхнийг мэдэгч, Бүхнээс мэргэн Танаас өөр Бурхан үгүй.

-Бахаулла

Бурхан минь, Бурхан минь! Би Таныхайрын холбооноос бат зуурч, Таны халамж, хамгаалалтанд өөрийгөө бүрэн даатган гэрээс гарсан билээ. Хайрт шавь нараа Таны замаас холдсон танхай балмад, муу санаат дарлагч этгээдүүдээс хамгаалсан хүч чадлаараа намайг ч гэсэн буян хишгээ хүртээн хамгаалахыг хичээнгүйлэн хүсч байна. Өөрийн хүч чадлын уддисаар намайг гэртээ эргэж очиход минь тусална уу. Та бол үнэнхүү Бүхнээс хүчирхэг, Зовлонд нэрвэгдэгсдийн аврал, Дангаар оршигч билээ.

-Бахаулла

БУРХАНЫ ҮЙЛ ХЭРГИЙН МУТАРУУД

"...Эцгийнхээ Шүтлэгийн аюулгүй байдлыг хамгаалах, түүнийг түгээн дэлгэрүүлэх хос үүрэг бүхий Гэрээсийн Төвийн алдаа мадаггүй Бийрийг хүртсэн, Бахауллагийн Дэлхийн хамтын нийгэмлэгийн Тэргүүн Түшээ нар."

- Шоги Эффенди

Бурханы Үйл хэргийн Мутаруудад гэрэл гэгээ, сүр жавхлан, баяр мэндчилгээ, магтаал сайшаал бүхнээ өргөнөм. Тэдний ачаар зориг хатуужлын гэрэл цухуйн асаж, аливааг сонгон шийдэх эрх мэдэл бол Бүхнээс хүчирхэг, Бүхнээс чадалтай Бурханд байдаг хэмээх үнэн тогтож, буян хишгийн далай давалгаалж, хүн төрөлхтний Эзэн Бурханы адис ивээлийн анхилуун үнэртархсан билээ. Өөрийн сүнснүүдийн хүч чадлаар тэднийг хамгаалж, Өөрийн ноёрхлын увдисаар тэднийг өмгөөлж, хамаг амьтныг номхотгосон Өөрийн ялагдашгүй сүр хүчээр тэдэнд туслахыг бид Түүнээс хичээнгүйлэн хүснэм.

Түүний алдар бадартугай. Хязгааргүй их эрх хэмжээ бол тэнгэр диваажинг Бүтээгч, Алдар нэрсийн Хаант улсыг захирагч Эзэн тэнгэр Бурханых билээ.

- Бахаулла

БУРХАНЫГ ТАНИН, ТҮҮНИЙГ ХАЙРЛАХУЙН ТӨЛӨӨ МӨРГӨЛ

Бурхан минь! Бурхан минь! Энэхүү шадар зарц тань Танд тэмүүлэн дэвшиж, Таны хайрын их цөлд хүсэл эрмэлзэл дүүрэн Таныг зорьж, Танд үйлчлэх буяны замаар замнаж, Таны хишиг ивээлийг хүсэмжлэн найдаж, Таны ханлигт итгэл найдвараа даатган, Таны бэлэг хишгийг дарсанд мансууран явна. Бурхан минь. Таныг хүсэх бадрангуй сэтгэлийг нь, Таныг магтан дуулах тууштай итгэлийг нь, Таныг хайрлах хүчийг нь зузаатгаж хайрлана уу. Үнэнхүү Та бол Хамгаас өгөөмөр, хэмжээлшгүй их гоо жавхлант Эзэн тэнгэр билээ. Танаас өөр Өршөөн хэлтрүүлэгч, Энэрэн хайрлагч Бурхан үгүй.

- Бахаулла

Эзэн тэнгэр минь! Эзэн тэнгэр минь! Энэ бол Таны хайрын галаар асаж, Таны энэрэл нигүүлслийн модноос дүрэлзэн шатах галын дөлөөс бадарсан зул билээ. Эзэн тэнгэр минь, Таны Тодруулагчийн Синайд ассан галаар түүний дөл, халуун илчийг бадраагтун. Үнэнхүү Та бол Айлтгагч, Туслан дэмжигч, Бүхнээс хүчтэн, Өгөөмөр бөгөөд Энэрэгч билээ.

- Бахаулла

БУРХАНД ИТГЭН НАЙДАХ МӨРГӨЛ

Бурхан минь! Таны өдрүүдэд зовлон бэрхшээлийг тэвчээртэйгээ даван туулж буй хүмүүсийг магтан шагнаж, Үнэний замаар гуйвалтгүй замнахад нь тэдний зүрх сэтгэлийг хатуужуулж хайрла. Тэднийг Таны гялбаат Диваажинд нэвтрүүлж чадах буян хишгээ хайрлаач, Эзэн тэнгэр минь.

-Баб

Бурхан минь, Та Өөрийн шадар зарц нартаа зөвхөн сайн сайхан буяныг илгээдэг гэдгийг би мэдэх билээ. Гэсэн хэдий ч хамаг бүхнийг гийгүүлэгч Алдар нэрийг Тань барин Танаас хичээнгүйлэн хүсэх минь, Өөрийн гоо жавхлангийн бэлэг тэмдэг ба Өөрийн хүч чадлын нотолгоо бологчдыг төрүүлж, шадар зарц нартаа тэднээр туслуулж, зовлон бэрхшээлээс нь хамгаалуулж хайрлана уу. Та чухамхүү Өөрийн хүсэл тааллыг гүйцэлдүүлэх чадалтай билээ.

Та бол үнэнхүү Дээд удирдагч, Бүхнээс хүчит, Зовлонд нэрвэгсдийн аврал, Дангаар оршигч билээ.

-Бахаулла

Таныг хайрлаж, Таныг санан дурсаж явахдаа бат тууштай байхад минь туслаач гэж Танаас хичээнгүйлэн гуйя. Энэ бол үнэхээр миний чадал чансаанд багтах бөгөөд Та миний доторх бүхнийг мэдэх билээ. Та бол үнэнхүү бүхнээс эрхэм. Эзэн тэнгэр минь, бүх дэлхий ертөнцөд гэгээн туяагаа цацруулсан гэрэлт царайныхаа сүр жавхаанаас намайг бүү хөндийрүүл. Бүхнээс хүчтэн, Яруу алдарт, Хэзээд өршөөгч Танаас өөр Бурхан үгүй.

-Бахаулла

Энэрэлт Бурхан минь! Таны хайрын гэрлээр толь лугаа адил гэрэлтэн туяарах зүрх сэтгэлийг надад хайрлаж, тэнгэрлэг гоо жавхлангийн ундралаар энэ дэлхийг сарнайн цэцэрлэг болгох бодол санааг надад хүртээнэ үү.

Та бол Энэрэн Хайрлагч, Нигүүлсэнгүй билээ. Та болбоос Агуу их ачтан, Бурхан билээ.

-Бахаулла

ГЭРЭЭСЭНД ҮНЭНЧ

Эзэн тэнгэр минь, Таны замаар замнах бидний алхааг батжуулж, Танд дуулгавартай байх сэтгэл зүрхийг маань хатуужуулж хайрла. Таны нэг нэгдмэл чанарын гайхамшгийн зүг биднийг хандуулан, Тэнгэрлэг Эв нэгдлийнхээ бэлэг тэмдгээр бидний цээжийг баясга. Буян хишгийнхээ өмсгөлөөр бидний биеийг чимэглэж, харцнаас маань нүглийн бүрхэвчийг арилган, амьтан бүхэн Таны сүр жавхланг үзэн Таны магтаалыг дуулахын тулд гоо жавхааныхаа хишгээс хувь хүртээ. Эзэн тэнгэр минь ээ! Үг, үсгээс хавьгүй өндөрт дүүлэх, зөвхөн үе авиаг бувтнах байдлаас халин одох мөргөл уншлагын маань ариун онгод бидний сэтгэлийг эзэмдэж, Таны сүр жавхааны үүдэл нээлтийн өмнө юм бүхэн өчүүхэн хоосон болон хувиртал Өөрийн ивээлт айлдвар ба Өөрийн тэнгэрлэг оршин тогтнолынхоо нууцаар Өөрийгөө илчил. Эзэн тэнгэр минь! Эд нар бол Таны захиас, гэрээслэлд хатуу үнэнч хэвээр үлдэн, Таны Үйл хэрэгт үнэнч байхын холбоонд бат барилдан Таны сүр жавхлангийн өмсгөлийн эмжээрээс бат бөх зуурсан шадар зарц нар юм. Эзэн тэнгэр минь, ивээл хайраараа тэдэнд тусалж, хүч

чадлаараа дэмжин, Танд дуулгавартай тэдний ариун сэтгэлийг бэхжүүл. Та Хамгаас өршөөгч, Хамгаас ивээгч билээ.

-Абдул-Баха

Бурхан эзэн тэнгэр минь, итгэл Бнайдвар минь! Таны хүчирхэг Гэрээст бат итгэлтэй байж, Таны илэрхий Үйл хэрэгт үнэнч хэвээр үлдэн Агуу гайхамшгийн номондоо тэдэнд зориулж буулгасан зарлигуудаа хэрэгжүүлэхэд нь хайрт шавь нартаа тусалж, тэднийг удирдамжийн туг, дээдийн Чуулганы гэрэлт дэнлүү, Таны хязгааргүй мэргэн ухааны ундарга булаг, далдын тэнгэрээс доош гэрэлтэхдээ зөв чигийг заагч одод болгож хайрлаач. Та үнэнхүү Ялагдашгүй, Хамгийг чадагч, Хамгаас хүчтэй нь билээ.

-Абдул-Баха

Бурхан минь, Таны шилж сонгосон Бхүмүүсийн урьд өмнө нотолсныг би нотолж, хамгийн дээд Диваажингийн оршин суугчид хийгээд Таны хүч төгөлдөр Суудлыг тойрон хүрээлэгчдийн хүлээн зөвшөөрснийг би даган зөвшөөрнө. Хорвоо дэлхий, хурмаст тэнгэрийн бүх ханлиг, бүх ертөнцийн Эзэн Таных!

-Абдул-Баха

Эзэн тэнгэр минь! Өөрийн өчүүхэн шадар шивэгчиндээ, Танд сөгдөн өршөөл гуйж буй шадар зарцдаа хүртээсэн энэ их хишиг бэлгэнд тань болон түүнийг өөрийн эргэлзэшгүй хаант улсын зүг чиглүүлж, ээдрээт энэ ертөнцөд Өөрийн тань гайхамшигт дуудлагыг сонсож, юм бүхний ялгуусан эзэн болохын тань бэлэгдэл нотолгоог олж харах бололцоо олгосонд Таныгаа магтаж, талархал айлдъя.

Эзэн тэнгэр минь, хэвлийдээ байгаа энэ үрээ Тандаа зориулан даатгая. Та хайр ивээлдээ түүнийг Таны хаант улсын магтаал хүртэх аз жаргалтай хүүхэд болгон, Таны боловсролын ивээл дор өсч хөгжихөд нь тусалж хайрла. Та болбоос үнэнхүү Гоо жавхлант, үнэнхүү Агуу ивээлт эзэн билээ!

- Абдул-Баха

“Өршөөлт Бурханы шадар шивэгчин минь ээ! Үр хүүхдээ нялх багаас нь хүмүүжүүлэх нь чиний үүрэг болой.... Энэ үүргийг алгуурлаж ер болохгүй.”

- Абдул-Баха

Бурхан минь, сүр бахдал, агуу гайхамшиг, суу билэг, алдар гавъяа, ноёрхол, эрх хэмжээ, цог жавхлан, ивээл хайр, сүр хүч бүхний Эх булаг болсон Тандаа магтаал бүхнээ зориулъя. Та хүссэн хүнээ Хамгаас агуу далайдаа ойртуулж, хүссэн хүндээ Та Өнө эртний алдар нэрээ таних буяныг хүртээдэг болой. Газар дэлхий хийгээд тэнгэр диваажинд байгаа хэн боловч Таны дээдийн Хүсэл зарлигаас зайлж үл чадна. Өнө эртнээс Та орчлон хорвоогийн хувь тавиланг жолоодож ирсэн, хойшид ч Та хамаг амьтанд ноёрхсоор байх болно. Танаас өөр Бурхан үгүй. Та Хамгаас хүчтэн, Хамгийн өргөмжит, Бүхнээс хүчтэй, Бүхнээс мэргэн ухаантай.

Эзэн минь, шадар зарц нарынхаа нүүр царайг Таныг хардаг болгон гийгүүлж, Таны тэнгэрлэг ивээлийн орд руу хандан Таны бие сэтгэхүйн Тодруулал, Таны мөн чанарын Эх булаг болсон Түүнийг танин мэддэг болгон сэтгэл зүрхийг нь ариусгаач. Та үнэнхүү бүх хорвоо ертөнцийн эзэн билээ. Хязгааргүй эрх мэдэлт, Бүхнийг номхотгогч Танаас өөр Бурхан үгүй.

- Бахаулла

Аяа, нигүүлсэнгүй Бурхан минь! Намайг сэрээж, ухааруулсанд тань Тандаа талархaya. Та надад харах нүд, сонсох чих хайрлаж, намайг Өөрийн номын замд оруулан Өөрийн хаант улсад хөтлөн дагууллаа. Та надад зөв замыг зааж, Авралын хөлгөнд суухад минь туслалаа. Бурхан минь! Намайг туйлбартай үнэнч болгож, зориг хатуужил хайрла. Намайг хатуу ширүүн сорилтоос хамгаалж, Гэрээс зарлигийнхаа бат бөх цайзанд хорогдуул. Та үнэнхүү Хүчтэн, Та бүхнийг Харагч, Та бүхнийг Сонсогч билээ.

Нигүүлсэнгүй Бурхан минь ээ! Таны хайрын гэрлийг шил мэт тольдон тусгах тунгалаг сэтгэл зүрхийг надад хайрлаж, тэнгэрлэг хишгийн тань ундралаар энэ дэлхийг сарнай цэцгийн хүрээлэн болгон өөрчлөх чадалтай бодол ухааныг надад хүртээ.

Та бол Нигүүлсэнгүй, Энэрэнгүй билээ. Та агуу их буянт Бурхан билээ.

- Абдул-Баха

Бурхан Эзэн минь! Таны Алдар нэр бадартугай! Хамаг амьтан Таныг шүтдэг, харин Та хэнийг ч үл шүтнэ. Та хамаг амьтны Эзэн Хаан учир хэний ч зарц боол биш билээ. Та бүгдийг мэддэг боловч

харин хэн ч Таныг таньж үл мэднэ. Та хамаг амьтанд Өөрийгөө таниулж мэдүүлэхийн тулд хамаг амьтан, гариг ертөнцийг бүтээсэн билээ. Танаас өөр Бурхан байхгүй. Та бол Хамгийг Сэдэгч, Хамгийг Бүтээгч, Хамгийг Чадагч, Хамгийн Хүчтэй нь билээ.

Таанаа хүслийн туяанд гэрэлтэж туяарсан энэ үгийг ашиглан Танаас сөгдөж гуйх минь, цаг ямагт, аливаа нөхцөлд Таны ивээл дор байхсан хэмээн хүсч Таны шилж сонгосон хүмүүс, Таныг бишрэн шүтэгчдийн зүрх сэтгэлийг тэтгэж амьдруулсан рашаанаас надад хүртээж хайрлаач гэж сөгдөн гуйнам би.

Та агуу хүч, яруу алдар, элбэг дэлбэгийн Бурхан билээ. Танаас өөр Бурхан байхгүй. Та бол Дээд Удирдагч, Хамгийн Гайхамшигт, Хамгийг Айлдагч билээ.

- Бахаулла

Та бол хэмжээлшгүй яруу алдарт, өргөмжит билээ. Таныгаа би хэрхэн дурсаж чадах билээ, хамаг орчлонгийн Хайрыг булаасан Та минь, Таны айлдвар тунхагийг би хэрхэн гэрчилж чадах билээ, хамаг амьтныг өмнөө бөхийлгөсөн сүр жавхлант Та минь. Хүний сэтгэхүйн хамгийн дээд оргил болон хүний оюун ухаан, сэтгэлийн хүрч чадах хамгийн дээд

өндөрлөг бол чухамхүү Таны зарлиг айлдварын хүчээр буй болсон шинж бөгөөд Таны Үүдэл нээлтийн хүч чадлаар илэрхийлэгдсэн бэлэг тэмдэг болой. Танаас өөр хэн ч Таны алдрыг зүй ёсоор дурсан алдаршуулж, Таныг магтан мандуулах боломжгүй билээ. Бодит юмс бүр мөн чанараараа Танд ойр орших өргөөнд хүрэх чадалгүйгээ, амьд амьтан бүр сүнс сүлдээрээ Таны ариун Ахуйд нэвтрэх боломжгүйгээ гэрчилдэг билээ. Та бол хэмжээлшгүй яруу алдарт, өргөмжит билээ! Таныг Өөрийн Биеэр дуурсан мандуулж, Таны Өөрийн Мөн чанараар дуулсан магтаал л Таны таалалд нийцэж, Танд үнэнхүү үнэлэгдэж чадах болой...

-Бахаулла

Таны диваажин өөд би харцаа чиглүүлэх бүрдээ Таны эрхэм дээд, сүрлэг чанарыг, Таны хосгүй алдар сууг сэтгэлдээ дууддаг бөгөөд эргээд Таны газар дэлхий рүү харах бүрдээ Таны хүч чадлын нотолгоо, Таны хайр хишгийн шинж тэмдгийг олж таньдаг билээ. Далай тэнгисийг харвал, далай тэнгис ч хүртэл Таны идшидийн суу билиг, Таны хүч чадал, Таны эрхшээл болон Таны сүр жавхланг надад магтан дуулж байх шиг санагдах юм.

Уудам сайхан уул нуруудыг харах бүрийдээ хаа сайгүй Таны ялалт хийгээд хүчирхэг увдисын тань бэлэг тэмдэг, туг далбааг олж харах юм.

-Бахаулла

Бурхан минь, Таны алдар суу бат оршиг! Таны хайр халамжийн ариун амьсгал болон Таны өгөөмөр буян хишгийн зөөлөн сэвшээ нүд цавчих төдий богинохон хоромд амьд амьтан бүрийг ивээхээ зогсвол, бүхий л орчлон хорвоо үгүй болж, дэлхий хийгээд диваажинд орших бүхэн замхран хоосорно гэдэгт би үл эргэлзэнэ. Таны хүч чадлын увдис үүнийг гэрчилнэ! Таны хосгүй хүч чадлын гайхамшигт нотолгоо улам бүр арвижих болтугай! Таны өргөмжит хүч чадлын суу билиг арвижих болтугай! Бүхнийг ивээгч Таны агуу чанарын ид шид, Таны хүсэл зоригийг соронзот нөлөө улам арвижаг!

-Бахаулла

Бурхан минь, Таны хайр халамжийн Банхилуун үнэр намайг эзэмдэж, Таны энэрэл өршөөлийн зөөлөн салхи намайг хайр хишгийн Тань зүг чиглүүлж өгсөнд, Таныгаа магтан дуулъя, би.

-Бахаулла

НАС НӨГЧИГСДӨД ЗОРИУЛСАН МӨРГӨЛ

Эзэн тэнгэр минь, Таныгаа магтан бахадъя! Мөнхийн их хүч билгээрээ өргөмжилсөн түүнийгээ эндэгдүүлэлгүй, мөнхийн шүтээндээ оруулсан түүнийгээ өөрөөсөө хол зайлуулалгүй байж хайрла. Бурхан минь, эзэн тэнгэр Таны сүрэнд автагдсан түүнийг Та орхино гэж үү? Таны ивээл дор хорогдсон түүнийг өөрөөсөө холдуулна гэж үү, хүсэл минь? Өөдлөн дэвжихэд нь тусалсан түүнийгээ Та орхиж, өөрийг тань дурсан санадаг болоход нь тусалсан түүнийгээ Та мартаж чадна гэж үү?

Бурхан минь, Таны алдар нэр хэмжээлшгүйгээр бадартугай! Хамаг амьтны хаан, гол Хөдөлгөгч нь өнө эртнээс Та байсан, хамаг амьтны Эзэн тэнгэр, тэднийг захирагч нь Та үүрд байх болно. Бурхан тэнгэр минь, Таны алдар нэр бадартугай! Шадар зарц нартаа Та л нигүүлсэнгүй байхгүй юм бол хэн тэднийг ивээн тэтгэх юм бэ? Хайр халамжин дор тань байгаа хүмүүстээ Та туслахгүй бол хэн тэднийг авран туслах билээ?

Бурхан минь, Та хэмжээлшгүй алдарт билээ! Үнэнийхээ төлөө бахдуулсан

Таныгаа бид бүхэн үнэхээр шүтэн биширнэ. Шударга ёсыг илтгэн байдгийг тань бид бүхэн үнэхээр гэрчилнэ. Чухамхүү Таны гоо үзэсгэлэн, ивээлийг бүгд бишрэн хайрлана. Зовлонд нэрвэгсдийн аврал, Дангаар оршигч Танаас өөр Бурхан үгүй билээ.

-Бахаулла

Хамаг нүглийг арилгагч, хишиг хайрлагч, гуниг зовлонг гэтэлгэгч Бурхан минь ээ! Биет ертөнцөөс хальж, оюун санааны ертөнц өөд халин одогсдын нүгэл гэмийг арилгаж өгөхийг Танаас сөгдөн гуйнам, би, Эзэн тэнгэр минь!

Тэдний гэмийг цагаатгаж, уй гашууныг тонилгож, амьдралын харанхуйг гэрэлтүүлж өгөхийг гуйнам, би. Тэд нарыг аз жаргалынхаа цэцэрлэгт оруулж, рашаан усаар ариутгаж, сүрлэг уулын орой дээрх Өөрийн гайхамшигт хишгээсээ тэдэнд хүртээхийг залбиран гуйнам, би.

-Абдул-Баха

Бурхан минь! Бурхан минь! Үнэнхүү Таны тэнгэрлэг эрхэм дээд засгийн өмнө хүлцэгч, Таны нэг нэгдмэл чанарын

үүдийн өмнө сөгдөн ёслогч Таны шадар зарц хүмүүн, Танд болон, Таны найраг үгэнд итгэж, Таны сургаалыг нотолж, Таны хайрын галаар асан бадарч, Таны суу мэдлэгийн далайн гүнд умбаж, Таны салхи сэвшээнд татагдаж, Танд түшин найдаж, Тань руу хандан, Танд залбиран мөргөж, Таны өршөөл хайрд бат итгэлтэй боллоо. Тэрээр үхэлт амьдралаа орхиж, өнө мөнхийн оронд Тантай учрах завшааныг эрэлхийлэн нисэн одлоо.

Эзэн тэнгэр минь, Түүнийг өргөмжлөн мандуулж, Өөрийн эрхэм дээд өршөөлийн асар дор багтаан, Өөрийн ялгуусан диваажинд түүнийг дуудан оруулж, тансаг сарнайн цэцэрлэгтээ амьдралыг нь мөнхжүүлэн, нууц эрдэнэсээр дүүрэн ертөнц дэх гэрэл гэгээт далайдаа шумбуулна уу.

Та бол үнэнхүү Өгөөмөр, Хүчирхэг, Өршөөгч, Хишиг хайрлагч мөнөөс мөн болой.

-Бахаулла

"Үхэл нь итгэлт сүсэгтэн хүн бүрт үнэнхүү амьдралын бумбыг хайрладаг... Тэрээр мөнх амьдралыг хайрладаг болой."

-Бахаулла

ОГООРОЛ

Эзэн тэнгэр минь! Би Танаас орогнол хүсч, зүрх сэтгэлээ Таны бүх бэлэг тэмдгийн зүг хандуулж байна. Эзэн тэнгэр минь! Би аялж явахдаа ч, гэртээ байхдаа ч, ажлаа хийж байхдаа ч бүх итгэл найдвараа Танд зориулдаг. Хайр ивээлээрээ зүйрлэшгүй Та, намайг бүхнээс хамааралгүй болоход минь хүртээмжтэй тусламжаа хайрлаач! Эзэн тэнгэр минь, Таны санаа зоригоор нэгдүүлэх тэр хувь тавилангаар сэтгэл хангалуун явахад минь тусална уу. Таны айлтган захирах эрх хэмжээ хамгийн дээд билээ.

- Баб

Бурхан минь, Эзэн тэнгэр минь! Би өөрийн төрлөөс ангижран, Таны тусламжтайгаар энэ газар дэлхийн бүх юмнаас хамааралгүй болохыг, Таны санаанд таалагдах бүхнийг хүлээж авахад ямагт бэлэн байхыг хүсч байна. Өөрөөс тань өөр юунаас ч үл хамааралтай болох тэр буяныг надад үзүүлж, хэмжээлшгүй ач тусынхаа их хувийг надад хүртээж хайрла.

Та үнэхээрийн элбэг дүүрэн хайр ивээлт Эзэн тэнгэр билээ.

- Баб

Бурхан минь, Таны эрхшээл, хүчин чадлын өмнө би өчүүхэн сул дорой болохоо энэ мөчид гэрчлэн андгайлъя. Надад чухам юу буян нүгэл авчрахыг би үл мэднэ, харин Та бол үнэнхүү Бүхнийг мэдэгч, Бүхнээс мэргэн ухаантан билээ. Эзэн тэнгэр Бурхан минь, Таны мөнхийн зарлигийг даган түүгээр сэтгэл хангалуун явахад минь, Таны ертөнц бүхэнд хөгжин цэцэглэхэд минь тусалж, Өөрийн айлдвар лүндэнгээ надад хайрлана уу. Та бол чухамхүү Гоо жавхлант, Буян хишигт билээ.

Бурхан минь! Эрдэнэс баялгийнхаа далай болон Энэрэл ивээлийнхээ тэнгэрээс намайг бүү холдуулаач, надад энэ ба хойд ертөнцийн буяныг айлтган хайрлана уу. Чухамхүү Та бол тэнгэр диваажин дахь энэрэл өршөөлийн суудалд залрагч Эзэн тэнгэр мөн билээ. Цорын ганц, Бүхнийг мэдэгч, Бүхнээс мэргэн ухаантан Танаас өөр Бурхан байхгүй.

-Бахаулла

Эзэн тэнгэр минь, надад болон Таныг бишрэн шүтэгч олонд мэргэн оюундаа тунгааж, Эх Судартаа айлдсан буяныг айлтгаж хайрлана уу.

Учир нь, Та ариун мутартаа бүхий л зүйлсийн хэм хэмжээг тодорхойлон атгадаг билээ.

Таны хайрын сэтгэл болон тэнгэрлэг Эв нэгдлийг тань таньсан тэдгээр хүмүүст хангалттай хүртээдэг тэнгэрийн хишиг ивээлийн гайхамшигт бэлэг тэмдгийг Тань хүндлэн дээдлэгсдэд Та буян хишгээ үргэлжид хайрладаг билээ. Танаас бидэнд заяасан бүхнийг Таны хайр халамжинд даатгаж, Өөрийн мэргэн ухаандаа багтаасан сайн сайхан бүхнийг бидэнд хайрлахыг Танаас хичээнгүйлэн гуйя.

Эзэн тэнгэр минь, намайг муу бүхнээс авран хамгаална уу. Чухамхүү Та бол хамгийн хүчит, хамгийн чадалтай бөгөөд Та л бүхнийг ялагч ба Та л бүхнийг захирдаг билээ. Бурханы таалалд оршсон бүхэн биелж, Түүний хүсэл зоригт оршоогүй бүхэн хэзээ ч биелэхгүй юм.

Хамгаас Эрхэм, Бүхнээ хүчирхэг Бурханаас өөр хүч чадал гэж үгүй.

-Бахаулла

Бурхан минь, Бурхан минь! Бүхнээс ангижрахын рашаанаар аягыг минь дүүргэж, сүр жавхлан, буян хишгийнхээ орчинд Өөрийн хайрын дарсаар намайг

баясган цэнгүүлнэ үү. Намайг шунаг хүслийн хүлэгнээс чөлөөлж, энэхүү доорд ертөнцийн чөдрийг надаас таслан, Өөрийн оройн дээд орондоо дуудан аваачиж, ариун гэгээн амьсгалаараа Өөрийн шадар шивэгчин болгож хайрлана уу.

Эзэн тэнгэр минь, хайр хишгийнхээ гэрлээр дүр царайг минь гэрэлтүүлж, бүхнийг номхотгогч хүч чадлын тань шинж тэмдгийг хардаг болгон харах нүдийг минь гийгүүлж, бүхнийг хамарсан эрдэм мэдлэгийнхээ суу алдраар зүрхийг минь баясгаж, дүүрэн баярт мэдээгээр сэтгэлийг минь жаргааж хайрлана уу, энэ дэлхий хийгээд дээд тэнгэрийн Эзэн хаан, хүчирхэг, эзэрхэг Эзэн тэнгэр Та минь ээ. Тэгэх ахул, би Таны Сургаалыг хөхүүлэн дэлгэрүүлж, Таны Хуулинд зүтгэж, Таны Үгийг өргөмжилж явахсан билээ.

Та бол үнэнхүү Хүчирхэг, Өгөөмөр, Бүхнийг чадагч, Хязгааргүй чадалтан билээ.

-Бахаулла

Энэ орчлон дэлхий хийгээд диваажинг сүр жавхлангаараа гийсэн алдар нэрийг Тань барин Эзэн тэнгэр Танаас залбиран гуйя! Сургаал бичигтээ айлдсан зарлигт Тань өөрийн хүсэл зоригийг захируулж,

бүрэн эрхт хүч чадлаараа Таны хүсэн мөрөөдснөөс бусад зүйлийг үл хүсэмжилж, Таны хүсэл зоригоор надад оногдсон хувь заяанаас өөр бүхнийг үл мөрөөдөхөд минь тусалж хайрлаач.

Бүх цаг үеийн тэнгэрлэг зарлиг тушаал Таных билээ, бүх алдар нэрийн Эзэн тэнгэр Та минь! Харин Таны хүсэл тааллыг дагаж мөрдөх үүрэг бол Минийх билээ, Диваажинг бүтээгч минь!

-Бахаулла

Бурхан минь! Надад сэвгүй ариун сэтгэл хүртээж хайрлана уу. Миний найдвар болсон Та надад уужуу тайван ухамсрыг суулгаж хайрлана уу. Миний хамгаас хайртай Бурхан минь, Өөрийнхөө хүч чадлын уддисаар дамжуулж намайг Өөрийн Үйл хэрэгт баттай үнэнч болгож хайрлана уу. Миний хүсэл эрмэлзлийн зорилго болсон Та минь, яруу алдрынхаа гэрлээр гийгүүлж Өөрийн замыг надад зааж хайрлана уу. Миний оршин тогтнохын үндэс болсон Та минь, эрхэм төгс сүр хүчээрээ Өөрийн ариун нандин диваажинд намайг оруулж хайрлана уу. Миний Бурхан Та минь өнө мөнх амьдралын салхиараа миний сэтгэлийг засч хайрлаач. Миний дотны хань минь, Таны гандан бууршгүй аялгуу надад тайван амарлингуй байдлыг олгох болтугай. Эзэн минь, өнө эртнээс тогтсон Өөрийн баялаг дүр царайгаар намайг Өөрөөс тань өөр бүхнээс ангижруулж хайрлана уу. Хамгийн их илэрхий, хамгийн их нууц Та минь, Таны няцашгүй Мөн чанар тодорхой болсон тухай мэдээ надад баяр хөөр авч ирэх болтугай.

-Бахаулла

Миний Бишрэл, миний Хаан, миний хүсэл мөрөөдөл болсон Бурхан минь! Тандаа баярласан миний талархлыг үгээр яаж илэрхийлнэ вэ? Сэрэмжгүй байхад минь Та намайг сэрээлээ. Танаас нүүр буруулан ухарсан байхад Та намайг Өөрийнхөө зүг хандуулан өгөөмөр хайраараа тусаллаа. Намайг үхсэн мэт байхад амьдралын рашаан усаар Та амилууллаа. Намайг гандаж ядарсан байхад Хамгийн өршөөлт Бийрээс тань ундарсан айлдварынхаа тэнгэрлэг ундрагаар Та намайг сэхээн амьдрууллаа.

Тэнгэрлэг Зөн билигтэн минь! Оршин буй бүхэн чухам Таны хайр ивээлээр бүтсэн. Тэднийг өгөөмөр сэтгэлийнхээ ундрагаас бүү холдуулаач. Энэрэл нигүүлслийнхээ далайгаас ч тэднийг бүү тусгаарлаач. Ямар ч цаг үед, ямар ч нөхцөл байдалд намайг тэтгэн дэмжихийг би танаас гуйн мөргөж, ивээлийн тэнгэрээс тань Таны өнө эртний буян хишгийг хичээнгүйлэн эрнэм. Та үнэнхүү хайр хишгийн Эзэн, мөнхийн орны дээд Эзэн нь билээ.

-Абдул-Баха

Хэлэгтүн: Бурхан минь, Бурхан минь!
Шударга ёсны титмээр тэргүүнийг
минь, тэгш ёсны хээ хуараар магнайг минь
чимэглэ. Та үнэнхүү хишиг буян бүхний
Эзэн билээ.

-Абдул-Баха

Бурхан минь ээ! Миний сэтгэл
санааг цэвэрлэж, баяр хөөрөөр
бялхуулж хайрлана уу, Миний сэтгэл санааг
ариутгаж хайрлаач, Миний хүч чадлыг
гэрэлтүүлж хайрлана уу. Би амьдралынхаа
бүх үйл хэргийг танд даатгая. Та бол миний
замыг заагч, хамгаалагч билээ. Би уйтгар
шаналалаас ангижирч, баяр жаргалд умбасан
хүн болно.

Бурхан минь ээ! Би сэтгэл зовох явдлыг
таягдан хаяж, элдэв сэтгэлийн зовлонд
орохгүй байж чадна. Амьдралын бузар
булай явдлаас эгнэгт ангижрана би.

Бурхан минь ээ! Та бол миний өмөг
тушиг, найдвартай анд нөхөр билээ. Бурхан
Эзэн минь ээ! Таны Үйл Хэргийн төлөө
өөрийгөө зориулахыг хүснэм би.

-Абдул-Баха

Эзэн тэнгэр минь! Бид сул дорой,
биднийг тэнхрүүлж хайрла. Бурхан
минь, бид мунхаг, бидэнд эрдэм мэдлэг
хайрла. Эзэн тэнгэр минь, бид ядуу, бидэнд
баялаг хайрла. Бурхан минь, бид үхсэн мэт,
биднийг амьдруул. Эзэн тэнгэр минь, бид
доромжлол гутамшгийг амсана. Биднийг
Өөрийн оронд мандуул. Эзэн тэнгэр минь,
хэрэв Та бидэнд тусалбал бид гэрэлтэх од
мичид мэт болох билээ. Хэрэв Та бидэнд
туслахгүй юм бол бид газар шорооноос ч дор
болно. Эзэн тэнгэр минь! Биднийг
тэнхрүүлж хайрла. Бурхан минь! Бидэнд
ялалт авчир. Бурхан минь! “Би” гэсэн үзлээ
ялан дийлж, хүсэл шуналаа даван дийлэхэд
маань тусал. Эзэн тэнгэр минь! Материаллаг
ертөнцийн хүлээснээс биднийг ангиж-
руулж хайрла. Эзэн тэнгэр минь! Ариун
Сүнсний амьсгаагаар биднийг амьдруулж
хайрла. Чингэвээс бид Танд үйлчлэхээр
эгцлэн босч, Таныг сүсэглэн бишрэх
буяныг бүтээж, туйлын чин сэтгэлээр Таны
хаант улсад өөрсдийгөө зориулах болмой.
Эзэн тэнгэр минь! Та бол Хүчирхэг билээ!
Бурхан минь! Та бол Өршөөнгүй! Эзэн
минь, Та бол Нигүүлсэнгүй билээ!

-Абдул-Баха

Бурхан минь, Бурхан минь! Та бол миний Найдвар, миний Хайрт, миний дээдийн Зорилго, Хүсэл билээ! Намайг Өөрийн нутагт хайрынхаа сүм, Өөрийн бүтээсэн амьд бүхний дотор Өөрийн мэдлэгийн дэнлүү, Өөрийн эзэмшил ертөнцөд тэнгэрлэг буян хишгийн туг далбаа болгохыг би туйлын даруу хүлцэнгүй, туйлын сүсэг бишрэлтэй байдлаар Танд залбиран гуйя. Танаас өөр бүхнийг огоорч, энэ дэлхийн зуурдын зүйлсээс өөрсдийгөө ариутгаж, элдэв хоосон хүсэл шохоорхлыг өдөөгч дуу хоолойтны нөлөөнөөс чөлөөлөгдсөн тийм шадар зарц нарынхаа тоонд намайг оруулж хайрла.

Таны хаант улсын адис хишигт сүнс сүлдээр миний зүрх сэтгэлийг баяр цэнгэлээр дүүргэж, Таны Бүхнээс хүчит алдрын орноос надад ээлж дараалан ирж буй тэнгэрлэг тусламжийг харан мэлмий минь баясах болтугай.

Та үнэнхүү Бүхнээс хүчтэй, Хамгийн гайхамшигт, Хамгаас хүчирхэг билээ.

- Абдул-Баха

Эзэн тэнгэр минь, миний Хайр бишрэл, миний Хүсэл мөрөөдөл минь! Ганцаардах үед минь нөхөр болж, цөлөгдөх үед минь хань бологтун. Уй гашууныг минь зайлуулж хайрла. Таны гоо үзэсгэлэнг шүтэхэд минь тусалж хайрла. Танаас өөр бүхнээс чөлөөлөгдөхөд минь ивээлээ хайрла. Буяны ариун үнэрээр миний сэтгэлийг татагтун. Танаас бусад бүхнээс ангижирч, Таны ариун босгонд үйлчлэхийг мөрөөдөж, Таны Үйл хэргийн төлөө хүчин зүтгэж буй тэдгээр хүмүүстэй Таны хаант оронд нэгдэхэд минь тусална уу. Намайг Таны хүсэл таалалд нийцсэн Таны шадар шивэгчин нарын нэг болгож хайрла. Та үнэнхүү Хайр ивээлт, Өгөөмөр сэтгэлтэн билээ.

- Абдул-Баха

Эзэн тэнгэр минь! Өөрийн Гоо үзэсгэлэнг миний балин идээ, Оршин байгаа байдлыг миний ундаа, Өөрийн цэнгэлийн манлайг миний итгэл найдвар болгож хайрлаач. Таны магтууг миний үйл ажиллагаа, Таныг санаж дурсах явдлыг миний амьдралын хань, Таны хязгааргүй эрх мэдлийг миний хамгаалагч, Таны орд харшийг миний орон гэр болгож

хайрлаач. Миний орон гэрийг Танаас холдсон тэдний нүглээс ариуссан суудал болгож хайрлаач.

Чухамхүү Та бол Хамгийг Чадагч, Хамгаас Гайхамшигт, Хамгийн Хүчирхэг нь билээ.

-Бахаулла

Мөнхийн тансаг үнэртэй гол горхиноос надад ус хайрлаач. Бурхан минь. Өөрийн ахуйн модноос надад жимс балин хайрлаач, Итгэл найдвар минь! Энэрэл хайрын болор тунгалаг горхиноосоо уухыг зөвшөөрч хайрлана уу, Яруу алдарт минь! Мөнхийн хайр халамжийн сүүдэр дор суухыг зөвшөөрч хайрлана уу, Гэрэл гэгээ минь! Танд ойр байгаа тал нугын тань дэргэдүүр хэрэн хэсүүчлэх боломжийг олгоно уу, Хайрт минь! Энэрэл өршөөлийн ширээний баруун гарт намайг суулгаж хайрлана уу, Хүслэн минь! Баяр баясгалангийн анхилуун үнэрт салхиараа намайг үлээж хайрлана уу, Зорилго минь! Өөрийн Бодит үнэний диваажингийн оронд орох зөвшөөрөл олгож хайрлана уу, Бишрэн шүтэгч минь! Таны нэг нэгдмэлийн тагтааны аялгуунаас сонсох зөвшөөрөл олгож хайрлана уу, Гойд сайхан минь! Хүч

чадлын сүнс сүлдээрээ намайг амьдруулж хайрлана уу, Хангагч минь! Хайр ивээлийнхээ сүнс сүлдээр намайг туйлбартай болгож хайрлана уу, Тэтгэгч минь! Өөрийн хүсэл таашаалын замаар миний хөлийг бат гишгүүлж хайрлана уу, намайг Бүтээгч минь! Өнө мөнхийн цэцэрлэгтээ Өөрийн дэргэд мөнх байх зөвшөөрөл хайрлана уу, намайг Өршөөгч та минь! Өөрийн яруу алдрын суудалд намайг суулгаж хайрлана уу, намайг Эзэгнэгч минь! Хайр халамжийнхаа тэнгэр өөд намайг өргөж өндийлгөнө үү, намайг Амьдруулагч минь! Өөрийн удирдлагын Өдрийн Од руу намайг хөтлөн дагуулаач, сэтгэлийг Татагч минь! Таны үл харагдах сүнс сүлдний үүдэл нээлтийн өмнө намайг дуудаж аваачина уу, миний Үүсэл гарлын Эх, Эрхэм дээд Хүсэл Та минь ээ! Өөрийн гоо үзэсгэлэнгийн анхилуун тансаг мөн чанар луу намайг эргүүлэн аваачаач, миний Бурхан Та минь!

Хүссэн бүхнээ хийх чадалтай билээ Та. Та чухамхүү Хамгаас өргөмжит, Хамгийн гайхамшигт, Эрхэм дээдийн дээд нь билээ.

-Бахаулла

ОЮУН САНААНЫ ЧУУЛГА

Зөвлөлдөөний танхимд орох бүрийдээ Бүхнээс хүчтэй Бурханаас өгөөмөр тусламжийг хүртэн дээдийн ялалтанд хүрэхийн тулд Бурханы хайраар догдолсон сэтгэлээр Бурханаас өөр юуг ч үл дурсах цэвэр ариун хэлээр энэхүү мөргөлийг уншигтун.

Бурхан минь, Бурхан минь! Бид бол Таны гэгээн дүрд хандаж, энэ гайхамшигт Өдөр Өөрөөс тань өөр бүхнийг умартсан Таны шадар зарц нар билээ. Бид Оюун Санааны энэ Чуулгад хуран цугларч, хүн төрөлхтний дотор Таны сургаалыг магтан өргөмжлөх зорилготойгоор үзэл бодлоороо нэгдлээ. Эзэн тэнгэр минь, Бурхан минь! Биднийг Өөрийн Тэнгэрлэг Удирдамжийн бэлэг тэмдэг, хүн ардын дунд Өөрийн өргөмжит Шүтлэгийн туг далбаа, Өөрийн Гэрээсийн шадар зарц, Абха-н Хаант улс дахь Өөрийн Тэнгэрлэг эв нэгдлийн илэрхийлэл, бүх газар нутгийг гэрэлтүүлэн гийгүүлэх од мичид болгож хайрлана уу, Хамгаас дээд Эзэн тэнгэр минь! Эзэн тэнгэр минь! Таны гайхамшигт Ивээлийн давалгаагаар цалгилах далай, Таны бүхнээс гайхамшигт Оргилоос буух ундрага, Таны тэнгэрлэг Үйл хэргийн Модны ачит жимс, Таны хурмастын Цэцэрлэгт Өөрийн тань Хишгийн сэвшээнд

найгах мод болоход маань бидэнд тусла. Бурхан минь! Бидний сэтгэлийг Таны Тэнгэрлэг эв нэгдлийн Шад мөрүүдэд найдан итгэдэг, бидний зүрхийг Таны Гоо жавхлангийн цацралаар баясан цэнгэдэг болгож өгөөч. Чингэвээс бид нэг далайн олон давалгаа, Таны туяарсан Гэрэл гэгээний олон цацраг мэт нэгдэн нийлж, бидний ухаан бодол, үзэл санаа, сэтгэлийн мэдрэмж бүхэн нэгэн бодит чанар болж, дэлхий ертөнц даяар эвийн холбооны сүнс сүлдийг илэрхийлэх болмой. Та бол Гоо жавхлант, Хайр хишигтэн, Хувь хишиг хайрлагч, Бүхнээс хүчтэн, Энэрэнгүй, Нигүүлсэнгүй билээ.

-Абдул-Баха

Шижир тунгалаг баяр баясгалангаар бялхан, хурлынхаа эхэнд энэхүү мөргөлийг уншигтун:

Аяа, Хаант улсын Эзэн Та! Бидний бие энд хамт цугларсан хэдий ч бидний бахдсан сэтгэл Таны хайранд мансууран хэсүүчилж, Таны агуу гайхамшигт дүрийн цацрагаар бидний зүрх сэтгэл тэнгэрт халин нисч байна. Бид сул дорой хэдий ч Таныхаа хүч чадлын илрэлийг хүлээж байна. Бид хөрөнгө мөнгө ч үгүй ядуу хэдий ч Таныхаа хаант орны сангаас эрдэнэс баялгийг

хүртсээр байна. Бид дусал төдий өчүүхэн хэдий ч Таны их далайн гүн ёроолоос шавхсаар байна. Бид хумхын тоос мэт өчүүхэн хэдий ч Таны гайхамшигт Нарны туяанд гэрэлтсээр байна.

Бидний хэрэгцээг Хангагч Та минь ээ! Энд цугласан хүн бүр гэрэлт дэн, хүн бүр сэтгэлийг татах соронзон, хүн бүр Таны хурмастын орны зүг дуудах зарч болж, эцэст нь хоосон энэ ертөнцийг бид Таны диваажингийн тольт тусгал болгоход маань тусалж хайрла.

- Абдул-Баха

Оюун Санааны Чуулгын хурлын төгсгөлд хэлэх мөргөл:

Бурхан минь! Бурхан минь! Бид Танд сүсэглэж, Таны шинж тэмдэгт итгэж, Таны Гэрээс, Захиаст үнэнч байж, Танд татагдаж, Таны хайрын галд дүрэлзэж, Таны Үйл хэрэгт үнэнчээр зүтгэн энэхүү оюун санааны уулзалтанд хуран цугларсан байгаар Та Өөрийн нэг нэгдмэл чанарын үл үзэгдэх орноос хараач. Бид болбоос Таны цэцэрлэг дэх шадар зарц нар, Таны шашныг түгээн дэлгэрүүлэгчид, Таны дүр царайг шүтэн бишрэгчид бөгөөд Таны хайрт шавь нарын өмнө даруу төлөв, Таны үүд хаалганы өмнө

хүлцэнгүй зогсон Танаас хичээнгүйлэн гуйж байна: Өөрийн сонгомол шавь нарт үйлчлэх үйлст маань биднийг батжуулж, Өөрийн үл үзэгдэх сүнснүүдээрээ биднийг дэмжин тэтгэж, Өөрт тань ёсчлон зүтгэх бидний бие сэтгэлийг бэхжүүлж, Тантай харилцахдаа даруу хүлцэнгүй, бишрэнгүй байхад маань тусалж хайрлана уу.

Аяа, Эзэн тэнгэр минь ээ! Бид болбоос сул дорой, харин Та бол Хүчирхэг, Чадалтай билээ. Бид болбоос амьгүй, харин Та бол амьдрал хайрлагч агуу Сүнс билээ. Бид болбоос гачигдал дутагдалтай, харин Та бол Тэтгэгч, Хүчирхэг билээ.

Аяа, Эзэн тэнгэр минь ээ! Бидний нүүр царайг Өөрийн энэрэлт дүр царай руу хандуулж, биднийг Өөрийн хурмастын ширээнээс элбэг дэлбэг хайр хишгээрээ тэжээж, Өөрийн эрхэм дээд сахиулсан сүнснүүдийнхээ тусламжтайгаар биднийг дэмжиж, Абха-н Орны ариун сүнснүүдээрээ дамжуулан биднийг бэхжүүлж хайрла.

Үнэнхүү Та болбоос Өгөөмөр, Энэрэнгүй билээ. Та бол агуу их буян хишгийг Эзэгнэгч бөгөөд Та бол үнэнхүү Цэцэн мэргэн, Гоо жавхлант билээ.

-Абдул-Баха

ӨВЧНӨӨС АНАГААХУЙ

“Өвчнөөс анагаахын төлөө зохиосон мөргөлүүд нь зөвхөн биеийг эдгэрүүлэхэд тустай төдийгүй мөн оюун санааг эдгэрүүлэхэд тустай. Тиймээс өөрийн бие, сэтгэл хоёрыг анагаахын тулд тэдгээрийг уншигтун...”

- Абдул-Баха

Бурхан минь Таны алдар нэр болбоос намайг анагаагч, Таныг дурсан санах явдал бол намайг эдгээгч эм билээ. Танд ойр байх нь миний найдвар, Танд зориулсан хайр минь миний анд нөхөр билээ. Намайг энэрэх Таны нигүүлсэл бол намайг анагаагч бөгөөд энэ ба ирэх ертөнцөд намайг тэтгэгч билээ. Та бол үнэхээр Хамгаас буянтан, Хамгийг мэдэгч, Хамгаас мэргэн нь билээ.

- Бахаулла

Бурхан минь ээ! Таны алдар нэрийг дурсвал хүнийг өвчин эмгэгээс анагааж, цангасан хүний цангааг гаргаж, гаслантай хүнийг тайтгаруулж, төөрсөн хүнийг зөв замд оруулж, доромжлогдсон хүний алдрыг сэргээж, үгээгүй ядууг баян

болгож, мунхаг харанхуйг гэгээрүүлж, уйтгар гунигтайг сэргээж, уй гашуутайг баярлуулж, даарч хөрснийг дулаацуулж, гутарч шантарсныг зоригжуулж чадна. Бурхан минь ээ! Таны алдар нэр хамаг амьтныг амилуулж, тэнгэр диваажин, газар дэлхийг бүтээж, дэлхий ертөнцөд хур бороо хайрлажээ. Энэ нь хамаг амьтанд хүртээсэн Таны өгөөмөр сэтгэлийн нотолгоо билээ.

Өөрийн бурханлаг чанарыг илэрхийлж, Өөрийн Үйл хэргийн бүх л орчлонд өргөмжилсөн алдар нэрийг тань, мөн Таны хамгаас гайхамшигт, хамгаас ялгуусан шинж чанар бүрийг тань болон Өөрийн хамгаас өргөмжит хосгүй Биеэ магтан дуулсан буянт чанаруудыг тань барин би хүсэх минь: Өөрийн бүтээлт орчлонгийн оронд хамгаас ялгуусан Өөрийн бие чанартай холбосон энэхүү нялх амьтныг анагаан эдгээх хур бороог энэрэл хайрынхаа үүлэн дундаас энэ шөнө илгээнэ үү. Бурхан минь, Өөрийн гоо жавхлангийн уддисаар түүнийг сайн сайхан аж байдал, эрүүл энхийн баринтгаар өлгийдөж, түүнийг зовлон бэрхшээл, эмх замбараагүй явдал, Өөрт тань үл таалагдах бүхнээс хамгаалж соёрхоно уу, хамгаас Хайрт Бурхан минь. Та бүхнийг бүтээх хүч чадалтай билээ. Та бол

үнэнхүү Хамгийн хүчирхэг, Дангаар оршигч юм. Бурхан минь, түүнд энэ ба дараачийн ертөнцийн сайн сайхныг хайрлаж, өнгөрсөн ба ирээдүйн буяныг болгоон соёрх. Таны хүч чадал ба Таны мэргэн ухаан бол үнэнхүү үүнийг хийх чадалтай билээ.

- Бахаулла

Бурхан минь, Бурхан минь! Таны анагаах уддисын далай, Таны өгөөмөр сэтгэлийн үүрийн туяа. хамаг шадар зарцыг номхруулагч Таны алдар нэр, Таны үнэн сүр жавхлант Үг, хамгаас ялгуусан Бийрийн гайхамшигт хүч чадал, тэнгэр ертөнцөд байгаа хамаг амьтнаас өмнө оршиж байсан Таны энэрэх сэтгэлээс хүсэх минь: Өөрийн өгөөмөр сэтгэлийн ариун рашаанаар хамаг зовлон, будлиан, сул дорой байдлыг надаас үүрд тонилгож хайрлаач.

Эзэн минь ээ! Таны буян хишгийн үүд хаалганы өмнө Таны өгөөмөр сэтгэлийн олсноос атгах найдлагыг өвөрлөн хүлээж суугаа түүнийг Та харж байгаа билээ. Таны энэрэл хайрын далай, нинжин сэтгэлийн Өдрийн одны гэрлээс хувь хүртэхийг хүсэж

байгаа түүний хүслийг биелүүлэхээс бүү татгалзаач.

Та хүссэн бүхнээ хийх чадалтай билээ. Танаас өөр Бурхан үгүй. Та Бүгдийг өршөөгч, Хамгаас Өгөөмөр сэтгэлтэй нь билээ.

- Бахаулла

Бурхан минь, Эзэн минь! Би бол Таны шадар зарц, Таны шадар зарцын хүү билээ. Таны зарлигийн судруудад айлдсаны дагуу Таны нэг нэгдмэлийн Өдрийн Од Таны хүсэл тааллын эх булгаас гэрэлтэн гийж, гэрэл туяагаа бүхий л ертөнцөд цацсан энэ үүрийн гэгээнээр би орноосоо бослоо.

Бурхан минь, бид Таны мэдлэгийн гайхамшгийн гэрэлд гялбан сэрсэнд Танд талархан мөргөө. Эзэн тэнгэр минь, Танаас өөр бүхнийг умартаж, Танаас өөр хэнд ч уягдан хорогдохгүй байлгах тэр зүйлийг бидэнд илгээж хайрла. Түүнчлэн надад болон миний хайртай хүн бүрд, эрэгтэй, эмэгтэй ялгаагүй миний бүх төрөл төрөгсдөд энэ дэлхийн хийгээд ирээдүйн ертөнцийн сайн сайхныг хайрла. Бүхий л орчлонд хайрлагдсан, бүх ертөнцийн хүсэл мөрөөдөл болсон Та хүний сэтгэлд сэв суулгадаг хорон муу санааг шивнэгчдээс биднийг эндэшгүй хамгаалалтаараа хамгаалаач. Та хүссэнээ хийх чадалтай. Та үнэнхүү Хамгийн хүчтэн, зовсон цагт Туслагч, Дангаар оршигч билээ.

Эзэн тэнгэр минь, хамгаас эрхэм дээд өргөмжлөлийг хүртээсэн Түүнийг адис-

лаж хайрлана уу. Та Түүгээр дамжуулан буян нүгэл хоёрыг ялган заагласан билээ.

Таны санаж хүссэн бүхнийг хэрэгжүүлэхэд бидэнд тусалж хайрла. Бурхан тэнгэр минь, бас Таны Үг, үсэг болж, Танд нүүр царайгаа хандуулж, Таны дуудлагыг сонордсон тэднийг адислан ивээнэ үү. Та үнэнхүү хүн бүхний Эзэн хаан, бүхнээс илүү хүч чадалтай билээ.

- Бахаулла

Бурхан тэнгэр минь, би Таны нөмөр халамжин дор сэрлээ. Таны нөмөр халамжийг эрэлхийлсэн хүн Таны хамгаалалтын ариун шүтээн, Таны өмгөөллийн бат цайзанд хорогдох заяатай билээ. Эзэн тэнгэр минь, Та Өөрийн ивээлийн өглөөний туяагаар миний гадаад төрхийг гийгүүлснийхээ адил Өөрийн Үүдэл нээлтийн гайхамшигт үүрийн туяагаар дотоод сэтгэлийг минь гийгүүлж хайрлана уу.

- Бахаулла

ӨРШӨӨЛ

*(Бахауллагийн Баярын ес дэх Мэдээнд
байдаг мөргөл)*

*...Нүгэл гэмээ бусад хүний өмнө илчлэн
наминчлах хориотой.... Нүгэл үйлдэгч харин
Бурханы өмнө өршөөлийн Далайгаас өршөөл
гуйн залбирч, энэрлийн Хурмastaас уучлал
хүсэн ийнхүү хэлбэл зохино:*

Бурхан тэнгэр минь, Таны тансаг
уран айлдварт хөөрөн баясч, хамгийн
гайхамшигт баатарлаг гавъяаны талбар
болох Алдарын орой өөд яаран тэмүүлсэн,
Таныг жинхэнэ хайрлагчдын цус, Таны суу
билгээр баяжсан тэдгээр нууцас болон
Таны ивээлийн далайн ёроолд хадгалагдан
буй сувд эрдэнэсийн нэрийг барин намайг
болон миний эцэг эхийг өршөөн
хэлтрүүлэхийг Танаас хичээнгүйлэн хүсч
гуйя. Өршөөл хайрлагчдын дундаас
чухамхүү Та үнэхээр Хамгийн өршөөнгүй
нь билээ. Хамгийг өршөөгч, Хамгийг
ивээгч Танаас өөр Бурхан үгүй.

Эзэн тэнгэр минь ээ! Энэ нүгэлт хүн
Таны таашаалын далай руу хандаж, энэ
дорой хүн Таны тэнгэрлэг хүч чадлын

орныг эрж, энэ ядуу амьтан Таны баялгийн
өдрийн од руу зүглэж байгааг Та үзэж
байна. Эзэн тэнгэр минь, Өөрийн өршөөл
ивээл хайрлан түүний урмыг бүү хугалаач.
Өөрийн нигүүлслийн үүдэл нээлтээс
түүнийг бүү холдуулаач. Хорвоо дэлхий,
хурмаст тэнгэрт оршин суугчдад зориулж
өргөн нээсэн үүд хаалганаасаа түүнийг бүү
зайлуулаач.

Юутай харамсалтай вэ! Миний нүгэл
гэгээн Таны Өргөөнд ойртохоос минь
саатуулж, миний гэм буруу эрхэмсэг Таны
Асараас алс холдууллаа. Би Таны
хориглосныг хийж Таны дагаж мөрдөхийг
зааж номлосныг хойш тавилаа.

Танд ойртоход минь тусалж, Таны
өршөөл, Таны нигүүлслийг надаас
саатуулсан миний гэм бурууг ариутгах
зүйлийг Өөрийн ивээлт үзгээр надад бичиж
хайрлахыг Алдар нэрсийн дээд Эзний
нэрийг барин Танаас хүсэн залбирья.

Чухамхүү Та бол Хүчтэн, Хишиг
хайрлагч билээ. Хамгаас хүчтэй, Гоо
жавхлант Танаас өөр Бурхан үгүй.

- Бахаулла

Эзэн тэнгэр минь, Таныгаа магтан
Өргөмжилье. Бидний нүглийг

уучилж, биднийг өршөөн хэлтрүүлж, Тандаа эргэж хандахад маань туслаач. Танаас өөр юунд ч найдахгүй болгон ивээлээ хүртээн Өөрийн хүсэн хайрлаж буй болон Өөрт тань таашаагдах бүхнийг бидэнд хайрлаач. Үнэнч сэтгэлээр шүтэн бишрэгчдийн байр суурийг нэмж, тэднийг нигүүлсэнгүй ивээлээрээ уучлан тэтгээч.

Та үнэнхүү Зовлонд нэрвэгсдийн аврал, эгнэгт Дангаар оршигч билээ.

-Баб

Бурхан Эзэн тэнгэр минь! Таны хайр халамжаас өөр бусад зугаа цэнгэл, Танд ойртохоос өөр бусад тайтгарал юмуу Таны таашаалаас өөр бусад баяр баяслыг юмуу Тантай нэгдэхээс өөр бусад оршин тогтнолыг эрэлхийлснийг минь уучлан соёрхохыг Танаас хичээнгүйлэн гуйя.

-Баб

Өршөөлт Эзэн тэнгэр минь! Та бол энэ бүх шадар зарц нарынхаа хорогдох орон билээ. Та бүх нууцыг мэдэж, бүхнийг мэдэрч байгаа. Бид бүхэн арчаагүй, харин Та бол Хүчтэн, Бүхнээс хүчирхэг нь билээ.

Бид бүхэн нүгэлтнүүд, харин Та нүглийг өршөөгч, Хамгаас нигүүлсэнгүй, Хамгийн халамжит. Эзэн тэнгэр ээ! Та бидний алдаа дутагдлыг битгий хайхар. Та бидэнтэй Өөрийн хайр ивээлээр харилц. Бидний алдаа дутагдал их боловч Таны өршөөлийн далай хязгааргүй билээ. Бидний алдаа, сул тал харамсалтай хэдий ч Таны тус дэмжлэгийн нотолгоо тодорхой билээ. Иймээс Та биднийгээ төгөлдөржүүлэн бэхжүүл. Таны ариун Босгонд л таашаагдах зүйлийг хийхэд маань бидэнд тусал. Сэтгэл зүрхийг маань гийгүүлэн бидэнд үзэж таних хурц нүд, анхаарч сонсох сонор чих хайрла. Үхснийг сэргээж, өвчтнийг эдгэрүүл. Ядуу хүнд баялаг хайрлаж, айсан хүнийг амар тайван болго. Биднийг Өөрийн хаант улсад хүлээн авч, биднийг удирдамжийн гэрлээрээ гийгүүл. Та хамгийн Нигүүлсэнгүй. Та хамгийн Өршөөнгүй. Та хамгийн Ивээлт билээ.

-Абдул-Баха

Бурхан минь, хамаг амьтны Бурхан, миний Яруу алдар, хамаг амьтны Яруу алдар, миний Хүслэн, хамаг амьтны Хүслэн, миний Тулах хүч, хамаг амьтны Тулах хүч, миний Эзэн Хаан, хамаг амьтны Эзэн Хаан, намайг Эзэгнэгч, хамаг амьтныг

Эзэгнэгч, миний Зорилго, хамаг амьтны
Зорилго, намайг Хөдөлгөгч, хамаг амьтныг
Хөдөлгөгч Таны Алдар нэр бадартугай!
Өчүүхэн намайг Өөрийн хайр энэрлийн
далайнаас бүү холдуулаач, Танд ойрхон байх
эрэгнээс намайг хол хөндийрүүлэхгүй
байлгаасай хэмээн мэхийн гуйнам би.

Эзэн тэнгэр минь, надад Танаас өөр хэн
ч хэрэггүй. Танаас өөр хэний ч дэргэд
байхыг хүсэхгүй би. Өөрөөс тань өөр хэн ч
хэрэггүй элбэг дүүрэн эрдэнэс баялгаасаа
надад хүртээж, Таны зүг хандаж, Таны Үйл
хэрэгт үйлчлэхээр эгцлэн боссон
тэдгээрийн хүмүүсийн тоонд намайг
оруулахыг гуйнам би.

Эзэн тэнгэр минь! Өөрийн зарц зардас
нараа өршөөн хайрлана уу. Та чухамхүү
Хамгийг Өршөөгч, Хамгаас Нигүүлсэнгүй
нь мөн билээ.

-Бахаулла

Бурхан минь, Таны алдар бадартугай.
Таны өршөөл энэрлийг наминчлан
гуйсан шадар зарц нарынхаа нүгэл гэмийг
Та үргэлжид өршөөн хэлтрүүлдэг билээ. Үүр
шөнийн цагаар Танаас өршөөл аврал эрж,
мөргөн залбирч, гагцхүү Бурханд тэмүүлж,
Бурханаас тэдэнд заяасан бүхнийг

эрхэмлэж, өглөө үдэшгүй Түүнийг магтан
мандуулж, өөрсдийн үүргээ умартаагүй
тэдгээр хүмүүсийн болон миний нүгэл
гэмийг цагаатгаж хайрлана уу.

Баб

ПИОНЕРҮҮДЭД ЗОРИУЛСАН МӨРГӨЛ

Бурхан минь, Таны таалалд нийцэж, Танд хүчин зүтгэх үйлстээ бат тууштай байж, Танд үйлчлэхэд бие сэтгэлээ зориулан, Таны гайхамшигт цэцэрлэгт хөдөлмөрлөж, Таны замналд бүхнээ золиослохоос өөр хүсэл мөрөөдөл миний сэтгэл зүрхэнд үгүй Та мэдэж байгаа тул намайг гэрчилнэ. Та бол Бүхнийг мэдэгч, Бүхнийг харагч билээ. Таныгаа хайрлан бишрэхдээ би алхаа гишгээгээ уул хад, тал цөл рүү чиглүүлж, Таны хаант улс заларсныг чанга дуугаар тунхаглан, Таны дуудлагыг бүх хүн ардад сонордуулан явахаас өөр хүсэл надад үгүй билээ. Бурхан минь, энэ арга тасарсан хүнд үүд хаалгыг нь нээн өгч, энэ өвчтэй хүнийг анагаан эдгэрүүлж, энэ зовж шаналсан хүнийг илааршуулж хайрла. Сэтгэл зүрхээр догдолж, нүдэндээ нулимс цийлэгнүүлэн Танаас залбиран гуйнам би.

Бурхан минь! Би Таны замналд ямар ч зовлон бэрхшээлийг тэвчин өнгөрүүлэхэд бэлэн байгаа бөгөөд ямар ч саад тотгорыг зоригтой угтан авахыг бүхий л зүрх сэтгэлээрээ хүсэн тэмүүлнэ.

Бурхан минь! Намайг сорилт шалгуураас хамгаална уу. Би бүх л зүйлийг огоорч, бүх л бодол санаанаас өөрийгөө чөлөөлсөн гэдгийг Та сайн мэдэх билээ. Таныг дурсахаас өөр ажил надад үгүй, Танд үйлчлэхээс өөр хүсэл эрмэлзэл надад үгүй.

-Абдул-Баха

САНД ХАНДИВ ӨРГӨХҮЙ

Бурханы найз нөхөд...бүр өчүүхэн бага ч гэсэн өөрийн боломжийн хирээр хандив өргөвөл зохино. Бурхан хүний хүч бололцооноос хэтэрсэн ачааг хэнд ч үүрүүлдэггүй. Ийм хандив бүх төв, бүх сүсэгтнүүдээс орох ёстой..... Бурханы найз нөхөд өө! Эдгээр хувь хандивын оронд хөдөө аж ахуй, аж үйлдвэр, арилжаа наймаа тань буяны үйлсийн хүчинд буян хишгээр ивээгдэн арвижаах болно гэдэгт итгэгтүн. Нэг сайн үйлс хийсэн хүн түүнээс арав дахин илүү шагнал хүртэнэ. Эд баялгаа Бурханы төлөө хандивласан хүнд алсдаа Бурхан арвин их шан хүртээх нь эргэлзээгүй.

Бурхан тэнгэр минь! Жинхэнэ хайрлан хүндэтгэгчдийнхээ мэлмийг гийгүүлэн, ялгуусан буяны ивээлээр тэднийг дэмжээч. Шударга шулуун замналаараа тэдний хөлийг бат гишгүүлж, өнө эртний өглөг хишгээрээ тэдний өмнө буяныхаа үүдийг нээгээч. Учир нь, Танаас хайрласан бүхнийг тэд Таны замналын төлөө зориулан өргөж, Таны дурсгалд даатгаж, Таныг хайрлан шүтэхэд зүрх сэтгэлээ зориулан, Таны гоо жавхланг

шүтэн биширч, Таны таалалд нийцэхийн тулд юугаа ч хайрлахгүй байна.

Эзэн тэнгэр минь ээ! Тэдэнд найдвартай шан харамжийг заяаж элбэг арвин хувь хэмжээг хүртээж хайрла.

Чухам Та бол Тэтгэгч, Туслагч, Хамгаас өгөөмөр, Хамгаас ивээлт, Хишиг хайрлагч билээ.

- Абдул-Баха

Бурхан минь ээ! Бурхан Тэнгэр минь! Өөрийн өгөөмөр нигүүлсэнгүй сэтгэлээр миний гайг арилгаж, Өөрийн агуу хүч чадлаар миний сэтгэлийн гасланг тонилгож хайрлаач. Гай зовлон намайг тал бүрээс нөмрөх бүрт би нүүр царайгаа Таны зүг хандуулж байдгийг миний Бурхан Та харж байгаа билээ. Хамаг амьтны Эзэн тэнгэр, нүдэнд үзэгдэгч, үл үзэгдэгч бүхний Эзэн минь, Таны зүг нүүр царайгаа хандуулахад нь чухам юу ч саад болж чадаагүй тэдгээр хүмүүсийн эгнээнд намайг багтаан оруулахыг хүмүүсийн зүрх сэтгэлийг эзэмдсэн Таны Алдар нэр, Таны энэрлийн Далайн давалгаа болон Таны буян хишгийн Үүрийн туяаны гайхамшгийг барин би хичээнгүйлэн гуйя, алдар нэрсийн Эзэн тэнгэр, диваажинг Бүтээн цогцлуулагч Та минь ээ.

Эзэн тэнгэр минь, Таны энэ цаг үед надад тохиосон зүйлсийг Та харж байгаа билээ. Таны алдар нэрсийн Эх булаг, Таны шинж чанарын Үүрийн гэгээ туяарах цэг болсон Түүний нэрийг барин гуйх минь: Танд үйлчлэхээр эгцлэн босч, Таны буяныг магтан мандуулахад минь туслах бүхнийг

надад заяаж хайрлана уу. Та бол үнэнхүү Хамгаас хүчит, Бүхнээс хүчирхэг бөгөөд бүх хүмүүсийн мөргөл залбиралд хариу өгдөг билээ!

Эцэст нь миний ажил хэргийг адислаж, миний өр төлбөрийг барагдуулж, миний хэрэгцээг хангаж өгөхийг гэрэл туяат дүрийг чинь барин

Танаас хичээнгүйлэн гуйнам би. Таны хүч чадал, эрх хэмжээг хэлтэй амтай бүхэн гэрчилж, Таны сүр хүч, цог жавхланг ойлгон ухаарах зүрх сэтгэлтэй бүхэн хүлээн зөвшөөрсөн билээ.

Бүхнийг сонсож, хариу өгөхөд бэлэн Танаас өөр Бурхан үгүй.

- Бахаулла

Таны хүч чадлыг бишрэн Танаас сөгдөн гуйя, Бурхан минь! Сорилт тулгарсан цагт надад зовлон хохирлыг бүү амсуулж, анхаарал болгоомжгүй байх цагт Өөрийн онгодоор алхаа гишгээг минь зөв замд оруулж өгнө үү. Та бол Бурхан бөгөөд хүссэн бүхнээ хийх чадалтай билээ. Таны Хүсэл тааллаас зайлах, Таны Зорилгоос зугатах хэн ч байхгүй.

- Баб

Эзэн тэнгэр минь! Та бол зовлон гуниг бүхнийг Гэтэлгэгч, саад бэрхшээл бүхнийг Сарниулагч билээ. Та уй гашууныг замхруулж, боол бүхнийг чөлөөлж, хүн бүрийг Тайтгаруулагч билээ. Эзэн тэнгэр минь! Өөрийн энэрэл нигүүлслээр намайг аварч, авралыг олсон Таны шадар зарц нарын эгнээнд намайг багтаан оруулахыг хүсье.

- Баб

Эзэн тэнгэр минь! Хүмүүс өвчин зовлонд хүрээлэгдэж, гай бэрхшээлээр дүүрэн байдгийг Та мэдэх билээ. Сорилт шалгуур бүр хүнийг дайрч, аймшигт гай зовлон бүр хорт могойн адил хүнд халдан довтолдог билээ. Гагцхүү Таны халамж хамгаалалт, нөмөр нөөлгийн далавчиндор хорогдохоос өөр аврал, өөр арга хүнд үгүй.

Энэрэлт Бурхан минь! Өөрийн хамгааллыг миний зэвсэг, Өөрийн өмгөөллийг миний бамбай, Таны нэг нэгдмэл чанарын үүд хаалганы өмнө даруу хүлцэнгүй байх сэтгэлийг минь миний хамгаалагч, Таны асран хамгаалах хүчийг миний хорогдох цайз, миний орон гэр болгож хайрлана уу. “Би” гэсэн үзэл болон

дур хүслийн өнгөлзлөгөөс намайг хамгаалж, өвчин зовлон, сорилт шалгуур, гай бэрхшээл бүхнээс намайг өмгөөлөн аварч хайрла.

Үнэнхүү Та бол Хамгаалагч, Асран тэтгэгч, Өмгөөлөгч, Хангагч бөгөөд үнэнхүү Та бол Хамгаас нигүүлсэгчдийн дундаас Хамгийн нигүүлсэнгүй нь билээ!

- Абдул - Баха

Эзэн минь! Бурхан минь! Гутарсан цагт нуугдах Орон минь, зовж шаналсан үед хамгаалах Бамбай, хоргодох Орон минь, хэрэгцээтэй үед Орогнох газар минь, ганцаардсан цагт Хань минь! Зовлон гунигийн цагт Тайтгаруулагч, цор ганцаараа байх цагт халамжит Анд нөхөр минь! Миний уй гашуу, зовлонг Арилгагч, миний гэм нүглийг Өршөөн хэлтрүүлэгч минь!

Таны тэнгэрлэг эв нэгдлийн энэ хүрдэнд Таны хүсэл зоригийг зөрчсөн бүхнээс намайг хамгаалж, ямар ч бузар буртаггүйгээр Таны гоо жавхлант модны сүүдэр дор суухад надад саад болох бүхий л бузраас ариусгаж өгөхийг хамаг зүрх сэтгэл, ухаан бодол, үг хэлээрээ Таңаас хичээнгүйлэн гуйж, зөвхөн Танд бүрнээ найднам би.

Ядуу дорой хүнд өршөөл үзүүлж, өвчтнийг анагааж, ундаассан хүний цангааг гаргаж хайрлаач, Эзэн тэнгэр минь!

Таны хайрын галаар бадамласан зүрх сэтгэлийг баясгаж, Таны тэнгэрлэг хайр сэтгэлийн галын дөлөөр мөнхүү зүрх сэтгэлийг гэрэлтүүлж хайрлагтун.

Ариун баринтагаар тэнгэрлэг эв нэгдлийн асрыг баринтаглаж, Өөрийн ивээл өршөөлийн титмийг тэргүүнд минь өмсүүлж хайрлана уу.

Өөрийн буян хишгийн гэрлээр миний царайг гэрэлтүүлж, Өөрийн ариун босгоны өмнө сөгдөхөд минь надад хайр ивээлээрээ тусалж хайрлана уу.

Таны бүтээсэн хамаг амьтныг хайрлах хайраар миний сэтгэлийг бялхуулж, Таны нигүүлсэнгүй сэтгэлийн шинж тэмдэг, Таны энэрэлт сэтгэлийн бэлэг дэмбэрэл, Таны хайрт шавь нарын дунд эв найрамдлыг бэхжүүлэгч, Таны алдрыг дурсагч, өөрийгөө мартаж, гагцхүү Таных гэсэн бүхнийг анхаарч явдаг хүн болгож өгөөч намайг.

Бурхан минь! Бурхан минь! Өөрийн өршөөл, буяны зөөлөн салхиа надаас бүү холдуулж, Өөрийн тусламж, ивээлийн булаг шанднаасаа намайг бүү тусгаарлаач.

Таны аврал, хамгааллын далавчин доорх нөмөрт үүрээ засахыг зөвшөөрч, хамгийг хамгаалагч мэлмийнхээ харцыг над дээр тусгаж хайрлана уу.

Хамаг амьтанд Таны алдар нэрийг шагшин магтаж байг гэж намайг хэлэмгий болгож хайрлана уу! Ингэснээр агуу чуулга хурлын үеэр дуу хоолойгоо дуурсгаж, амнаас минь Таныг магтах магтууны ундарга ундарч байх болтугай.

Та бол үнэндээ Гоо жавхлант, Алдар гавьяат, Хамгаас Хүчтэй, Хамгийг Чадагч нь гарцаагүй мөн билээ.

- Абдул-Баха

Таны алдар нэрийн хүч чадлаар өөрийгөө зэвсэглэсэн намайг юу ч хохироож үл чадна, Таны хайрыг зүрх сэтгэлдээ тээсэн намайг энэ ертөнцийн бүхий л гай зовлон нийлээд ч түгшээж үл чадна.

- Бахаулла

СУРГААЛ ТҮГЭЭХҮЙ

Эзэн минь, Бурхан минь, Таныхаа алдар нэрийг магтан дурсъя!

Миний харц Таны элэгсэг өршөөлийн зүг хандан, миний нүд Таны ивээлийн хаяа руу, Таны хайр энэрлийн зүг ширтээд миний гар Таны хишгийн диваажин өөд сунгасан байхыг үзэж байгаа. Таны хүч чадал намайг гэрчлэл! Миний бие, мөч бүр Таны зүг тэмүүлэн: “Ертөнц даяар хайрлагдсан Та, хурмаст тэнгэр, газар дэлхийн эзэн Та, Танд бүхнээ зориулсан зүрх сэтгэлийн ганц Мөрөөдөл минь! Диваажин хийгээд газар дэлхийн бүх оршин суугчдыг дуудсан Таны тэр Далайн нэрийг барин Таны зүг эргэн, эрэгт нь ойртоход саад учирсан тэр шадар зарц нартаа туслахыг Танаас сөхрөн гуйя. Бурхан минь, тэднийг Танаас өөр бүхнээс үл хамааралтай болгож, Таны магтууг дуурсгаж, Таны нандин чанарыг өргөмжлөн магтдаг болгож хайрла. Бурхан минь, тэдэнд Танаас өөр бүхнийг мартаж, Таны Үйл хэрэгт үйлчлэхээр босч, Таныг хайрлах сэтгэлдээ тууштай байхад нь туслах Өршөөлийнхөө сонгомол дарсаа хайрла. Та үнэнхүү тэдний амьдралын Эзэн, тэдний Бахдал билээ.

Хэрэв Та тэднийг орхивол хэн тэднийг харах юм бэ? Хэрэв тэд Танаас холдвол Танд ойртоход нь тэдэнд хэн туслах билээ? Би Таны хүч чадлаар тангараглая! Танаас өөр хорогдох газар үгүй, Таны нөмрөөс өөр эрэх нөмөр үгүй, Таны өмгөөллөөс өөр өмгөөлөл үгүй. Танаас өөрийг эзнээ болгосон тэр хүн хөөрхий, Таны газар дэлхийн бүх оршин суугчдаас өөрийгөө чөлөөлж, Таны хишиг ивээл дор хорогдсон хүн бүр буянаар дэлгэрнэ. Тэд нар бол хурмаст тэнгэр болон энэ дэлхийн бүх хүмүүсийн өмнө Баха-н хүмүүс мөн. Хамгаас хүчтэн, Хамгаас мэргэн Танаас өөр Бурхан үгүй. Бүх ертөнцийн Эзэн тэнгэр Бурханаа магтан өргөмжилье.

- Бахаулла

Бурхан минь, Бурхан минь! Далавч нь хугарсан энэ шувууны нислэг их удаан билээ. Хөгжил цэцэглэлт, авралын оргил өөд нисэн дүүлж, хязгааргүй орон зайд туйлын баяр баясгалан, аз жаргалтайгаар замаа жигүүрлэж, Таны эрхэм дээд Нэрээр өөрийн дуу хоолойг бүх газар дэлхийд дуурсгаж, хүмүүсийн сонорыг энэ дуудлагаар баясгаж,

удирдамжийг харан дагах мэлмийгээ баясгадаг болоход нь тусалж хайрла.

Эзэн минь! Би орь ганцаараа өнчин доорд нэгэн билээ. Танаас өөр түшиг нөмөр надад үгүй, Танаас өөр туслагч үгүй, Танаас өөр асран тэтгэгч үгүй. Танд үйлчлэх буяныг минь батжуулж, сахиулсан тэнгэрүүдийнхээ хүчээр надад тусалж, Таны Үгийг зарлан тунхаглахад минь ялгуусан болгож, амьтан бүхний дунд Таны ухаан билгийг магтан дуулахад минь тусла.

Та үнэнхүү үгээгүй доройд туслагч, өчүүхэн доордсыг хамгаалагч, Та үнэнхүү Хамгаас хүчирхэг, Бүхнээс хүчтэн, Хязгааргүй билээ!

- Абдул-Баха

Бурхан минь, Бурханы Үгийг өндөрт цуурайтуулан, худал хуурмаг бүхнийг үгүйсгэж, үнэнийг тогтоон, ариун шад мөрийг түгээн тархааж, гайхамшгийг нээн илрүүлж, сайн санаат хүмүүний зурх сэтгэлд өглөөний нарыг мандуулахад нь шадар зарцдаа тусалж хайрла.

Та үнэнхүү Нинжин сэтгэлт, Өршөөн хэлтрүүлэгч билээ.

- Абдул-Баха

Зүйрлэшгүй Бурхан тэнгэр минь!
Диваажингийн Эзэн тэнгэр минь!

Энэ хүмүүс болбоос Таны тэнгэрлэг цэргүүд, Тэдэнд ач тусаа хайрлаж, Эрхэм дээдийн Чуулганы хүч чадлаараа тэднийг ялгуусан болго. Чингэвээс тэдний хүн тус бүр бүхэл хороо цэрэг мэт болон үржиж, эдгээр орныг Бурханы хайр ивээл, тэнгэрлэг сургаалын гэрэл гэгээгээр байлдан дагуулах болно.

Бурхан минь! Зэрлэг онгон газар ч, уул хаданд ч, хөндий газар ч, ой хөвчид ч, тал цөлд ч, далай тэнгист ч тэднийг дэмжиж, тэдэнд тусалж, Хаант улсынхаа хүч чадал, Ариун Бишрэлийн амьсгалаараа уриалан дууддаг болтол тэдэнд итгэл хайрла!

Та үнэнхүү Хамгаас хүчтэй, Хамгаас чадалтай, Бүхнээс дээд, Мэргэн ухаантан, Бүхнийг сонсогч, Бүхнийг харагч билээ.

- Абдул-Баха

Бурхан минь, Бурхан минь! Ямагт хайр халамжтай, элэгсэг сэтгэлтэй байхад нь итгэлт шадар зарц нартаа тусал. Дэлхийн бүх улс үндэстнүүдийн дунд дээд ертөнцөөс гаралтай гэрэлт удирдамжийг дэлгэрүүлэхэд нь тэдэнд тусал. Та үнэнхүү Бүхнээс хүчтэй, Бүхнээс чадалтай, Бүхнийг

ээгнэгч, Ямагт өглөгч билээ. Та үнэнхүү
Нинжин сэтгэлт, Элэгсэг, Өгөөмөр,
Хамгийн ивээлтэн.

-Абдул-Баха

Бурхан минь, Бурхан минь! Итгэлт
шавь нартаа элэгсэг зөөлөн
сэтгэлийг хайрла. Тэдэнд газар дэлхийн бүх
ард түмний дунд дээдийн Чуулганаас
ундарч буй удирдамжийн гэрлийг түгээн
дэлгэрүүлэхэд нь тусалж хайрла. Та бол
Хүчирхэг, Хамгийг чадагч, Хамгаас хүчтэй,
Бүхнийг ивээгч, Хамгаас өгөөмөр билээ.
Үнэнхүү та бол Нинжин сэтгэлтэн, Эелдэг,
Элэгсэг зөөлөн, Бүхнээс буянтан билээ.

-Бахаулла

ТУСЛАМЖ

Бурхан минь ээ! Таны шадар зарц
нарын үйл хэргийг цэцэглүүлж, хот
тосгодыг хөгжүүлэн сүндэрлүүлэх үйлсэд
минь туслахыг Таны нэн гайхамшигт Алдар
нэрийг барин би хүсч байна. Та чухамхүү
•бүхнийг бүтээх чадалтай билээ!

- Бахаулла

Бурханаас өөр зовлон зүдгүүрийг
арилгагч байна уу? Бурхан тэнгэр
минь бадартугай! Тэрээр Бурхан билээ! Бүгд
Түүний шадар зарц билээ. Бүгд Түүний
үгийг дагадаг билээ!

-Баб

Хэлэгтүн: Бурхан хамаг бүхнийг
тэтгэдэг бөгөөд тэнгэр диваажинд
ч, газар дэлхий дээр ч Бурханаас өөр тэтгэгч
байхгүй. Үнэнхүү Тэрээр Өөрөө Бүхнийг
мэдэгч, Тэтгэгч, Хүчирхэг нь билээ.

-Баб

Эзэн минь! Бид өчүүхэн билээ. Бидэнд Өөрийн хишиг хайрлаж хүртээнэ үү. Бид ядуу. Өөрийн барагдашгүй эд баялгийн өчүүхэн хэсгээс бидэнд хүртээж хайрлана уу. Бидний хэрэгцээг хангаж хайрлана уу. Бид дорой. Өөрийн сүр жавхлангаас бидэнд хишиг хүртээж хайрлана уу. Агаарт нисдэг жигүүртэн, тал хээрийн араатан амьтад өдөр бүр Танаас идэш хүртэж, хамаг амьтан Таны хайр ивээл, халамжит сэтгэлд умбан байна.

Өөрийн гайхамшигт нигүүлсэнгүй сэтгэлээс өчүүхэн надад хайрлаж, бас өчүүхэн дорой надад Өөрийн хүч чадлаас хүртээж хайрлана уу!

Бидэнд өдөр тутмын талх хайрлаж, амьдралын хэрэгцээг арвижуулж хайрлана уу. Ингэснээр бид Танд, зөвхөн Танд л найдаж, Тантай харилцаж, Таны замаар замнаж, Таны шидэт суу билгийг зарлан тунхагладаг болохсон. Та бол Хамгийг чадагч, бүх хүн төрөлхтний Энэрэл хайр, тэдний хэрэгцээг Хангагч билээ.

-Абдул-Баха

Эзэн тэнгэр минь, Бурхан минь! Танд бат итгэл сүсэгтэй байж, Таны замаар

замнаж, Таны үйл хэрэгт хатуу үнэнч байхад нь хайрт шавь нартаа туслаач. Хувиа хичээх, шунах хүслээс татгалзаж, тэнгэрлэг сургаалын гэрлээр замнахад нь тэдэнд ивээлээ хайрла. Та болбоос Хамгаас хүчтэн, Хамгийг ивээгч, Дангаар оршигч, Тэтгэгч, Нигүүлсэгч, Хамгаас чадалтай, Хамгийг хайрлагч билээ.

-Абдул-Баха

"Ямар ч нөхцөлд тэвчээртэй байж, бүх итгэл найдвараа Бурханд даатга".

-Бахаулла

ТӨӨРӨЛДӨГСДӨД ЗОРИУЛСАН УДИРДАМЖ

Буруу замд орж, төөрөлдөж буй хүмүүст шударга, зөв бодолтой болоход нь нигүүлсэнгүй туслахыг, юунд анхаарал болгоомжгүй байж алдсаныг нь ойлгуулахыг бид Бурханаас хүсэн залбирна. Тэрээр чухамхүү Хамгийг ивээгч, Хамгийн өгөөмөр нь билээ.

Эзэн тэнгэр минь, шадар зарц нараа энэрлийнхээ үүд хаалганаас бүү тусгаарлаач, Өөрийн оршин буй өргөөнөөс тэднийг бүү зайлуулаач. Хоосон санаархлын манангаа сарниулахад нь, үр ашиггүй төсөөлөл найдварын бүрхүүлээ хуулан хаяхад нь тэдэнд туслаач. Та үнэнхүү Бүхнийг эзэмдэгч, Хамгийн дээд билээ. Хамгийн хүчтэн, Гоо жавхлант Танаас өөр Бурхан үгүй.

-Бахаулла

УУЛЗАЛТ ЦУГЛААН

Нигүүлсэнгүй, Хамгаас хүчит Бурхан минь! Энд хуран цугларагсад Таны зүг нүүр царайгаа хандуулж, залбиран гуйж байна. Тэд нар туйлын даруу хүлцэнгүй байдлаар Таны Хаант улсын зүг ширтэж, Таны өршөөн уучлах сэтгэлийг сөгдөн гуйж байна. Бурхан минь! Энэ хуран цугларагсдыг өрөвдөн хайрла. Тэдний сэтгэлийг ариутган, Өөрийн удирдамжийн гэрэл гэгээг тэдэнд хүртээ. Өөрийн баярт мэдээгээр тэдний зүрх сэтгэлийг гийгүүлэн, тэдний сүнс сүлдийг баясга. Тэд бүхнийг ариун гэгээн Хаант улсдаа хүлээн авч, тэдэнд шавхагдашгүй их буян хишгээсээ хайрлан, тэднийг энэ ба ирээдүйн ертөнцөд жаргалтай болгоно уу.

-Абдул-Баха

Бурхан минь! Бид үнэнхүү Таны хайрын анхилуун тансагийг мэдрэн энд хуран цугларлаа. Бид Таны Хаант улсын зүг хандлаа. Бид Танаас өөр юунд ч хандаагүй, бид Таны хүсэл таашаалаас өөр юуг ч хүсээгүй байна. Бурхан минь! Энэ зоогийг Таны тэнгэрээс заяасан идээ болгож, энэ цуглааныг Таны дээдсүүдийн

чуулган болгож хайрла. Тэд нар хүн төрөлхтнийг хайрлах эх үүсвэр болж, хүмүүн ардыг гэгээрүүлэх эх булаг болтугай. Тэд нар газар дэлхий дээр таны удирдамж сургаалыг хэрэгжүүлэх зэмсэг болтугай.

Та үнэнхүү Хүчтэн, Та Хишиг хайрлагч, Та Өршөөгч, Та Хамгийн хүчирхэг!

-Абдул-Баха

Тэнгэрлэг Зөн билигтэн минь! Таны гоо үзэсгэлэнд татагдан, Таны хайрын гал дөлөөр гийсэн Таны анд нөхдөөс энэ цуглаан бүрджээ. Энэ хүмүүсийг хурмастын сахиулсан элч нар болгож, Өөрийн Ариун Сүнсний амьсгалаар тэднийг сэргээн амьдруулна уу. Хэл яриаг нь цэцэн цэлмэг, зүрх сэтгэлийг нь шийдэмгий зоримог болгож, тэдэнд тэнгэрийн хүч чадал, энэрэн нигүүлсэх мэдрэмж хайрлаж, хүн төрөлхтний нэг нэгдмэлийг тунхаглагч, хүний энэ ертөнцөд хайр ивээл, эв эеийг дэлгэрүүлэгч болгож хайрлана уу. Тэгвэл мунхаг атгаг үзлийн харанхуй нь Үнэний Нарнаас цацрах туяагаар замхран гэгээрч, энэ гунигт ертөнц гийгэн гэрэлтэж, энэ биет орчлон сүнсний ертөнцийн цацрагийг шингээн авч, улмаар олон янзын өнгө нэг

болж, дуу магтууны уянга Таны ариун гэгээн Хаант улс хүртэл цуурайтах болно.

Үнэнхүү Та Бүхнээс хүчтэй, Хамгаас чадалтай билээ!

-Абдул-Баха

Хүмүүс аль нэгэн уулзалтын газар хуран цугларч, Бурханыг магтан мандуулж, Бурханы ид шидэт нууцын талаар хоорондоо хөөрөлдөн ярих бүрийд Ариун Сүнсний амьсгаа тэдний дээгүүр алгуурхан үлээж, хүн бүр түүнээс хувь хүртэх нь эргэлзээгүй.

-Абдул-Баха

ХАМГААЛАЛТ

Эзэн тэнгэр Бурхан минь, Таны алдар нэр бадартугай! Цаг хугацааг товлож, Сэхээрэлтийн үе мөчийг ирүүлж, газар дэлхий хийгээд тэнгэр диваажин дахь хамаг амьтныг айдас түгшүүрт автуулсан алдар нэрийг тань барин гуйх минь: Таны зүг хандаж, Таны Үйл хэрэгт тусалсан шадар зарц нарынхаа зүрх сэтгэлийг баясгах тэр зүйлийг өршөөлийнхөө тэнгэр, нигүүлсэнгүй зөөлөн сэтгэлийнхээ үүлэн дундаас хур бороо болгон илгээж хайрлана уу. Эзэн тэнгэр минь, шадар зарц, шадар шивэгчин нараа хоосон шохоорхол, дэмий төсөөллийн дайралтаас хамгаалж, ивээл хайрын мутраараа Өөрийн мэдлэг оюуны дөлгөөн ундаргын хувь хэмжээг тэдэнд хүртээж хайрла.

Та үнэнхүү Хамгаас хүчтэн, Хамгийн өргөмжит, Хэзээд өршөөнгүй, Хамгийн өгөөмөр билээ.

-Бахаулла

Аяа, тэнгэрлэг Зөн билигтэн минь! Бид өрөвдөлтэй, бидэнд Өөрийн тусламжийг хайрла. Орох оронгүй тэнүүлчин бидэнд орогнох байр олгож, тарж бутарсан биднийг нэгтгэж, төөрч будилсан

биднийг Өөрийн сүрэгт багтааж хайрлана уу. Хохирч гачигдсан бидэнд хувь тасалж өгнө үү. Цангасан биднийг Амьдралын булаг шанд руу хөтөлж аваачна уу. Таны Үйл хэрэгт тусалж, удирдамжийн замналд өөрсдийгөө амьд золиос болгохын тулд сул дорой биднийг бэхжүүлж хайрлана уу.

-Абдул-Баха

Тэрээр Бурхан билээ. Бурхан тэнгэр минь! Та бол дорой хүмүүст туслагч, ядуучуудыг тэтгэгч, арга тасарсан хүмүүсийн аврал билээ.

Би нэн хүлцэнгүйгээр Таны үзэсгэлэнт Хаант улсын зүг гараа сунган залбирч, дотоод сэтгэлийнхээ үгээр Таныг наминчлан ийнхүү хичээнгүйлэн гуйнам: Бурхан минь, Бурхан тэнгэр минь ээ! Таныгаа хайрлан бишрэхэд минь тусалж, Танд үйлчлэх бодь биеийг минь батжуул. Тандаа ёсчлон зүтгэхэд минь ивээлээ хайрлаж тусал, Танд туйлбартай дуулгавартай байлгаж, хайр хишгийнхээ элбэг хурыг миний дээрээс буулгаж, элэгсэг хайрынхаа харцыг миний зүг тусгаж, намайг өршөөлийнхөө далайд умбуул. Таны Шүтлэгт үнэнч байхад минь тусалж, үл эргэлзэх итгэлийн бүрэн дүүрэн хэмжээг

надад хайрла. Чингэвээс би ертөнцөөс бүрэн чөлөөлөгдөж, туйлын бишрэлээр Таны нүүр царайнд өөрийн нүүр царайг хандуулж, нотолгоо гэрчлэлийн хүч чадлаар батжиж, сүр хүчээр шингэж, хурмаст тэнгэр хийгээд газар дэлхийн аль ч хэсгийн хажуугаар өнгөрөн одно. Та үнэнхүү Энэрэнгүй, Гоо жавхлант, Нигүүлсэнгүй, Өрөвдөн хайрлагч билээ.

Эзэн тэнгэр минь! Эд нар бол амь биеэ золиосолсон баатрууд болон тэрхүү буянт хүмүүсийн дундаас амь гаран үлдэгсэд билээ. Тэд бүхий л зовлонг гэтлэн давж, шударга бус явдалтай тулгарахдаа тэвчээр гаргаж чадсан хүмүүс билээ. Тэд бүхий л амар тайван, элбэг дэлбэг амьдралаасаа татгалзан, Таны хайрын замналд аймшигт зовлон гачигдалд баяр баясгалантайгаар хүлцсэн бөгөөд одоо ч гэсэн дайснууддаа хоригдож, хатуу ширүүн тамлалд байнга тарчлан, Таны шулуун шударга замаар туйлбартай явсныхаа төлөө хавчигдсаар байна. Тэдэнд туслах хүн нэг ч үгүй, найзлан нөхөрлөх хүн нэг ч үгүй байна. Доорд, муу хүмүүсээс өөр хэн ч тэдэнтэй үл харьцаж байна.

Эзэн тэнгэр минь! Энэ хүмүүс энэ насныхаа амьдралд гашуун зовлонг амсаж,

Таны үзэсгэлэнт гэрэл царайг хайрлахын бэлэгдэл болгож, дарангуйлагчдын тэдэнд учруулсан элдэв доромжлолыг Таны тэнгэрлэг хаант улсад хүрэх тэмүүлээрээ тэвчиж өнгөрөөсөн билээ.

Эзэн тэнгэр минь! Тэнгэрлэг дэмжлэг, түргэн ялалтын тухай шад мөрөөр тэдний сонорыг баясгаж, аймшигт хүчний хавчлагаас тэднийг аварч хайрла. Тэд Таныг хайрлах сэтгэлдээ автаж, Таны ариун гэгээн чанарын нууцсыг хадгалж, Таны үүд хаалганы ёмнө даруу хүлцэнгүй зогсож, Таны өргөмжит оронд хүрч чадсан болохоор Та муу санаатны гарыг саатуулан барьж, улайрсан араатнуудын шүд, саварт тэднийг бүү хэлмэгдүүлээч.

Эзэн тэнгэр минь! Тэдний шинэ сэтгэл итгэлээр хүч нэмж хайрла. Шөнийн харанхуйд Таны гайхамшигт нотолгоог олж хартал тэдний мэлмийг гийгүүл. Өөрийн мөнхийн нууцсын хаант улсын элбэг буян бүхнийг тэдэнд хайрла. Тэднийг дэлхийн бүх газар нутгийг гийгүүлэгч од мичид, үүрийн гэгээний сэвэлзэх салхиар найгагч, үр жимсээр дүүрэн Бурханы мод, мөчир мэт болго.

Та үнэнхүү Хайр хишигтэн, Хүчтэн, Хамгаас хүчирхэг, Хязгааргүй эрх мэдэлт

билээ. Хамгаас гайхамшигт, Хэзээд өршөөнгүй, Хайр, элэгсэг халамжийн Бурхан Танаас өөр Бурхан үгүй.

-Абдул-Баха

Бурхан минь! Бурхан минь! Өөрийн шадар зарц нараа элдэв шунал, тачаангуй сэтгэлээс хамгаалаач. Өөрийн өгөөмөр сэтгэлийн мэлмийгээр шадар зарц нараа харж хандан, тэднийг хорт санаа, үзэн ядах явдал, атаа жөтөөнөөс хамгаалаач. Өөрийн хайр ивээлийн халдашгүй бат цайзанд тэднийг асрамжилж, эргэлзээ тээнэгэлзлийн манангаас хамгаалаач. Тэднийг өөрийн гайхамшигт үгийн илэрхийлэл болгож хайрлаач. Таны тэнгэрлэг эв нэгдлийн үүрийн туяанаас цацран гэгээрч байгаа туяагаар тэдний нүүр царайг гэрэлтүүлж хайрлаач. Таны ариун орноос сонсогдох үгээр тэдний зүрх сэтгэлийг баярлуулж, диваажингийн орноос гарч байгаа хамгийг чадагч хүч чадлаас тэдэнд хүч тэнхээ олгож хайрлаач.

Та бол Хамгийн Өгөөмөр, Бүхнийг Хамгаалагч, Төгс Хүчит, Бүгдийг Өршөөгч билээ.

-Абдул-Баха.

Тэрээр Нигүүлсэнгүй, хишигтэн билээ! Бурхан минь, Бурхан минь! Та намайг харж байгаа. Та намайг мэдэж байгаа. Та бол миний аврал, миний хорогдох цайз билээ. Танаас өөр би юуг ч эрээгүй, Танаас өөр юуг ч эрэхгүй. Таны хайрын замаас өөр зам руу би гишгээгүй, өөр замаар орох ч үгүй. Сэтгэл мухардлын харанхуй шөнө Таны хязгааргүй ивээлийн үүрийн туяа өөд би итгэл найдвар дүүрэн харцаа хандуулж, үүрийн гэгээ ирэх цагт Таныхаа үзэсгэлэн, төгс төгөлдөр шинжийг дурссанаар гутарсан сэтгэл маань сэргэж, хүч ордог юм. Таны халамжит ивээлийг хүртсэн хэн боловч өчүүхэн дусал төдий хэрнээ хязгааргүй далай мэт тэнүүн болж, Таны элэгсэг хайрын халамжийг хүртсэн атом чинээ өчүүхэн зүйл ч гэсэн гэрэлт од мэт гийх юм.

Цэвэр ариун Сүнс, Хамгаас буянт тэтгэгч Та Өөрийг тань бишрэх сэтгэлдээ дүрэлзэн ассан энэ шадар зарцаа хамгаалан халамжилна уу. Ахуйн энэ ертөнцөд Таны хайрд үнэнч тууштай байхад нь тусалж, далавч нь хугарсан энэ шувуухайг хурмастын модон дээр орших Өөрийн тэнгэрлэг үүрэнд орогнуулж хайрла.

-Абдул-Баха

Хэлэхтүн: Бурхан намайг гийгүүлэгч билээ, Тэрээр хамаг бүхний ертөнцийг Өөрийн гартаа атгадаг билээ. Тэнгэр диваажин хийгээд орчлон дэлхийд болон энэ хоёрын хоорондох зайнд оршигч Өөрийн сахиулсан тэнгэрүүдийнхээ хүчээр Тэрээр хүссэн шадар зарц болгоноо хамгаалдаг бөгөөд Бурхан бол үнэнхүү бүхнийг ажиглаж байдаг юм.

Эзэн тэнгэр минь, Та бол хэмжээлшгүй өргөмжит билээ! Бидний өмнө, хойно, дээр, баруун зүүн талд, хөлний маань дор ба бүх л зүгт орших муу бүхнээс биднийг хамгаална уу.

Та бүхнийг хамгаалах увдистай.

-Баб

ХУКУКУЛЛА

Хүн бүхний хандах Чиг, Бүтээлт орчлонгийн Эзэн тэнгэр Таны алдар бадартугай! Та Өөрийгөө тунхаглан нээж, Өөрийн шинж тэмдгийг илгээж, Өөрийн нотолгоог зарлан тунхагласан гэдгийг би дотоод болон гадаад хэлээрээ гэрчилнэм. Та чухамдаа Өөрөөсөө өөр бүхнээс тусгаар оршигч, газар дэлхийн бүх эд зүйлсээс ариуссан гэдгийг би гэрчилье. Таны Үйл Хэргийн харьшгүй сүр жавхлан бөгөөд Таны Үг айлдварын эрхэм дээд хүч чадлыг барин Танаас гуйх минь: Өөрийн Судар номонд өөрт нь захирамжилсан тэр зүйлийг өргөн барьж, Таны тааллын анхилуун үнэрийг ялгаруулах тэр зүйлийг даган мөрдөхийг хүссэн тэр хүмүүнд адис хишгээ хайрлана уу. Үнэнхүү Та бол Бүхнээс Хүчит, Бүхнээс Гоо жавхлант, Бүхнийг Өршөөгч, Хамгаас Өгөөмөр билээ.

-Бахаулла

Аяа, Зайн минь! Бурханы Сударт сийлэгдсэн зарлиг лүндэнг даган мөрддөг хүмүүс болбоос Бурханы мэлмийд хамгаас илүүд таашаагдана. Тэнгэрлэг зарлигийн хурмастаас илгээгдсэн бүхэн

болбоос Түүний мэргэн ухааны ач буян бөгөөд хүмүүсийн хамгийн эрхэм дээд ашиг сонирхолтой нийцэж байдаг гэдэгт эргэлзэх зүйл үгүй билээ. Үүнээс гадна дурдахад ч бэрх эдгээр өчүүхэн өргөл нь баяр баясал авчирна, учир нь гагцхүү Бурханы төлөө л төлөгдсөн байдаг. Хэрэв нэгхэн ширхэг будаа хандивласан байлаа ч энэ нь ертөнцийн бүхий л ургацын оройн дээд чимэг хэмээн тооцогддог.

-Бахаулла.

ХҮН ТӨРӨЛХТӨН

Энэрэлт Бурхан минь! Та хүн төрөлхтнийг нэгэн сүргээр бүтээсэн билээ. Хамаг амьтан ах дүүгийн барилдлагаатай байх ёстой хэмээн Та айлдан соёрхсон билээ. Таны ариун биеийн өмнө тэд Таны зарц бөгөөд хүн төрөлхтөн Таны цацар дор хорогдож байгаа билээ. Тансаг эд баялгаар бялхсан Таны ширээнд хамаг амьтан хуран цугларчээ. Таны ивээл хамаг амьтныг гийгүүлнэ.

Бурхан минь! Та хамаг амьтны өршөөл билээ. Та хамаг амьтныг хангагч, хамгаалагч билээ. Та хамаг амьтанд амьдрал хайрлагч билээ. Бас хүн бүрт авъяас чадвар хайрласан. Хамаг амьтан Таны нигүүлсэнгүй сэтгэлд умбан байна.

Энэрэлт Эзэн минь! Хамаг амьтныг нэгтгэ! Бүх шашин өөр хоорондоо зөвлөлдөж нэгдтүгэй. Улс үндэстнийг нэг нэгдмэл болгож хайрлана уу. Үүний ачаар хамаг амьтан өөрсдийгөө нэгэн гэр бүл, дэлхий ертөнцийг нэгэн гэр орон хэмээн ойлгох болно. Хамаг амьтан эгнэгт эв найртай хамтран аж төрөх болтугай.

Бурхан минь! Нэг нэгдмэл хүн төрөлхтний тугийг өндөрт өргөтүгэй.

Бурхан минь! Агуу их Амгалант тогтоотугай.

Бурхан минь! Хамаг амьтны сэтгэл санааг нэг нэгдмэл болготугай.

Энэрэлт Эцэг Бурхан минь! Өөрийн хайр ивээлээр бидний сэтгэл санааг баясгаж хайрлана уу. Өөрийн удирдамжийн гэрлээр бидний мэлмийг гийгүүлж хайрлана уу. Өөрийн тансаг үгээр бидний сонорыг баясгаж хайрлана уу. Өөрийн бат цайзанд хорогдуул.

Та Хамгийг чадагч. Хамгаас хүчтэй билээ. Та Хамгийг Өршөөгч билээ. Та хүн төрөлхтний алдаа дутагдлыг өршөөгч билээ.

-Абдул-Баха.

Бурхан минь! Бид дорой, бидэнд хүч тэнхээ хайрлана уу. Бид ядуу, бидэнд Өөрийн дундаршгүй эрдэнэсээс хишиг хайрлана уу. Бид өвчин эмгэгтэй. Биднийг тэнгэрлэг эмээрээ анагаана уу. Бид арчаагүй, бидэнд хурмастын хүч чадлаасаа өгөөч. Эзэн тэнгэр минь! Биднийг энэ ертөнцөд хэрэгцээтэй болгож, хувиа хичээх, шунах хүслээс ангижруулаач. Эзэн тэнгэр минь! Биднийг Өөрийн хайрд хатуу үнэнч болгож, бүхий л хүн төрөлхтнийг хайрладаг болгоно уу. Биднийг

хүн төрөлхтний тусын төлөө үйлчлэхэд маань батжуул. Үүний ачаар бид Таны шадар зарц нарын шадар зарц болж, хамаг амьтныг хайрлаж, Таны бүх хүн ардад нигүүлсэнгүй ханддаг болно. Эзэн тэнгэр минь! Та болбоос Хамгаас хүчирхэг билээ! Та бол Энэрэнгүй билээ! Та бол Өршөөнгүй билээ! Та бол Хязгааргүй хүчит билээ.

-Абдул-Баха

Миний шүтэж, гайхан магтдаг Бурхан минь! Би Таныг нэг нэгдмэл, цорын ганц хэмээн шүтэж, Таны өнгөрсөн ба өнөө үед илэрхийлсэн ид шидийг бишрэн шүтдэг билээ. Та хамгийг Хайрлагч билээ. Таны барагдашгүй хайр энэрэл, гайхамшигт буян хишгийг дээд, доод, дуулгавартай, дуулгаваргүй гэж ялгалгүй хүн бүхэн адилхан хүртэж ирлээ.

Энэрэл өршөөлийн Бурхан Таны өмнө энэрлийн мөн чанарт сөгдөн мэхийнэм. Таны Үйл хэргийн орд харшийг тойрон хайр халамжийн сүнс сүлд эргэлдэж байгаа билээ. Таны өнө эртний гоо жавхланг барин Таны ивээл хишгийг эрэлхийлэн ахуйн ертөнцийн илэрхийлэл болсон бүхэнд энэрэл нигүүлслээ хайрлаж, тэдэнд Өөрийн

энэ өдрүүдэд Өөрийн гоо жавхлангийн ундралаас бүү татгалзаач гэж гуйнам би.

Хамаг амьтан ядуу дорой, чадалгүй билээ. Чухам Та бол Бүхнийг эзэгнэгч, Хамгийг номхотгогч, Хамгийн хүчирхэг нь билээ.

-Бахаулла

Энэрэлт Бурхан минь, хамгаас өгөөмөр, чадварлаг Та минь! Бид Таны зөн билгийн сүүдэр дор орогнож буй Таны шадар зарц нар билээ. Өөрийн мэлмийн харцыг бидэн дээр тусгаж хайрлана уу. Бидэнд харах нүд, сонсох чих, ухааран тунгаах, хайрлан энэрэх зүрх сэтгэл хайрлаач. Өөрийн баярт мэдээгээр бидний сэтгэл санааг баясгаж хайрлаач. Эзэн тэнгэр минь! Биднийг Өөрийн вант улсын замналд чиглүүлж, Ариун Сүнсний амьсгалаар биднийг ариусгаж соёрхоно уу. Бидэнд мөнхийн амьдрал, хэзээ ч дуусахгүй алдар гавъяаг хүртээнэ үү. Хүн төрөлхтөнийг нэгтгэж, орчлон ертөнцийг гийгүүлнэ үү. Бид Таны замналаар замнаж, Таны хүсэл тааллыг хүсэмжилж, Таны орны нууцсыг нээхийг хүсэн мөрөөдөх болтугай. Бурхан минь! Биднийг нэгтгэж, бидний зүрх

сэтгэлийг Өөрийн уусашгүй холбоогоор холбож өгнө үү. Үнэнхүү Та бол Өгөөмөр өглөгч, Нинжин сэтгэлтэн бөгөөд Та Бүхнээс хүчит билээ.

-Бахаулла

Эзэн тэнгэр минь, Таныгаа магтъя!
Энэ нярай хүүхдийг Өөрийн элэгсэг ивээл, хайрлан халамжлагч хувь тохиолын шимээр ундаалж, Өөрийнхөө хурмастын модны үр жимсээр тэжээж хайрлана уу. Та түүнийг Өөрийнхөө эрхэм дээд хүсэл зориг, хүч чадлаараа бүтээж хүн болгосон болохоор Танаас өөр хэний ч халамжид оруулахгүй байлгаач. Танаас өөр Бурхан үгүй, Та Хамгийн хүчтэн, Бүхнийг мэдэгч билээ.

Хамгаас хайрладагч, магтаалт Эзэн Та далдын хишиг буяныхаа алт, ариун өглөгийнхөө анхилуун үнэрийг түүнд хүртээгээч. Алдар нэрс, шинж чанарын вант улсыг бүхэлд нь гартаа эзэмдэж буй Та Өөрийн хамгаас өргөмжит нэрийн сүүдэр дор хоргодох бололцоог түүнд олгож хайрлана уу. Та үнэнхүү хүссэнээ хийх чадалтай, үнэхээрийн Хүчтэн, Хамгаас өргөмжит, Хамгаас өршөөгч, Хамгаас үзэсгэлэнт, Хамгаас өгөөмөр, Нигүүлсэнгүй нь билээ.

- Бахаулла

Зүйрлэшгүй Эзэн тэнгэр минь! Энэ хөхүүл хүүхдийг Өөрийн хайр халамжийн сүүгээр тэтгэж, Өөрийн аюулгүй байдал, асрамжийн өлгий дотор харж хамгаалан элэгсэг хайрынхаа өвөрт өсгөж бойжуулаач.

-Абдул-Баха

Бурхан минь ээ! Энэ нярай хүүхдийг Өөрийн хайр ивэлээр бойжуулж хайрлана уу. Энэ нярай хүүхдийг Өөрийн өгөөмөр сэтгэлийн ариун сүүгээр тэтгэж хайрлана уу. Энэ балчир цэцгийг Өөрийн сарнайн цэцэрлэгт тордон, Өөрийн уужим сэтгэлээр ундаалж өсөн торниход нь тусалж хайрлана уу. Энэ хүүхдийг Өөрийн Хаант улсын иргэн болгож, диваажингийн оронд дагуулж оруулаач. Та бол Хамгаас хүчтэй, Хамгийн нинжин сэтгэлтэн нь билээ. Та бол Хамгийг хангагч, Хамгийн нигүүлсэнгүй, хязгааргүй хайр өгөөмрөөр дүүрэн Эзэн тэнгэр билээ.

- Абдул-Баха

Бурхан минь ээ! Та намайг удирдан чиглүүлж, хамгаалан хайрлаач. Та намайг гэрэл туяат дэнлүү, гялалзан

цацарсан од болгож хайрлана уу. Та бол
Хамгийг чадагч, Хамгаас хүчтэй нь билээ.

-Абдул-Баха

Бурхан минь ээ! Энэ хүүхдүүдийг
Эрдэм номтой болгож хайрлана уу.
Энэ хүүхдүүд бол Таны хүрээлэнгийн
ургамал, Таны бэлчээрийн цэцэг, Таны
цэцэрлэгийн сарнай билээ. Таны хур бороо
энэ хүүхдүүд дээр тусах болтугай. Бодит
үнэний Нар энэ хүүхдүүдийг ээх болтугай.
Таны зөөлөн салхи энэ хүүхдүүдийг үлээх
болтугай. Ингэснээр тэд боловсрон
хүмүүжиж, өсөн хөгжиж, хамгийн гоо
үзэсгэлэнг тольдох болтугай. Та бол Хишиг
хайрлагч, Энэрэнгүй билээ.

-Абдул-Баха

Элэгсэг Эзэн тэнгэр минь! Энэ
хөөрхөн хүүхдүүд Өөрийн тань хүч
чадлын үр бүтээл, Таны агуу гайхамшгийн
бэлэг тэмдэг.

Бурхан минь! Энэ хүүхдүүдийг
хамгаалж, боловсрол олоход нь ивээн
тусалж, ертөнцийн хүн төрөлхтний төлөө
үйлчлэхэд нь хүч чадал хайрлаач. Бурхан
минь! Энэ хүүхдүүд бол сувд эрдэнэс.

Тэднийг өөрийн хайр халамжийн
лавайнд бойжуулаач.

Та болбоос Хамгийн ивээлт, Бүхнийг
хайрлагч билээ.

-Абдул-Баха

Эзэн минь ээ! Эзэн минь ээ! Би бага
балчир хүүхэд билээ. Өөрийн
нигүүлсэнгүй сэтгэлийн цагаан сүүгээр
намайг тэжээж, Өөрийн хайрын өвөрт
бойжуулж, Өөрийн удирдлага дор эрдэм
номтой болгож, Өөрийн хишиг ивээлийн
сүүдэр дор намайг хөгжүүлж өгөхийг
гуйнам, би. Харанхуй мунхаг байдлаас
намайг аварч, туяарах гэрэл гэгээ болгож
хайрлана уу. Гуниг зовлонгоос намайг
ангигруулж, Өөрийн сарнайн цэцэрлэгт
цэцэг болгож хайрлана уу. Намайг Өөрийн
Босгоны шадар зарц болгож, надад үнэн
бодь хутгийг хайрлаж өгөөчээ. Намайг
хүмүүнлэг ертөнцөд хишиг буян хайрладаг
болгож, мөнх насны титмээ надад
хайрлаачээ.

Чухам Та бол Хамгаас хүчтэй, Хамгийг
чадагч, Бүхнийг харагч, Бүгдийг сонсогч
билээ.

-Абдул-Баха

Хамгаас гайхамшигт Эзэн минь!
Энэ бяцхан шадар зарц охиныг
адислан аз жаргал түүнд хайрлаач. Түүнийг
Өөрийн нэг нэгдмэл чанарын босгонд
ивээж, баяр хөөрөөр дүүрэн байж, анхилуун
үнэрийг бялхуулж яваасай хэмээн түүнд
Өөрийн хайрын аяганаас ханатлаа
амсуулаач. Та бол Хамгаас хүчтэй, Хамгаас
чадалтай. Та бол Бүхнийг мэдэгч, Бүхнийг
үзэгч билээ.

-Абдул-Баха

Бурхан тэнгэр минь би болбоос
Таны хөрсөнд суулгасан өчүүхэн
жижиг үр бөгөөд Таны буян хишгийн
мутраар цэцэглэн дэлбээлэх учиртай
бөлгөө. Тиймээс энэхүү үр Таны өршөөл
нишүүлслийн рашаан ус, Таны өгөөмөр
буян хишгийн оргилуун ундаргаас дотоод
ахуйдаа хүртэхийг туйлын ихээр хүсэмжлэн
байна. Таны ханлигийн хязгаарт Таны
нөмөр нөөлөгт ц эцэглэн дэлбээлэхэд минь
тусалж, Өөрийн өгөөмөр хайрын
диваажингаас түүнийгээ илгээж хайрлана
уу. Та чухамхүү тэрээр Таныг таньж мэдсэн
тэдгээр хүмүүсийн зүрх сэтгэлийг тэтгэж
Өөрийн амьдралын рашаан усны дээж,

яндашгүй арвин булгийн ундаргаасаа
ундаалсан бөлгөө.

Бүх хорвоо ертөнцийн Эзэн Бурхан
тэнгэрээ магтан өргөмжилье.

-Бахаулла

Тэрээр Бурхан билээ! Аяа Тэнгэрлэг
оршин тогтнол минь энэхүү
цуглааныг гэрэлтэн туяаруулах Үнэний
Нарны цацрагийг тусгаж хайрлана уу.

-Абдул-Баха

Зүйрлэшгүй Эзэн тэнгэр минь! Та бол
Энэхүү золгүй төөрөлдсөн сүнсийг
өршөөн хэлтрүүлэх нигүүлсэгч сайхан
сэтгэлт Багш нь билээ. Энэхүү дорой
хүүхдийг хамгаалах бамбай нь болж
хайрлана уу. Бид ашиг тусгүй ургамал хэдий
ч тэрээр Таны сарнайн цэцэрлэгт багтдаг
бөлгөө. Бид навчгүй, цэцэглэн дэлгэрдэг-
гүй зулзаган мод хэдий ч бид Таны жимсний
цэцэрлэгийн нэгээхэн хэсэг билээ.
Өөрийн оюун санааны ундаргын сэргээгч
сэвшээний охиор энэхүү зулзаган модыг
амилуулан сэргээж, Өөрийн уужим
сэтгэлийн өгөөмөр буян хишгийн хураар
энэхүү ургамлыг бойжуулж хайрлана уу.

Түүнийг анхаарал халамжтай, ажигч гярхай, уужим сэтгэлтэй нэгэн болгож, мөнхийн амьдралд хүрэхэд нь тусалж Өөрийн Ханлигт мөнх оруулж хайрлана уу.

-Абдул-Баха

ЗАЛУУС

Бурхан минь! Энэ залууг баясгалантай болгож, энэ хөөрхий амьтанд Өөрийн хишгээ хайрлаач. Түүнд эрдэм мэдлэг хүртээж, өглөө бүр хүч нэмж, ивээл хамгаалалтынхаа нөмөр дор хамгаалж хайрлаач. Чингэвээс тэрээр алдаа эндэгдлээс ангижирч, Таны Үйл хэрэгт өөрийгөө үнэнчээр зориулж, зөрүүдлэгчдийг зөв замд оруулж, азгүйчүүдийг удирдаж, хоригдогсдыг чөлөөлж, хайхрамжгүй назгайчуудыг сэрээж, тэд бүгдээр Таныг дурсаж, магтан өргөмжилдөг болоход нь тусалж чадна. Та бол Хамгийг чадагч, Хамгаас хүчтэй нь билээ.

-Абдул-Баха

ШӨНӨ ҮДЭШ

Бурхан минь ээ! Миний Эзэн, хүсэл мөрөөдлийн Зорилго минь ээ! Таны хайр ивээл дор нойрсож, Таны нигүүлсэнгүй сэтгэлийн тэнгэр дор амарч, Таны өгөөмөр сэтгэл, Таны өршөөлийг хүсэн хүлээж байнам, өчүүхэн зарц би.

Эзэн тэнгэр минь ээ! Та Өөрийн хэзээ ч аньдаггүй сэрүүн тунгалаг мэлмийгээр зөвхөн Таныг л хардаг болгож хайрлана уу. Миний харааг Таны бэлэг тэмдэг, Таны Үүдэл нээлтийн тэнгэрийн хаяаг олж харж чаддаг болгож хайрлана уу. Таны бүхнээс даван дийлэх хүч чадлын өмнө аливаа хүчний мөн чанар ч айн чичирнэ. Танаас өөр Бурхан байхгүй, Та бол Хамгийг чадагч, Хамгийг Эзэгнэгч, Хамгаас Төгс, Төгөлдөр нь билээ.

-Бахаулла

Бурхан минь, Бурхан тэнгэр минь, Таныг хүсэн мөрөөдсөн тэд танаас хагацсандаа унтаж чадахгүй сэрүүн байхад би яахан унтаж чадах билээ? Таныг хайрлан бишрэгчдийн зүрх сэтгэл Танаас

холдсондоо зовнин гутарч байхад би яахан амар тайван хэвтэж чадах билээ?

Эзэн тэнгэр минь, би Таны хүч чадал, Таны хамгаалалтын баруун гарт бүх бие, сэтгэлээ даатган, Таны хүч чадлаар дэрэн дээрээ хажуулан хэвтэж, Таны хүсэл зориг, тааллаар л өндийн босно. Та үнэнхүү Асран хамгаалагч, Бүхнээс хүчтэн, Хамгаас чадалтай.

Таны хүч чадлыг биширнэм! Би нойрондоо ч, сэрүүндээ ч, гагцхүү Таны хүссэнийг л хүснэ. Би бол Таны шадар зарц тул Таны мэдэлд байна. Таны хүсэл тааллын анхилуун үнэрийг цацрах тэр зүйлийг л хийхэд минь ивээл хишгээрээ тусалж хайрла. Энэ бол үнэхээр миний итгэл найдвар, Танд ойртсон хүмүүсийн итгэл найдвар. Хорвоо ертөнцийн эзэн Таныгаа магтан алдаршуулъя.

- Бахаулла

ШӨНӨ ДУНД

Аяа, Үнэнийг эрэлхийлэгч минь! Бурхан мэлмийг чинь нээгээсэй гэж хүсч байгаа бол шөнө дунд Бурхантай харилцаж, ийнхүү залбиран мөргө:

Эзэн тэнгэр минь, би Таны нэг нэгдмэл чанарын Хаант улсын зүг нүүрээ хандуулж, Таны энэрэл нигүүлслийн далайд умбалаа. Эзэн тэнгэр минь, энэ шөнийн харанхуйд Таны гэрэл гэгээг хардаг болгож миний мэлмийг гэрэлтүүлж, энэ гайхамшигт эрин үед хайр халамжийнхаа дарсаар намайг жаргалтай болго.

Эзэн тэнгэр минь, Таны дуудлагыг сонсоход минь тусалж, миний өмнө диваажингийнхаа үүдийг нээвэл би Таны цог жавхлангийн гэрлийг үзэж, Таны төгс үзэсгэлэнд татагдах болно. Та үнэнхүү Өглөгч, Өгөөмөр, Энэрэнгүй, Өршөөнгүй билээ.

- Абдул-Баха

ЭВ НЭГДЭЛ

*Эв нэгдлийн гэрэл гэгээ бүхий л газар дэлхийг
бүрхэж, “Хаант улс бол Бурханых” гэсэн
тамга хүн бүрийн магнайд тоддох болтугай.*

-Бахаулла

Бурхан минь! Бурхан минь! Өөрийн шадар зарц нарын санааг нэгтгэж, Өөрийн агуу зорилгын утга учрыг тэдэнд тайлж хайрлаач. Шадар зарц нар тань Таны зарлиг, сургаалыг чанд сахиж мөрдөх болтугай. Бурхан минь ээ! Тэдний үйл ажиллагааг дэмжиж, Таны үй.т хэргийг урагшлуулах үйлсэд тэдэнд хүч тэнхээ хайрлаач. Бурхан минь! Шадар зарц нараа бүү орхиоч. Тэдний алхаа гишгээг харин Өөрийн эрдэм мэдлэгийн гэрлээр удирдан чиглүүлж, хайр энэрлээр тэдний сэтгэл зүрхийг баясгаж хайрлана уу. Чухам та бол тэдний Өмөг түшиг, Эзэн хаан мөн билээ.

- Бахаулла

Бурхан минь, хүн төрөлхтөнд хүртээсэн хайрынхаа төлөө Таны алдар бадартугай! Бидний амь Амьдрал, Гэрэл гэгээ болсон Та шадар зарц нараа

Өөрийн замаар хөтөлж, Танаар баян байж, Танаас өөр бүхнээс чөлөөлөгдөхөд маань тусална уу.

Бурхан минь, Өөрийн нэг нэгдмэл чанарыг бидэнд сургаж, Өөрийн эв нэгдлийг биднээр дамжуулан хэрэгжүүлж, улмаар Танаас өөр юуг ч хардаггүй болгож хайрлана уу. Та болбоос Энэрэнгүй бөгөөд буян хишиг Хайрлагч билээ!

Бурхан минь, хайрт шавь нарынхаа зүрх сэтгэлд Өөрийн хайр энэрлийн галыг бадраагтун. Чингэвээс тэдний зүрх сэтгэл Танаас өөр юуны ч тухай бодолд үл автах болно.

Бурхан минь, хэзээд оршиж ирсэн, хэзээд ч орших Өөрийн өргөмжит мөнх чанараа, Танаас өөр Бурхан үгүй гэдгээ бидэнд нээгтүн. Чухамхүү Танаас л бид тайтгарал ба хүч тэнхээг шавхдаг билээ.

- Бахаулла

Эздийн Эзэн тэнгэр Та минь ээ! Та бол орчлон хорвоогийн Эзэн тэнгэр бөгөөд нүдэнд үзэгдэх ба үл үзэгдэх бүхний Соён гэгээрүүлэгч гэдгийг би гэрчилнэ. Таны эрх мэдэл бол бүх л гариг ертөнцийг бүрхэж байгаа тул газар дэлхийн эзэд Таныг

үгүйсгэж хэзээ ч үл чадах бөгөөд бүх улс
үндэстнүүд ба ард түмнүүд нийлээд ч
зорилгодоо хүрэхэд тань саад тотгор хийж
чадахгүй гэдгийг би бас гэрчилье. Бүхий л
ертөнцийг дахин амьдруулж, хүн ардуудын
эв нэгдлийг тогтоож, газар дэлхий дээр
орших амьд бүхнийг аврахаас өөр хүсэл
эрмэлзэл Танд үгүй гэдгийг би хүлээн
зөвшөөрье.

- Бахаулла

Эзэн минь! Хамгаас агуу энэ эрин
үед эцэг, эхийнхээ төлөө өршөөл
гуйсан үр хүүхдийнх нь залбирлыг Та
хүлээн авдаг билээ. Энэ нь энэхүү эрин үед
тохиосон онцгой буян хишиг билээ.
Иймээс элэгсэг Эзэн минь Та, хүү нь Танд
үйлчлэхээр босч, Таны хайрын замналд
үргэлжид хичээн чармайж байгаа тул хосгүй
Таны босгоны өмнө сөгдөн залбирсан энэхүү
шадар зарцынхаа хүсэлтийг болгоож,
эцгийг нь ивээл-ийнхээ далайд умбуулж
хайрлаач, Та үнэнхүү Өглөгч, Өршөөнгүй,
Элэгсэг сэтгэлтэн билээ!

- Абдул-Баха

ТУСГАЙ МӨРГӨЛҮҮД



АБДУЛ-БАХАГИЙН ЭРГЭЛТИЙН ИЛГЭЭЛТ

Энэхүү мөргөлийг Абдул-Бахагийн Бунханд уншдаг бөгөөд мөн хүн ганцаар байх үедээ уншиж болдог.

Абдул-Баха хэлэхдээ:

“Энэхүү мөргөлийг туйлын хүлцэнгүй, чин шударга тэмүүлэлтэйгээр унших аваас энэхүү Шадар зарцын зүрх сэтгэлд баяр баясгалан авчрах ба энэ нь Түүнтэй нүүр учран уулзах лугаа адил болно.” гэсэн юм.

Тэрээр Хамгаас гоо жавхлант билээ! Бурхан минь, Бурхан минь! Би хүлцэн залбирч, нулимсаа асгаруулан байж өөрийн гараа Таны зүг наминчлан сунгаж, эрдэм мэдлэгтний оюун билэг, Таныг магтан алдаршуулдаг бүхний магтуугаас ч агуу Таны Босгоны тоосонд нүүрээ булхуулж байна. Таны үүд хаалганы өмнө даруу хүлцэнгүй сөгдөж буй энэ шадар зарцаа хайр ивээлийнхээ харцаар харж, түүнийг Өөрийн мөнхийн ивээл хишгийнхээ Далайд умбуулж хайрлана уу.

Эзэн тэнгэр минь! Тэрээр Таны ядуу дорой нэгэн шадар зарц бөгөөд Таны сүр хүчинд татагдаж, Таныг хичээнгүйлэн

царайчилж, Таны гарт олзлогдож, Танд наминчлан залбирч, Танд итгэж, Таны өмнө нулимсаа асгаруулан Таныг дуудан ийнхүү хэлэн гуйж байна:

Эзэн тэнгэр минь, Бурхан минь! Таны хайрт шавь нарт үйлчлэхэд минь адис хишгээ хайрлаж, Танд хүчин зүтгэх үйлсэд минь хүч тэнхээ оруулж, Таны ариун гэгээн ордыг бишрэн шүтэх, Таны сүр жавхлангийн оронд залбиран мөргөх гэрэл гэгээгээр миний мэлмийг гийгүүлж хайрлаач. Таны хурмастын үүд хаалганы өмнө биеэ огоороход минь тусалж, Таны ариун орчлон дахь бүхий л зүйлсээс ангижрахад минь надад ивээлээ хайрлаач. Эзэн тэнгэр минь! Биеэ огоорох буяны бумбанаас надад хишиг хайрлаж, эл буяны баринтгаар намайг баринтаглаж, эл буяны тэнгис далайд намайг умбуулж хайрлана уу. Намайг Өөрийн хайрт шавь нарын алхах замд тоос болгож, Хамгаас Алдарт Эзэн тэнгэр Таны замналд Таны сонгомол шавь нарын хөл гишгэсэн газар шороонд өөрийн сэтгэлийг өргөл болон зориулахад минь адис ивээлээ хайрла.

Таны шадар зарц ийнхүү мөргөн үүрийн гэгээнээр, мөн үдшийн

бүрийгээр Танд хандан залбирнам. Түүний зүрх сэтгэлийн хүсэл мөрөөдлийг биелүүлж хайрла, Эзэн тэнгэр минь! Түүний зүрх сэтгэлийг гийгүүлж, цээжийг баясгаж, гэрэл гэгээг нь асааж, Таны Үйл хэрэг болоод Таны шадар зарц нарт үйлчлэхэд нь тусалж хайрла.

Та бол Хишиг хайрлагч, Өрөвдөгч, Хамгаас буян хишигт, Гоо жавхлант, Энэрэнгүй, Нигүүлсэнгүй билээ!

- Абдул-Баха

АХМААДАД ИЛГЭЭСЭН ИЛГЭЭЛТ

Уг илгээлт бичигт Бахаулла онцгой ач холбогдол, хүч уддисыг шингээжээ.

Тэрээр бүхний Хаан эзэн, Бүхнийг мэдэгч, Мэргэн ухаантан билээ!

Зэ, Диваажингийн гургалдай мөнхийн модны мөчир дээр суугаад ариун уянгалаг хоолойгоороо жиргэн, чин шударга сүсэгтнүүддээ Бурхан тэнгэрт ойртох баярт хаялагыг зөгнөн зарлаж, Тэнгэрлэг Эв нэгдэлд итгэгч сүсэгтнүүдийг нигүүлсэнгүй Эзний заларсан орд руу дуудан, Бурхан Хаан эзэн, Агуу гайхамшигт, Зүйрлэшгүй Түүний нээсэн сургаалыг Бурханаас холдогсдод таниулан, хайрлан бишрэгчдийг ариун ордны суудал хийгээд энэхүү төгс үзэсгэлэнгийн зүг хөтлөн дуудаж байна.

Энэ бол Элч нарын судруудад урьдчилан хэлсэн тэрхүү Үнэхээрийн Агуу төгс Үзэсгэлэн бөгөөд Тэрээр элч нараар дамжуулан үнэнийг андуурлаас ялган салгаж, бүх зарлиг лүндэнгийн суу билгийг шалган тогтоох болно. Чухамхүү Тэрээр Тэнгэрлэг Хамгаас өргөмжит, Хамгаас хүчтэй, Хамгаас агуу Бурханы үр жимсийг соёолуулагч үнэнхүү Амьдралын Мод мөн.

Аяа, Ахмаад аа! Тэрээр Хаан эзэн, Авран тэтгэгч, Зүйрлэшгүй, Бүхнээс хүчтэн Бурхан гэдгийн, Түүнээс өөр Бурхан үгүй гэдгийн гэрч болон соёрх. Али нэрээр Түүний илгээсэн Нэгэн бол Бурханаас ирсэн Элч бөгөөд Түүний зарлигийг бид бүгдээр дагана.

Хэлэгтүн: Аяа, Хүмүүс ээ, Агуу гайхамшигт, Ухаант мэргэн Түүний “Баяан”-д буулгасан Бурханы зарлигуудыг дагацгаа, Тэрээр, үнэнхүү, Элч нарын Хаан бөгөөд Түүний Судар бол Эх Судар болохыг та нар мэдэх билээ.

Гургалдай энэ шоронгоос та бүхэнд Түүний уриаг ийнхүү дамжуулж байна. Энэ тод тодорхой захиасыг Тэрээр авчрах ёстой юм. Хэн хүссэн нь энэ зөвлөгөөг ойшоохгүй байж болно, харин хэн хүссэн нь Эзэн тэнгэртээ хүрэх замыг сонгог.

Аяа, хүмүүс ээ, энэ мөрүүдийг үгүйсгэх юм бол ямар сүсгээр Бурханд итгэх болсон юм бэ? Түүнээ нотло, хуурамч сэтгэлтний цуглаан минь ээ.

Үгүй ээ, Миний сэтгэлийг эзэмдэгчийн нэрийн өмнөөс хэлэхэд тэд нар бие биенийгээ дэмжин нэгдлээ ч тэдэнд нотлох чадвар байхгүй, хэзээ ч чадахгүй. Ахмаад аа! Миний ивээл хишгийг Миний эзгүйд бүү

март. Миний өдрүүд, энэхүү алслагдсан гянданд амссан зовлон гунигийг өөрийнхөө энэ цаг үед ямагт санаж яв. Дайсны илд дээрээс чинь буусан, хурмаст дэлхий тэр аяараа чиний эсрэг хандсан ч Миний хайрд өчүүхэн ч эргэлзэхгүй хатуу зогс.

Миний дайснуудын эсрэг галын дөл, Миний хайрлан хүндэтгэдэг хүмүүсийн хувьд мөнх амьдралын ундарга болж яв, хэзээ ч бүү эргэлз.

Хэрэв чи Миний заасан замд зовж зүдрэх юм уу, Миний төлөө нэр хүндээ алдвал түүндээ бүү гутар. Өөрийн ба өвөг дээдсийнхээ эзэн Бурхан тэнгэртээ найдан итгэ. Хүмүүс Бурханыг нүдээрээ үзэж харах юмуу, дууг нь чихээрээ сонсох боломжгүйдээ буруу замаар төөрөгдөлд ордог юм. Үүнийг Бид ийнхүү олж мэдсэнийг бас та мөн гэрчлэх буюу.

Ингэснээр тэдний сэжиг төөрөгдөл нь тэд болон тэдний зүрх сэтгэлийн хооронд бүрхэвч болж тэднийг Тэнгэрлэг, Агуу Бурхан тэнгэрийн замаас холдуулдаг юм. Энэ гоо үзэсгэлэнгээс ухрагсад өнгөрсөн цагийн Элч нараас мөн ухарч, мөнхийн мөнхөд Бурханы өөдөөс бардамнасан гэдэгт эргэлзээгүй итгэ.

Ахмаад аа! Энэ илгээлтийг сайн сур. Өөрийн өдрүүдэд үүнийг уянгалуулан дуулж, үүнээс бүү сал. Учир нь уянгалуулан дуулсан хүнд зуун баатрын шагнал болон энэ ба хойд насны буяныг хүртээхийг Бурхан зарлиг болгосон юм. Энэ ивээлийг Бид танд Бидний талаас хайр хишиг болгон хүртээж байгааг минь талархан хүлээн авч соёрхоно биз дээ.

Бурханы нэрийг барин өчсү! Зовлон гутралд автсан хэн боловч энэхүү илгээлтийг үнэн сэтгэлээсээ унших аваас Бурхан түүнийг гуниг гутралаас нь салгаж, зовлон бэрхшээлээс нь ангижруулах болно.

Чухамхүү, Тэрээр Нигүүлсэнгүй, Өршөөлт эзэн билээ. Бүх хорвоо ертөнцийн эзэн Бурхан Тэнгэрээ магтан өргөмжилье.

- Бахаулла

БАХАУЛЛАГИЙН ЭРГЭЛТИЙН ИЛГЭЭЛТ

Энэхүү Илгээлт бичгийг Бахаулла, Баб нарын Бунханд унших бөгөөд Тэдний ойг тэмдэглэхэд бас уншина.

Таны хамгаас сүр жавхаат Биеэс ундрэн гарсан магтаал, Таны хамгаас гялбам Гоо үзэсгэлэнгээс үүсэн бий болсон алдар гавъяа нь Танаа орших болтугай, Сүр жавхлангийн Тодруулал, Өнө мөнхийн Хаан, тэнгэр диваажин ба газар дэлхий дээр орших бүхний Эзэн тэнгэр Та минь ээ! Таны ач буянаар Бурханы сүр хүч ба ноёрхол Бурханы ид шид ба сүр жавхлан нээн тодорч, өнө эртний цог жавхлангийн Үүрийн туяа Таны няцаашгүй зарлигийн тэнгэрт гэрэл гэгээгээ цацруулж, Үл үзэгдэх орны Гоо үзэсгэлэн орчлон хорвоогийн тэнгэрийн хаяагаар цухуйн гарсан гэдгийг би гэрчилнэм. Түүнчлэн Таны Бийрийн ганцхан хөдөлгөөнөөр “Бий бологтун” хэмээсэн Таны зарлиг сийлэгдэж, Бурханы нуугдмал Нууц нээгдэж, хамаг амьтан амилан төрж, бүхий л Үүдэл нээлт тэнгэрээс илгээгдсэн болой гэдгийг би гэрчилнэм.

Үүнээс гадна Таны гоо үзэсгэлэнгийн ачаар Хайр бишрэл болсон Нэгний гоо үзэсгэлэн нээгдэж, Таны дүр царайны ачаар Хүсэл мөрөөдөл болсон Нэгний дүр царай тодорч, Таны нэгхэн үгийн ачаар Та хамаг амьтдыг ялган салгаж, Танд үнэнч заримыг нь алдрын оргилд аваачиж, харин мунхаг заримыг нь хамгийн доод ёроолд живүүлсэн билээ гэдгийг би бас гэрчилнэм.

Таныг таньж мэдсэн хэн боловч Бурханыг таньж мэдсэн, Таны ахуйд ойртсон хэн боловч Бурханы ахуйд ойртсон гэдгийг би гэрчилнэм. Тиймээс Танд болон Таны бэлэг тэмдэгт итгэж, Таны сүр хүчний өмнө хүлцэн сөгдөж, Тантай учрах аз гавъяаг хүртэж, Таны хүсэл таашаалыг хүлээж, Таныг тойрон хүрээлж, Таны сэнтийн өмнө зогссон тэр хүмүүн агуу их адистат билээ. Харин Таны эсрэг нүгэл үйлдэж, Таныг үгүйсгэж, Таны шинж тэмдэг болон Таны сүр хүчийг няцааж, Таны эсрэг босч, Таны дүр царайны өмнө бардам сэхлүүн зан гаргаж, Таны гэрчлэл нотолгоотой маргаж, Таны хууль болон Таны ноёрхлоос зугатаж, улмаар Таны зарлигийн мутраар Таны ариун Илгээлт

бичгүүдэд нэр нь сийлэгдсэн буруу номтнуудын тоонд орсон тэр хүмүүнийг гэсгээх болтугай.

Бурхан минь, миний Хайр бишрэл болсон Бурхан минь, Өөрийн хайр энэрлийн баруун мутраараа Өөрийн хишиг ивээлийн ариун сэвшээг над руу чиглүүлж хайрлана уу. Чингэвээс тэр ариун сэвшээ намайг өөрөөс минь болоод дэлхий ертөнцөөс холдуулж, Таны ахуй хийгээд Танд ойр байх орд руу намайг хөтлөн аваачих болмой. Та хүссэнээ бүтээх чадалтай билээ. Та үнэнхүү хамаг бүхнээс агуу эрхэм нандин билээ.

Бурханы дурсах дурсамж болон Түүнийг магтах магтуу, Бурханы Алдар болон Түүний Сүр жавхлан чухам Танаа орших болтугай, Түүний Гоо үзэсгэлэн болсон Та минь ээ! Орчлон хорвоогийн мэлмий Тань шиг ийм хэлмэгдсэн хүмүүнийг хэзээ ч үзэж байгаагүй гэдгийг би гэрчилье. Та амьдралынхаа бүхий л хугацаанд зовлон зүдгүүрийн далайд умбаж байсан билээ. Нэг үе Та гинж гаванд дөнгөлүүлж, бас нэг үе Та дайснуудынхаа илдэн дор аюулд учирч байсан билээ. Гэсэн ч энэ бүхнийг Та эс

тоон Бүхнийг мэдэгч, Бүхнээс мэргэн Түүний Танд зориулан зарлиг болгосон бүхнийг даган мөрдөхийг бүх хүмүүст үүрэг болгосон билээ.

Миний сүнс сүлд Таны амссан гай зовлонгийн төлөө золиос болж, миний сэтгэл Таны тэвчин өнгөрүүлсэн зовлон шаналал бүхний төлөө өргөл болтугай. Таны гэрэлт дүр царайны гоо жавхланд гялбан нүүр царай нь гийн Танд зориулсан хайрынхаа бэлэг тэмдэг болгож Таны зарлиг болгосон бүхнийг даган мөрдсөн тэд болон Таны нэрийг барин Таны шадар зарц нарыг Танаас тусгаарласан тэр гивлүүрийг хуулан хаяж, надад энэ болоод ирэх ертөнцийн сайн сайхан буяныг хайрлахыг Бурханаас гуйнам би. Та бол үнэнхүү Хүчирхэг, Хамгаас өргөмжит, хамгаас Гоо жавхлант, Хэзээд өршөөнгүй, Хамгаас Нигүүлсэнгүй нь билээ.

Бурхан минь, Эзэн тэнгэр минь, Таны нэн гайхамшигт алдар нэр болон Таны нэн ариун шинж чанар энэ орчлонд оршсоор байсан цагт Тэнгэрлэг Мод болон түүний навч, мөчир, салаа, иш, нахиаг адислаж хайрлана уу. Түүнийг харгислагч, дарангуйлагчдын хорт үйлдлээс хамгаална

уу. Та бол үнэнхүү Хүчирхэг, Хамгаас
Чадалтай билээ. Эзэн тэнгэр Бурхан минь,
Танд ойртсон Өөрийн шадар зарц нар болон
шадар шивэгчин нараас мөн адислаж
хайрлана уу. Та бол үнэнхүү Хамгаас буян
хишигт бөгөөд Таны ивээл хишиг
хязгааргүй их билээ. Хэзээд өршөөнгүй,
Хамгаас өгөөмөр Танаас өөр Бурхан үгүй.

-Бахаулла

Бурхан намайг тэтгэгч билээ. Тэрээр
үнэнхүү Бүхнийг тэтгэгч билээ!
Итгэгч хүмүүн Түүнд л итгэх болтугай.

-Бахаулла

(Тегераны "Сиях-Чал"-д хоригдож байсан
Бабын дагалдагч нарын дуулдаг байсан мөргөл)

ГАЛЫН ИЛГЭЭЛТ

(Бахауллагийн туурвисан "Кад-
Ихтаракал-Мухлисун" хэмээх илгээлт бичиг)

Хамгаас эртний, Хамгаас агуу
Бурханы нэрээр өчсү.

Чин шударга сэтгэлтний зүрх
хагацлын галд шатаж байна.

Хорвоо ертөнцийн Хайр бишрэл Таны Дүр
царайны гэрлийн гялбаа хаа байна?

Танд ойр бараа бологсод ганцаардлын
харанхуйд орхигдлоо.

Хорвоо ертөнцийн Хүслэн Таны дахин
нээгдэхийн өглөөний гэгээ хаа байна?

Таны сонгосон шавь нарын бие цогцос
алс холын элсэн цөлд дагжин чичирч
байна.

Хорвоо ертөнцийн хүслийг булаагч Таны
ивээлийн далай хаа байна?

Таны өгөөмөр хишгийн тэнгэр өөд
хүмүүс гараа тосон залбирч байна.

Хорвоо ертөнцийн хүслийг Хариулагч
Таны буян хишгийн хур бороо хаа байна?

Буруу номтны дарангуйлал газар бүхэнд даварч байна.

Хорвоо ертөнцийг байлдан дагуулагч Таны зарлиг лүндэн буулгах бийрийн давагдашгүй хүч чадал хаа байна?

Нохойн хуцах дуу зүг бүрт чанга байна.

Хорвоо ертөнцийг Зэмлэгч Таны хүч чадлын ой шугуйд орших арслан хаа байна?

Бүх хүн төрөлхтнийг хүйтэн цэвдэг нөмөрлөө.

Хорвоо ертөнцийн Гал дөл Таны хайр ивээлийн илч дулаан хаа байна?

Гай гамшиг оргилдоо хүрлээ.

Хорвоо ертөнцийн Аврал Таны тусламж тэтгэлгийн шинж тэмдэг хаа байна?

Ихэнх ард түмнүүдийг харанхуй бүрхэн авлаа.

Хорвоо ертөнцийн Гэрэл гэгээ Таны сүр жавхлангийн цацраг хаа байна?

Хүмүүсийн хорон санааны хүзүү урт сунасан байна.

Хорвоо ертөнцийг Устгагч Таны өшөө хорслын илд тань хаа байна?

Доромжлол гутамшиг ёроолдоо хүртэл дордлоо.

Хорвоо ертөнцийн Алдар Таны бэлэгдэл тэмдэг хаа байна?

Хамгаас Энэрэлт Таны Алдар нэрийг Нээгчдэд гай зовлон тохиолоо.

Хорвоо ертөнцийн Баясал Таны Үүдэл нээлтийн Үүрийн туяаны баяр баясгалан хаа байна?

Газар дэлхийн бүх хүн ард гуниг гутралд автлаа.

Хорвоо ертөнцийн Баяр баясгалан Таны баяр цэнгэлийн туг далбаа хаа байна?

Таны шинж тэмдгийн Үүрийн цолмон гэгээрэх газар муу санаатны шивнээнд автан далдлагдсан байхыг Та үзэж байгаа билээ.

Хорвоо ертөнцийн Хүч чадал Таны хучит мутар хаа байна?

Бүх хүмүүс туйлын их цангаж байна.

Хорвоо ертөнцийн Энэрэл Таны буян хишгийн мөрөн гол хаа байна?

Бүх хүн төрөлхтөн шуналын боол боллоо.
*Хорвоо ертөнцийн Эзэн Таны огоорлын
илэрхийлэл хаа байна?*

Энэхүү Хэлмэгдсэн Хүмүүн цөллө-
гөндөө ганцаардсан буйг Та харж байна.
*Хорвоо ертөнцийг Эзээнэгч Таны Зарлиг
лүндэний тэнгэрийн элч нар хаа байна?*

Би харийн нутагт цөлөгдлөө.
*Хорвоо ертөнцийн Итгэл Таны үнэнч
итгэлийн бэлэг тэмдэг хаа байна?*

Үхлийн зовлон бүх хүнийг эзэмдэн
авлаа.
*Хорвоо ертөнцийн Амьдрал Таны
мөнхийн амьдралын далайн давалгаа хаа
байна?*

Амьтан бүхэн ад шулмын шивнээг
хүртжээ.
*Хорвоо ертөнцийн Гэрэл гэгээ Таны галт
солир хаа байна?*

Шунал тачаалын мансууралд ихэнх
хүн төрөлхтөн бууж өгчээ.
*Хорвоо ертөнцийн Хүслэн Таны ариун
нандин чанарын булаг шанд хаа байна?*

Энэхүү Хэлмэгдсэн Хүмүүн сиричүүд-
ийн дунд дарлал мөлжлөгт автан буйг Та
харж байна.

*Хорвоо ертөнцийн Гэрэл гэгээ Таны
үүрийн гэгээ хаа байна?*

Та Надад үгээ хэлэхийг минь
хориглолоо.

*Хорвоо ертөнцийн Гургалдай Таны
уянгат аялгуу тэгсвэл чухам хаанаас ундрах
юм бэ?*

Ихэнх хүмүүс дэмий хоосон
төсөөлөлдөө умбасан байна.

*Хорвоо ертөнцийн Баталгаа Таны үл
эргэлзэхүйн тайлбар хаа байна?*

Бахайчууд зовлон зүдгүүрийн тэнгис
далайд живж байна.

*Хорвоо ертөнцийг Аврагч Таны авралын
Хөлөг хаа байна?*

Таны айлдварын Үүрийн цолмон
орчлон хорвоогийн харанхуйд байгааг Та
харж байна.

*Хорвоо ертөнцөд Гэрэл гэгээ хайрлагч
Таны буян хишгийн тэнгэр дэх наран хаа
байна?*

Үнэн, ариун нандин, үнэнч чанар, нэр төрийн гэрэлт дэнлүү унтарчээ.

Хорвоо ертөнцийг Хөдөлгөгч Таны хорсол гэгсгээлтийн шинж тэмдэг хаа байна?

Таныг өмгөөлөн хамгаалсан юмуу эсвэл Таны хайрын замналд Түүнд тохиосон бүхнийг эргэцүүлэн бодож байгаа нэг ч хүнийг Та харахгүй байна гэж үү?

Миний бийр одоо бичихээ болилоо, хорвоо ертөнцийн Бишрэл минь.

Тэнгэрлэг Модны мөчрүүд хувь заяаны шуурганд хугаран газар унасан харагдана.

Хорвоо ертөнцийн Аварга Таны тусламж тэтгэлгийн далбаа хаа байна?

Энэхүү Нүүр царай гүжир гүтгэлгийн тоос шороонд булхан далдлагдлаа.

Хорвоо ертөнцийн Энэрэл Таны нигүүлслийн сэвшээ хаа байна?

Хууран мэхлэгч хүмүүс ариун гэгээн чанарын өмсгөлийг бузартууллаа.

Хорвоо ертөнцийг Чимэглэгч Таны ариун гэгээн баринтаг тань хаа байна?

Хүмүүсийн гараар үйлдсэн бүхний гайгаар ивээл хишгийн далай номхорлоо.

Хорвоо ертөнцийн Хүслэн Таны буян хишгийн давалгаа хаа байна?

Тэнгэрлэг Ахуйн оронд хөтлөх зам Таны дайснуудын дарангуйллын гайгаар хаагдлаа.

Хорвоо ертөнцийн түгжээг Нээгч Таны хишиг буяны түлхүүр хаа байна?

Өдөөн хатгалгын хорт салхинд навчис шарлалаа.

Хорвоо ертөнцөд буян хайрлагч Таны буян хишгийн үүлнээс буух хур бороо хаа байна?

Ертөнц даяараа нүглийн тоос тортогт дарагдан харанхуйлагдлаа.

Хорвоо ертөнцийг Өршөөгч Таны өршөөлийн сэвшээ хаа байна?

Энэхүү Залуу алс холын газар ганцаардаж байна.

Хорвоо ертөнцөд хишиг хайрлагч Таны хурмастын ивээл хишгийн хур бороо хаа байна?

Аяа, Эрхэм дээд Бийр минь, Бид Таны хамгаас уянгалаг дуудлагыг мөнхийн орондоо сонслоо.

Хорвоо ертөнцөд Хэлмэгдсэн Та Сүр жавхлангийн Хэлээр айлдах Түүний айлдлыг чих тавин сонсогтун!

Хэрэв хүйтэн гэж байгаагүйсэн бол
Хорвоо ертөнцийн Айлдагч Таны үг айлдарын халуун элч хэрхэн давамгайлах байсан билээ?

Хэрэв гай гамшиг гэж байгаагүйсэн бол
Хорвоо ертөнцийн Гэрэл гэгээ Таны тэсвэр тэвчээрийн наран хэрхэн мандах байсан билээ?

Муу санаатны улмаас бүү гуниглан гутар.
Та болбоос бүхнийг тэвчин өнгөрүүлэх
увдистайгаар бүтээгдсэн билээ, хорвоо
ертөнцийн Тэвчээр минь.

Өдөөн хатгагчдын харанхуйн дунд
Гэрээсийн тэнгэрийн хаяагаар үүрийн
цолмон болон гэгээрсэн Таны гэрэл
болон Бурханыг мөрөөссөн Таны
мөрөөдөл юутай гайхамшигтай байсан
билээ, хорвоо ертөнцийн Хайр минь.

Таны ач буянаар тусгаар тогтнолын туг
далбаа хамгийн өндөр оргил дээр
зоогдож, буян хишгийн тэнгис далай
давалгаалсан билээ, хорвоо ертөнцийн
сэтгэлийг булаагч минь.

Таны ганцаардлын ачаар Нэг нэгдмэл
чанарын Наран гийж, Таны цөллөгийн
ачаар Эв нэгдлийн газар нутаг
чимэглэгдсэн юм. Тиймээс тэвчээртэй
байгтун, хорвоо ертөнцийн Цөлөгдөгч
минь ээ.

Бид доромжлолыг алдрын өмсгөл
болгож, зовлон зүдгүүрийг Таны магнай
дээрх чимэг болгосон болой, хорвоо
ертөнцийн Бахархал минь.

Хүмүүсийн зүрх сэтгэл үзэн ядалтаар
дүүрсэн буйг Та харж байгаа билээ.
Үүнийг өршөөн хэлтрүүлэх нь Таны
тавилан бөлгөө, хорвоо ертөнцийн
нүглийг далдлагч Та минь ээ.

Илд гялалзах бүрийд урагш алх, сум
дайрах бүрийд урагш тэмүүл, хорвоо
ертөнцийн Золиослол минь ээ.

Та уйлах уу, эсвэл Би уйлах уу? Таныг хайрлан өмгөөлөгчдийн тоо цөөхөн буйг харан Би уйлсан нь дээр байх аа, хорвоо ертөнцийг уйлуулсан Та минь ээ.

Үнэнхүү Би Таны Дуудлагыг сонслоо, Хамгаас жавхлант Хайрт минь ээ. Баха-н нүүр царай өдгөө зовлон зүдгүүрийн илчинд шатаж, Таны гялалзах үг айлдварын галд дүрэлзэж байгаа агаад Тэрээр золиослолын хувь тавиландаа үнэнчээр эгцлэн босож, Таны хүсэл тааллын өөд ширтэж байна, хорвоо ертөнцөд лүндэн буулгагч Та минь ээ.

Аяа, Али Акбар минь, энэхүү Илгээлт бичгийг хайрласанд Эзэн тэнгэртээ таларх. Учир нь, түүнээс чи Миний номхон зөөлөн чанарыг үнэрлэж, бүхий л хорвоо ертөнцийн Бишрэл болсон Бурханы замналд Бидэнд тохиосон бүхнийг олж мэдэх болмой.

Шадар зарц нар бүгдээр үүнийг уншин, эргэцүүлэн бодох аваас хорвоо ертөнцийг дүрэлзүүлэх галын дөл тэдний судсаар бадамлах болмой.

-Бахаулла

ГЭРЛЭЛТ

“Китаб-и-Акдас”-т заасны дагуу сүйт хархүү, бүсгүй хоёр Оюун Санааны Чуулгаас зөвшөөрсөн хоёр гэрчийн өмнө гэрлэлтийн дараах тангаргийг ээлжлэн хэлнэ. Үүнд:

“Бид чухамхүү Бурханы зарлигийг дагана”

Бурхан минь, Таны алдар бадартугай! Үнэнхүү Таны энэ шадар зарц, энэ шадар шивэгчин хоёр Таны энэрлийн сүүдэр дор цугларч, Таны ивээл, өгөөмөр сэтгэлээр нэгдэн нийллээ. Эзэн тэнгэр минь! Өөрийнхөө энэ ертөнцөд болон Өөрийнхөө Хаант улсад тэднийг дэмжин тусалж, Өөрийнхөө буян хишгээр тэдэнд сайн сайхан бүхнийг хайрла. Эзэн тэнгэр минь! Таны төлөө зүтгэх үйлс нь тэднийг батжуулж, Танд үйлчлэхэд тэдэнд туслаач. Таны ертөнцөд тэднийг Таны Алдар нэрийн бэлэгдэл болгож, энэ дэлхий хийгээд ирээдүйн ертөнцөд шавхагдашгүй хишиг ивээлээрээ тэднийг хамгаалаач. Эзэн тэнгэр минь! Тэд нар Таны өршөөл энэрлийн хаант улсыг горилон, Таны хосгүйн орчлонг хүсч байна. Тэд нар чухамхүү Таны зарлигийг мөрдөн гэр бүл боллоо. Он цагийн эцэс

хүртэл эв эс, эв нэгдлийн бэлэгдэл болоход нь тэдэнд тусал.

Та бол үнэнхүү Үлэмжийн эрх мэдэлт, Хаа ч оршигч, Хамгийн хүчтэй нь билээ!

- Абдул-Баха

Тэрээр Бурхан билээ! Аяа, хосгүй Эзэн тэнгэр минь! Бүхнээс хүчит мэргэн ухаандаа Та энэхүү ээдрээт дэлхий ертөнцөд хүмүүсийн үр удам олон үе дамжин амьдарч, энэ дэлхий оршсоор байсан цагт тэд хэзээд Таны нэг нэгдмэл чанарын Босгоны өмнө мэндийн үг, итгэл бишрэл, ерөөл магтуутайгаар үйлчлэн зүтгэж, залбиран сүсэглээсэй гэсэндээ Та хүмүүст гэр бүл болохыг айлдсан билээ.

“Хүмүүс намайг шүтэн бишрээсэй гэсэндээ Би сүнс ба хүмүүнийг бүтээсэн бөлгөө.” Тиймээс Та Өөрийн энэрэл нигүүлслийн тэнгэрт Өөрийн хайрын үүрнээс гаралтай энэ хоёр шувууг гэрлүүлж, тэдэнд ашид мөнхийн буян хишиг хайрлана уу. Чингэвээс хайрын энэ хоёр далай нэгдсэнээр эелдэг сайхны давалгаа давалгаалан булгилж, өөрийн гүнээс амьдралын эрэг рүү цэвэр ариуны буяны сувдан эрдэнэсийг гаргамой.

“Тэрээр энэ хоёр далайг хооронд нь уулзуулахын тулд ундруулсан юм. Тэдний хооронд давж гаршгүй нэгэн саад тогтор буй. Тиймээс Эзэн тэнгэрийнхээ ямар хишгийг та нар үгүйсгэх юм бэ? Хишиг бүхнээсээ Тэрээр том жижиг сувдан эрдэнэсийг хайрладаг юм.”

Энэрэлт Эзэн тэнгэр минь! Энэ гэрлэлтийг шүр, сувд эрдэнэс гаргадаг болгож хайрлана уу. Та бол үнэхээр Хамгаас хүчтэй, Хамгаас агуу, Хэзээд өршөөнгүй билээ.

- Абдул-Баха

ЗАВСРЫН ӨДРҮҮД

Завсрын өдрүүд нь (2-р сарын 26-наас 3-р сарын 1-нийг дуустал) мацаг барилтанд бэлтгэх, зочин гийчин хүлээн авах, буян үйлдэх болон бэлэг сэлт өгөх өдрүүд байваас зохино.

Бурхан минь, миний Гал дөл, Гэрэл Гэгээ минь! Судар номондоо “Аяам-и-ха”* хэмээн Таны нэрлэсэн өдрүүд ирлээ, алдар нэрсийн Хаан минь. Өөрийн Хамгаас өргөмжит Бийрээр хамаг орчлонгоороо сахин мөрдөгтүн гэж Таны зарлиг болгосон мацаг барих үе ойртож байна. Эзэн тэнгэр минь, Өөрийн орд харшид хүн бүрт орон байр, Өөрийн мэлмийн гэрэл гэгээний гайхамшгийн үүдэнд хүн бүрт суудал хайрлахыг энэ өдрүүд болон энэ хугацаанд Таны зарлигийн олсноос чанга атгаж, Таны сургаалтай шүтэн барилдагчдын нэрийн өмнөөс Танаас хичээнгүйлэн гуйнам.

Эзэн минь ээ, тэд нар бол ямар ч буруу замд орж, Таны сударт бичсэн сургаалаас ухраагүй шавь нар тань юм. Тэд нар Үйл хэргийн тань өмнө сөгдөж, Таны Номыг

Танд л баймаар шийдэмгий сэтгэлээр хүлээн аваад Таны тэдэнд захисан бүхнийг дагаж биелүүлсэн, Таны нээсэн бодь мөрийг дагахаар шийдсэн хүмүүс билээ.

Эзэн минь, тэд Таны Сударт илэрхийлсэн бүхнийг зөвшөөрч хүлээн авсныг Та мэдэж байгаа билээ. Эзэн тэнгэр минь, адис хишигт мутраасаа Өөрийн мөнхийн уснаас тэдэнд уулгаач. Таны ахуйн далайд умбаж, Тантай уулзах аз буяны сонгомол дарснаас амссан хүнд заяадаг, шан хишгээ тэдэнд бас хүртээгээч.

Хаадын Хаан, дарлагдсан олныг Өрөвдөгч Та тэдэнд энэ дэлхийн болон ирээдүйн ертөнцийн сайн сайхныг хайрлаач. Бас хэн ч олж үзээгүй зүйлийг тэдэнд хайрлаж, Таныг тойрон хүрээлэгчид, Таны ертөнц бүхэнд Таны сэнтийн ойролцоо эргэлдэгчдийн тоонд тэднийг оруулж хайрла.

Та бол үнэнхүү Бүхнээс хүчтэн, Бүхнийг мэдэгч, Бүхнээс мэргэн билээ.

-Бахаулла

“... энэхүү биет мацаг нь оюун санааны мацгийн гадаад илэрхийлэл бөгөөд өөрийгөө удирдан жолоодож, “би” гэсэн үзлийн бүхий л дур хүслээс татгалзаад сүнсний шинж чанарыг олж, тэнгэрийн амьсгалыг хүртэн дүүлж, Бурханы хайраас гал дөл авахын бэлэг тэмдэг юм.”

- *Китаб-и-Акдас*

Эзэн тэнгэр минь, Таныгаа магтан өргөмжилье! Харанхуйг гэрэлтүүлж, олны хөлийн Дуганыг босгож, Бичмэл Судрын утгыг тайлан, Эх бичгийн хуйлаасыг дэлгэсэн энэ Үүдэл нээлтийн тань нэрийг барьж намайг болон миний ойр дотны хүмүүсийг Таны гэгээн алдрын диваажин рүү дүүлэхэд туслан, Таны эв нэгдлийн асар дор багтахад нь эргэлзэгчдэд саад болсон эргэлзээ тээнэгэлзлийн хир бургтаас ариутгахыг Танаас хүсэн залбирья.

Эзэн минь, би бол Таны элэгсэг хайрын холбоосоос бат атгаж, Таны өршөөл ивээлийн эмжээрээс зуурсан нэгэн билээ. Надад болоод миний хайртай хүмүүст энэ дэлхийн хийгээд ирээдүйн ертөнцийн сайн сайхныг соёрхон хайрла. Тэгээд амьтан

бүхнээс онцгойлсондоо хүртээдэг Далдын буян хишгээрээ тэднийг тэтгэ.

Эзэн минь, энэ бол Таны шадар зарц нартаа баримталж байхыг айлдсан мацагийн өдрүүд билээ. Танаас бусад бүхнийг бүрэн умартаж, зөвхөн Таныг бодож мацаг барьдаг тэрээр буянаар дэлгэрэг.

Эзэн минь ээ, Танд дуулгавартай байж, Таны сургаалыг дагахад минь надад болон тэдэнд тусалж хайрла. Та бол үнэнхүү сонгосон бүхнээ хийх хүч чадалтай билээ.

Бүхнийг мэдэгч, Бүхнээс ухаантан Танаас өөр Бурхан үгүй. Бүх ертөнцийн Эзэн Бурханаа магтан өргөмжилье.

- *Бахаулла*

Ая, Тэнгэрлэг Зөн билигтэн минь! Би идэж уух хэрэгцээнээсээ татгалзан өөрийн биеийн аливаа дур хүслээ тэвчсэнээр зөвхөн Таныг л хайрлан зүрх сэтгэлээ завсаргүй ариусгахыг хүсч байна. Би өөрийн зүрх сэтгэлийг аливаа муу, ад шулмын хүсэл тачаалаас хамгаалахыг хүсч байна.

Чингэснээр миний сэтгэл Таны ариун амьсгалаар амьсгалж, Танаас өөр юуг ч үл дурсахгүй болмой.

-Абдул-Баха

Мацаг барилт нь “Ала” (“сүр жавхлан”) сард буюу 3-р сарын 2-ноос 3-р сарын 20-ныг дуустал хугацаанд тохиодог. Энэ үед нар мандах, нар жаргахын хооронд ямар ч хоол унд хэрэглэхгүй, харин мөргөл залбирал уншиж, оюун санаагаар шинэчлэгдэн-сэргэх ёстой юм. Арван таван нас хүрээгүй хүүхдүүд, аялж яваа хүмүүс, хүнд өвчтэй, ядарч сульдсан хүмүүс, хөхүүл хүүхэдтэй болон хөл хүндтэй эмэгтэйчүүд мацаг барихаас чөлөөлөгдөнө.

НАВРУЗ

Навруз буюу 3 дугаар сарын 21-ний өдөр бол Бахайн жилийн эхний өдөр бөгөөд баяр цэнгэл, найр наадмын өдөр юм.

Бурхан минь, Танд зориулсан хайраа илэрхийлэн Таны жигшсэн бүхнээс татгалзаж мацаг барьсан тэдгээр хүмүүстээ Наврузын баярыг хайрласанд тань талархал өргөн, Таныгаа магтъя. Эзэн тэнгэр минь, Таны хайрын гал дөл болон Таны зарлигийг даган мацаг барьсны ачаар бий болсон илч дулаан тэднийг Таны Үйл хэрэгт үнэнч болгон гал мэт бадрааж, Таны магтууг дуулж, Таныг дурсан санадаг болгож хайрлана уу.

Өөрийн зарлигийн дагуу мацаг барих буяны хээ угалзаар Та тэднийг чимэглэсэн юм чинь Өөрийн гоо жавхлан, өгөөмөр хайр ивээлээрээ тэднийг таашаал соёрхлынхоо хээ угалзаар бас чимэглэнэ үү. Учир нь хүмүүсийн бүтээх ажил үйлс бүхэн чухамхүү Таны хүсэл тааллаас хамаардаг бөгөөд Таны зарлиг сургаалаас шалтгаалдаг бөлгөө. Хэрэв та мацаг бариагүй хүнийг мацаг барьсан хэмээн үзэх аваас тэр хүн мөнхийн мөнхөд мацаг барьж ирсэн хүмүүсийн тоонд ормой.

Мөн хэрэв Та мацаг барьсан хүнийг мацаг зөрчсөн гэж тооцох аваас тэр хүн Таны Үүдэл нээлтийн Хормойг хир тоосоор бузартуулж, энэхүү амьд Ундаргын тунгалаг рашаан уснаас холдсон хүмүүсийн тоонд ормой.

Та болбоос “Та үр бүтээлээрээ магтуулах гавъяатай билээ” гэсэн далбааг өргөж, “Таны зарлигийг бүгд дагадаг билээ” гэсэн тугийг намируулсан Тэрээр мөн билээ. Энэхүү байр сууриа Өөрийн шадар зарц нарт мэдүүлж хайрлана уу, Бурхан минь. Чингэвээс тэд хамаг бүхний төгс гойд чанар болбоос Таны зарлиг, Таны айлдвараас хамаардаг бөгөөд үйл бүхний буян болбоос чухамхүү Таны зөвшөөрөл, Таны хүсэл зоригоос шалтгаалдаг гэдгийг ойлгож, хүмүүсийн үйлс гавъяа чухамхүү Таны таашаал ба Таны зарлиг лүндэнгийн гарт оршдог гэдгийг ухаарах болмой. “Бүхий л эрхшээл ноёрхол болбоос Таных билээ, Сүнснийг Төрүүлэгч Та минь ээ” гэж Христ дуу алдаж, “Танаас өөр бусад бүхнийг огоорон Таныг Нээгч, Таны шинж чанарыг Тодруулагч Түүн рүү хандсан тэдгээр хүмүүсээс бусдад нь шаналал зовлон амсуулсан Таны Хамгаас

агуу алдар нэрийн үүдэл нээлтийн суудалд хүрэхэд нь тус болох сургаалыг сонгомол шавь нартаа айлдаж, Өөрийн Гоо үзэсгэлэнг тэдэнд нээж соёрхсон Таныгаа алдаршуулан магтъя” гэж Таны Анд (Мухаммад) айлдсан энэ өдрүүдэд чухам юу ч тэднийг Таны Гоо үзэсгэлэнгээс халхалж үл чадна гэдгийг тэдэнд ойлгуулж хайрлана уу.

Таны Мөчир Тэрээр, мөн Таны бүхий л дагалдагсад Таны таалалд нийцэхийн тулд Таны өргөөний өмнө мацаг барьсныхаа эцэст энэ өдөр мацгаа тайлж байна, Эзэн тэнгэр минь. Энэ өдрүүдэд Танд ойр байх орчинд нэвтэрсэн түүнд болон тэдэнд, мөн бусад бүх хүмүүст Өөрийн Судар номонд заяасан бүхий л сайн сайхан буянаа хүртээж хайрлаач. Энэ болон дараачийн амьдралд тэдэнд ашиг тус болох тэр зүйлийг тэдэнд хүртээж соёрхоно уу.

Та бол үнэнхүү Бүхнийг мэдэгч, Бүхнээс мэргэн билээ.

- Бахаулла

НАС НӨГЧИГСДӨД ЗОРИУЛСАН МӨРГӨЛ

“Энэ мөргөлийг арван таваас дээш насны Бахайчууд үйлдэнэ. “Энэ бол Бахайчууд заавал үйлдэх хамтын ганц мөргөл юм. Энэ мөргөлийг бусад нь зогсоож байхад нэг сүсэгтэн уншина. Энэ мөргөлийг унших үедээ Киблих рүү нүүрээ харуулах шаардлагагүй.”

- “Китаб-и-Акдас”

Эзэн тэнгэр минь! Энэ бол Танд болон Таны зөн билэгт итгэдэг, Таны зүг хандан, Танаас өөр бүхнийг бүрэн умартсан Таны шадар зарц, Таны шадар зарцын хүү байна. Та хайр ивээл үзүүлэгчдээс хамгийн ивээлтэй нь билээ.

Өөрийн билиг хишгийн диваажин, хайр ивээлийн далайд нийцүүлэн хүмүүсийн нүглийг өршөөж, алдаа дутагдлыг нь дарагдуулдаг Та түүнийг анхаарч хайрла. Газар дэлхий, диваажин үүсэхээс ч өмнө байсан далдын хайр ивээлийнхээ хүрээнд түүнийг хүлээн авч соёрх. Хэзээд өршөөгч, Хамгаас нигүүлсэнгүй Танаас өөр Бурхан үгүй.

Тэгээд дараах зургаан шадыг тус бүр арван есөн удаа уншихын өмнө “Алла-у-абха” хэмээх мэндчилгээний үгийг хэлнэ.

Бид бүгдээр үнэнхүү Бурханыг шүтэн биширнэ.

Бид бүгдээр үнэнхүү Бурханы өмнө сөгдөнө.

Бид бүгдээр үнэнхүү Бурханд үнэнчээр сүсэглэнэ.

Бид бүгдээр үнэнхүү Бурханыг магтан биширнэ.

Бид бүгдээр үнэнхүү Бурханд талархал өргөнө.

Бид бүгдээр үнэнхүү Бурханд тэвчээртэй сүсэглэнэ.

(Хэрэв талийгаач эмэгтэй хүн бол, “Энэ бол... Таны шадар шивэгчин, Таны шадар шивэгчний охин байна” гэж хэлнэ.)

ӨВЧНӨӨС АНАГААХ УРТ МӨРГӨЛ

Тэрээр Анагаагч, Хангагч, Туслагч,
Бүхнийг өршөөгч, Бүхнээс энэрэлт
билээ.

Өргөмжит Таныг, Үнэнч Таныг, Цог
жавхлант Таныг би дуудаж байна! Та бол
Хангагч, Та бол Анагаагч, Та бол Үүрд
мөнх билээ, Үүрд мөнх Та минь ээ!

Хэмжээлшгүй эрхт Таныг, Дэвжээн
өргөмжлөгч Таныг, Шүүн тунгаагч
Таныг би дуудаж байна! Та бол Хангагч,
Та бол Анагаагч, Та бол Үүрд мөнх билээ,
Үүрд мөнх Та минь ээ!

Хосгүй Таныг, Мөнхийн Таныг,
Цорын ганц Таныг би дуудаж байна! Та
бол Хангагч, Та бол Анагаагч, Та бол Үүрд
мөнх билээ, Үүрд мөнх Та минь ээ!

Хамгаас магтаалт Таныг, Ариун
нандин Таныг, Туслан дэмжигч Таныг би
дуудаж байна! Та бол Хангагч, Та бол
Анагаагч, Та бол Үүрд мөнх билээ, Үүрд
мөнх Та минь ээ!

Хамгийг захирагч Таныг, Хамгаас
мэргэн Таныг, Хамгаас агуу Таныг би
дуудаж байна! Та бол Хангагч, Та бол
Анагаагч, Та бол Үүрд мөнх билээ, Үүрд
мөнх Та минь ээ!

Цэцэн мэргэн Таныг, Сүр жавхлант
Таныг, Зарлиг буулгагч Таныг би дуудаж
байна! Та бол Хангагч, Та бол Анагаагч, Та
бол Үүрд мөнх билээ, Үүрд мөнх Та минь
ээ!

Хайр Таныг, Бишрэл мөрөөдөл Таныг,
Сэтгэлийг татагч Таныг би дуудаж байна!
Та бол Хангагч, Та бол Анагаагч, Та бол
Үүрд мөнх билээ, Үүрд мөнх Та минь ээ!

Хамгаас хүчирхэг Таныг, Тэтгэн
дэмжигч Таныг, Хамгаас чадалтай Таныг
би дуудаж байна! Та бол Хангагч, Та бол
Анагаагч, Та бол Үүрд мөнх билээ, Үүрд
мөнх Та минь ээ!

Удирдан жолоодогч Таныг, Дангаар
оршигч Таныг, Бүхнийг мэдэгч Таныг би
дуудаж байна! Та бол Хангагч, Та бол
Анагаагч, Та бол Үүрд мөнх билээ, Үүрд
мөнх Та минь ээ!

Сүнс сүлд Таныг, Гэрэл гэгээ Таныг,
Хамгаас илэрхий Таныг би дуудаж байна!
Та бол Хангагч, Та бол Анагаагч, Та бол
Үүрд мөнх билээ, Үүрд мөнх Та минь ээ!

Хамаг бүхний Зорилго Таныг, хамаг
бүхэнд танигдсан Таныг, хамаг бүхнээс
Нуугдмал Таныг би дуудаж байна! Та бол
Хангагч, Та бол Анагаагч, Та бол Үүрд
мөнх билээ, Үүрд мөнх Та минь ээ!

Далд нууц Таныг, Ялан дийлэгч Таныг,
Хишиг хайрлагч Таныг дуудаж байна! Та бол
Хангагч, Та бол Анагаагч, Та бол Үүрд мөнх
билээ, Үүрд мөнх Та минь ээ!

Хүчирхэг Таныг, Тэтгэгч Таныг, Нуун
далдлагч Таныг би дуудаж байна! Та бол
Хангагч, Та бол Анагаагч, Та бол Үүрд
мөнх билээ, Үүрд мөнх Та минь ээ!

Цогцлон бүтээгч Таныг, Сэтгэлийг
хангагч Таныг, Үндэслэгч Таныг би
дуудаж байна! Та бол Хангагч, Та бол
Анагаагч, Та бол Үүрд мөнх билээ, Үүрд
мөнх Та минь ээ!

Мандан бадрагч Таныг, Цуглуулан
бүрдүүлэгч Таныг, Өргөмжлөгч Таныг би
дуудаж байна! Та бол Хангагч, Та бол
Анагаагч, Та бол Үүрд мөнх билээ, Үүрд
мөнх Та минь ээ!

Төгөлдөржүүлэгч Таныг, Хязгааргүй
эрх чөлөөт Таныг, Буян хишигт Таныг би
дуудаж байна! Та бол Хангагч, Та бол
Анагаагч, Та бол Үүрд мөнх билээ, Үүрд
мөнх Та минь ээ!

Буян ивээлт Таныг, Татгалзагч Таныг,
Бүтээгч Таныг би дуудаж байна! Та бол
Хангагч, Та бол Анагаагч, Та бол Үүрд
мөнх билээ, Үүрд мөнх Та минь ээ!

Хамгаас эрхэм дээд Таныг, Гоо үзэсгэлэнт
Таныг, Буян хайрлагч Таныг би дуудаж байна!
Та бол Хангагч, Та бол Анагаагч, Та бол Үүрд
мөнх билээ, Үүрд мөнх Та минь ээ!

Шударга Таныг, Гоо жавхлант Таныг,
Өгөөмөр Таныг би дуудаж байна! Та бол
Хангагч, Та бол Анагаагч, Та бол Үүрд мөнх
билээ, Үүрд мөнх Та минь ээ!

Бүхнийг эзэгнэгч Таныг, Үүрд мөнх
оршигч Таныг, Бүхнийг мэдэгч Таныг би
дуудаж байна! Та бол Хангагч, Та бол
Анагаагч, Та бол Үүрд мөнх билээ, Үүрд
мөнх Та минь ээ!

Гайхамшигт Таныг, Өнө эртний Таныг,
Сүр жавхлант Таныг би дуудаж байна! Та
бол Хангагч, Та бол Анагаагч, Та бол Үүрд
мөнх билээ, Үүрд мөнх Та минь ээ!

Сахин хамгаалагдсан Таныг, Баяр
жаргалын Эзэн таныг, Хүсэл мөрөөдөл
Таныг би дуудаж байна! Та бол Хангагч, Та
бол Анагаагч, Та бол Үүрд мөнх билээ,
Үүрд мөнх Та минь ээ!

Хамаг бүхнийг энэрэгч Таныг, хамаг
бүхнийг нигүүлсэгч Таныг, Хамгаас Буян
ивээлт Таныг би дуудаж байна! Та бол
Хангагч, Та бол Анагаагч, Та бол Үүрд
мөнх билээ, Үүрд мөнх Та минь ээ!

Хамаг бүхний хорогдох цайз Таныг, хамаг бүхний нөмөр нөөлөг Таныг, хамаг бүхнийг хамгаалагч Таныг би дуудаж байна! Та бол Хангагч, Та бол Анагаагч, Та бол Үүрд мөнх билээ, Үүрд мөнх Та минь ээ!

Хамаг бүхнийг тэтгэгч Таныг, хамаг бүхний тэмүүлэл Таныг, амьдрал хайрлагч Таныг би дуудаж байна! Та бол Хангагч, Та бол Анагаагч, Та бол Үүрд мөнх билээ, Үүрд мөнх Та минь ээ!

Дэлгэрүүлэн хөгжүүлэгч Таныг, Сүйтгэн хөнөөгч Таныг, Цэцэн мэргэн Таныг би дуудаж байна! Та бол Хангагч, Та бол Анагаагч, Та бол Үүрд мөнх билээ, Үүрд мөнх Та минь ээ!

Миний сэтгэлийг эзэмдсэн Таныг, миний Хайрт Таныг, миний Итгэл сүсэг Таныг би дуудаж байна! Та бол Хангагч, Та бол Анагаагч, Та бол Үүрд мөнх билээ, Үүрд мөнх Та минь ээ!

Цангааг гаргагч Таныг, тэнгэрийн үзэсгэлэнт Таныг, хамгаас Нандин Таныг би дуудаж байна! Та бол Хангагч, Та бол Анагаагч, Та бол Үүрд мөнх билээ, Үүрд мөнх Та минь ээ!

Хамгаас агуу дурсамж Таныг, Хамгаас эрхэм нандин Алдар нэр Таныг, хамгаас эртний Зам мөр Таныг би дуудаж байна!

Та бол Хангагч, Та бол Анагаагч, Та бол Үүрд мөнх билээ, Үүрд мөнх Та минь ээ!

Хамгаас магтаалт Таныг, хамгаас Ариун Таныг, хамгаас Гэгээн Таныг би дуудаж байна! Та бол Хангагч, Та бол Анагаагч, Та бол Үүрд мөнх билээ, Үүрд мөнх Та минь ээ!

Нээгч Таныг, Зөвлөгч Таныг, Аврагч Таныг би дуудаж байна! Та бол Хангагч, Та бол Анагаагч, Та бол Үүрд мөнх билээ, Үүрд мөнх Та минь ээ!

Анд нөхөр Таныг, Оточ эмч Таныг, Олзлогч Таныг би дуудаж байна! Та бол Хангагч, Та бол Анагаагч, Та бол Үүрд мөнх билээ, Үүрд мөнх Та минь ээ!

Алдар гавъяа Таныг, Гоо үзэсгэлэн Таныг, Буян хишигт Таныг би дуудаж байна! Та бол Хангагч, Та бол Анагаагч, Та бол Үүрд мөнх билээ, Үүрд мөнх Та минь ээ!

Хамгийн итгэлт Таныг, хамгаас Хайрт Таныг, Үүрийн гэгээн Эзэн Таныг би дуудаж байна! Та бол Хангагч, Та бол Анагаагч, Та бол Үүрд мөнх билээ, Үүрд мөнх Та минь ээ!

Бадамлуулагч Таныг, Гэгээрүүлэгч Таныг, Баяр цэнгэлийг авчрагч Таныг би дуудаж байна! Та бол Хангагч, Та бол

Анагаагч, Та бол Үүрд мөнх билээ, Үүрд мөнх
Та минь ээ!

Буян хишгийн Эзэн тэнгэр Таныг,
Бүхнийг нигүүлсэгч Таныг, Бүхнийг
энэрэгч Таныг би дуудаж байна! Та бол
Хангагч, Та бол Анагаагч, Та бол Үүрд мөнх
билээ, Үүрд мөнх Та минь ээ!

Тогтвортой тууштай Таныг, Амьдрал
хайрлагч Таныг, ахуй биеийн Эх үүсвэр
Таныг би дуудаж байна! Та бол Хангагч, Та
бол Анагаагч, Та бол Үүрд мөнх билээ,
Үүрд мөнх Та минь ээ!

Хамаг бүхэнд нэвтрэн шингэх увдистай
Таныг, бүхнийг Харагч Бурхан Таныг,
Айлдварын Эзэн Таныг би дуудаж байна!
Та бол Хангагч, Та бол Анагаагч, Та бол
Үүрд мөнх билээ, Үүрд мөнх Та минь ээ!

Илэрхий мөртлөө Нуугдмал Таныг, Үл
үзэгдэгч мөртлөө Алдартай Таныг, хамаг
бүхний хүсэн тэмүүлсэн Зорилго Таныг би
дуудаж байна! Та бол Хангагч, Та бол
Анагаагч, Та бол Үүрд мөнх билээ, Үүрд
мөнх Та минь ээ!

Хайрлагчдыг хөнөөн хядагч Таныг би
дуудаж байна, хорон санаатанд Хишиг
буяны Бурхан минь ээ!

Хангагч минь, би Таныг дуудаж байна,
Хангагч минь!

Анагаагч минь, би Таныг дуудаж байна,
Анагаагч минь!

Үүрд мөнх оршигч минь, би Таныг
дуудаж байна, Үүрд мөнх оршигч минь!

Та бол хэзээд үүрд мөнх оршигч
билээ, Үүрд мөнх оршигч минь!

Бурхан минь, Та ариун гэгээн билээ!
Буян хишиг ба адис ивээлийн тань үүд
хаалгыг өргөн нээн энх мөнхийн сэнтий
дээр Ариун гэгээн Сүмийг тань
байгуулсан Таны өгөөмөр сэтгэл, Таны
ивээл хйшгийн ширээнд хамаг амьтныг
урин залсан Таны энэрэл хайр, Таны эрх
хэмжээ ба сүр жавхлан нээгдсэн цаг
мөчид ба Таны хүчит ноёрхол тодорсон
үүрийн гэгээнээр тэнгэр диваажин
хийгээд газар дэлхий дээр орших бүхний
өмнөөс “Тийм ээ!” хэмээсэн Өөрийн
үгээр Өөрөө Өөртөө хариулсан Таны
энэрэнгүй сэтгэлийг царайчлан би
хичээнгүйлэн гуйж байна. Эдгээр нэн
уянгалаг алдар нэрс, эдгээр нэн эрхэм
төгс шинж чанар болон Таны нэн
өргөмжит Дурсамж, Таны хир буртаггүй
цэвэр ариун Гоо үзэсгэлэн, хамгаас
нуугдмал асарт гэрэлтэх Таны нуугдмал
Гэрэл гэгээ, өглөө үдэш бүр зовлон
зүдгүүрийн өмсгөлийг өмссөн таны

Алдар нэрийг барин би дахин Танаас хичээнгүйлэн гуйх минь: энэхүү адист Илгээлт бичгийг тээж, түүнийг уншиж, түүнд ойртон дөхөж, түүний орших орон гэрийг тойрон хүрээлсэн хэнийг ч боловч хамгаалж хайрлана уу. Түүгээр дамжуулан өвчин эмгэгтэй, ядуу дорой хүн бүрийг зовлон гуниг, үгээгүй их гай гамшиг, уй гашуунаас нь анагаан илааршуулж, түгээр дамжуулан Таны удирдамжийн замд орж, Таны өршөөл ивээлийн зам мөрийг дагахыг хүссэн хэнийг ч болов удирдан чиглүүлнэ үү.

Та бол үнэнхүү Хүчтэй, Бүхнийг хангагч, Анагаагч, Хамгаалагч, Өглөгч, Нигүүлсэнгүй, Хамгаас өгөөмөр, Хамгаас энэрэлт билээ.

-Бахаулла

Хамгийн их таашаагдах мөргөл бол туйлын сүсэг бишрэлт, гэрэлт тунгалаг байдлаар уншсан мөргөл агаад мөргөлийг уртасгах нь Бурханд таашагдаж байгаагүй бөгөөд таашаагддаг ч үгүй юм.

Мөргөл нь хэдийчинээ ертөнцөөс огоорсон, хэдийчинээ ариун байна, төдийчинээ Бурханы таалалд нийцмү.

- Баб

РИЗВАНЫ ИЛГЭЭЛТ

(Хэсэгчлэн авав)

4-р сарын 21-нээс 5-р сарын 2-ны хооронд тохиодог Ризваны баяр наадмаар Бахауллагийн дагалдагчдадаа хандан Өөрийгөө зарлан тунхагласан үйл явдлыг дурсан тэмдэглэдэг юм. Энэ баярыг Бахаулла "Баяр наадмын Хаан" гэж өргөмжилсөн бөгөөд "хамаг амьтан ариуслын далайд умбасан" Өдөр гэж "Китаб-и-Акдас"-таа дурдсан байдаг.

Аяа, Нэн Өргөмжит Бийр минь ээ, Хамгаас Энэрэнгүйн Баяр наадам ойртож, Тэнгэрлэг Хавар цаг ирлээ. Бүхий л юмс дахин төрж, цоо шинэ болохын төлөө хорвоо дэлхийн өмнө Бурханы нэрийг магтан мандуулж, Түүний магтууг дуулж, өөрийгөө дайчил. Амар тайван бүү суу, хэлж ярь. Тэнгэр диваажинг Бүтээгч чиний Эзэн тэнгэрийн алдар нэр болбоос Бурханы алдар нэрсийн вант улсын оройн дээд чимэг болсны учир туйлын жаргалын үүрийн туяа Баяр Жавхлант Бидний алдар нэрийн тэнгэрийн хаяанаас дээгүүр гэрэлтэн гийж байна. Газар дэлхийн улс үндэстнүүдээс урьтаж

энэхүү Нэн Агуу Алдар нэрийн хүчээр өөрийгөө зэвсэглэ, бүү алгуурла....

Энэ бол “Аяа, газар дэлхий минь, чи юутай агуу их адистат билээ. Учир нь, чи Бурханы хөл гишгэх суудал болж, Тэрээр чамайг Өөрийн хүчирхэг хаан ширээгээ болгожээ” гэж үл үзэгдэх ертөнц дуу алдсан Өдөр болой. Алдрын ертөнц хэлсэн нь: “Хамгаас Энэрэлт Хайрт тэрээр өнгөрсөн ба ирээдүйн үед хамаг амьтанд амлагдсан Өөрийн Алдар нэрийн хүчээр чам дээр Өөрийн эрхшээл ноёрхлыг тогтоосон учраас чиний төлөө миний амь нас золиос болог.” ...

Хамгаас Хайрт ирлээ. Баруун гартаа Тэрээр Өөрийн алдар нэрийн нуугдмал Дарсыг барьсан байна. Түүнд хандаж, өөрийн хувийг хүртэж, “Бурханы шинж тэмдгийг Нээгч Таныг магтан дуулъя!” гэж дуу алдсан хүмүүн аз жаргалтай болой. Бүхнээс хүчирхэг Бурханы буянаар өчсү! Нуугдмал байсан бүхэн үнэний хүчээр илэрч тодорлоо. Бурханы бүхий л буян хишиг Түүний адис ивээлийн бэлэг тэмдэг болон илгээгдсэн юм. Ашид мөнхийн амьдралын рашаан ус бүхлээрээ хүмүүст хүртээлтэй боллоо.

Түүгээр дүүргэсэн тагш бүрээр Хамгаас Хайртын мутараар тойруулан хамаг бүхнийг дайлж байна. Нэгхэн богино хором ч гэсэн түүнд ойртож, бүү алгуурла....

Аяа, Баха-н хүмүүс ээ, дээдийн баяр жаргалын Өдөр, Өнө Эртний Бурханы Хэл Өөрийн Гэрээс гарч, бүх л хорвоо дэлхийд Хамгаас Энэрэлт Өөрийн алдар нэрийн сүр жавхланг цацруулсан тэр ариун Газар луу явахдаа үг хэлсэн энэ Өдрийг, дурсан мандуулахдаа туйлын ихээр хөгжин баясагтун. Бурхан Бидний гэрч болно. Бид тэрхүү Өдрийн нуугдмал нууцсыг нээх аваас гагцхүү Хүчирхэг, Бүхнийг мэдэгч, Бүхнээс мэргэн ухаантан Бурханы хамгаалан тэтгэснээс бусад газар дэлхийн болон тэнгэр диваажинд оршигч бүхэн ухаан алдан үхэх болмой....

-Бахаулла

АРВАН ЕС ХОНОГИЙН БАЯРЫН ХУАНЛИ

Сар

19 Хоногийн Баяр
болох өдөр

- | | |
|----------------------------|---------------|
| 1. "Баха" (Цог жавхлан) | 03-р сарын 21 |
| 2. "Жалал" (Алдар) | 04-р сарын 09 |
| 3. "Жамал" (Гоо үзэсгэлэн) | 04-р сарын 28 |
| 4. "Азамат" (Сүр жавхлан) | 05-р сарын 17 |
| 5. "Нур" (Гэрэл) | 06-р сарын 05 |
| 6. "Рахмат" (Энэрэл) | 06-р сарын 24 |
| 7. "Калимат" (Үгс) | 07-р сарын 13 |
| 8. "Камал" (Төгс төгөлдөр) | 08-р сарын 01 |
| 9. "Асма" (Нэр алдар) | 08-р сарын 20 |
| 10. "Иззат" (Хүч чадал) | 09-р сарын 08 |
| 11. "Машият" (Хүсэл зориг) | 09-р сарын 27 |
| 12. "Илм" (Эрдэм мэдлэг) | 10-р сарын 16 |
| 13. "Кудрат" (Сүр хүч) | 11-р сарын 04 |
| 14. "Кол" (Айлдвар) | 11-р сарын 23 |
| 15. "Масайл" (Асуулт) | 12-р сарын 12 |
| 16. "Шараф" (Алдар гавъяа) | 12-р сарын 31 |
| 17. "Султан" (Ноёрхол) | 01-р сарын 19 |
| 18. "Мулк" (Эрхшээл) | 02-р сарын 07 |
| 19. "Ала" (Сүрлэг) | 03-р сарын 02 |

"Аям-и-Ха" (Завсрын өдрүүд) нь 2-р сарын
26-наас 3-р сарын 1-нийг дуустал үргэлжилдэг.

АСУУДАЛ ШИЙДЭХИЙН ТӨЛӨӨ МӨРГӨЛ УНШИХ НЬ

1-р алхам:

Тухайн асуудлын тухай мөргөж, бясалган бод. Бурханы Тодруулагчдын туурвисан мөргөлүүд нь онцгой хүч увдистай байдаг тул тэдгээрийг ашигла. Дараа нь хэдэн хором анир чимээгүй дотроо бясалган бод.

2-р алхам:

Ямар нэгэн шийдвэрт хүрээд түүнээсээ бат зуур. Энэхүү шийдвэр нь ихэвчлэн бясалган бодох хугацаанд төрж гарч ирдэг. Анхандаа түүнийг хэрэгжүүлэх нь боломжгүй мэт санагдавч хэрвээ тухайн мөргөлд өгөх хариу, эсвэл тухайн асуудлыг шийдэх нэгэн арга зам мэт санагдвал, тэр даруй дараачийнхаа алхамд ор.

3-р алхам:

Шийдвэрээ хэрэгжүүлэх шийдвэр төгс бай. Энд олон хүн алддаг. Гаргасан шийдвэр болон шийдэмгий байдал нь саарч, энэ нь улмаар хоосон мөрөөдөл болон хувирдаг. Тиймээс шийдвэр төгс болонгуутаа дараачийнхаа алхамд орвоос зохино.

4-р алхам:

Хүч чадал чиний биед шингэж, зөв зам чиний өмнө харагдаж, үүд хаалга нээгдэж, үнэн зөв бодол, үнэн зөв илгээлт, үнэн зөв зарчим, эсвэл үнэн зөв номыг чи олох болно гэдэгтээ итгэл төгс бай. Итгэл дүүрэн баймаажин чамд хэрэгцээтэй зөв шийдэл ирнэ. Дараа нь мөргөлөө дуусган босохдоо дараачийнхаа 5-р алхамд ор.

5-р алхам:

Юм бүхэндээ шийдэл олсон хэмээн итгэн бодож, цуцалтгүй, зогсолтгүй эрч хүчээр ажилла. Ингэж ажиллах явцад та өөрөө соронзон болж, бүр ч их хүч тэнхээг өөртөө татаж, эцэст нь Тэнгэрлэг хүч чадал ямар ч саадгүй чиний биеэр дамжин зорьсноо биелүүлэх болно.

Олон хүн мөргөл үйлддэг боловч эхнийхээ алхмын сүүлчийн хэсэгт түр азналгүй мөргөлөө дуусгадаг. Бясалгал хийсэн зарим нь харин шийдвэрт хүрчихээд түүнээсээ бат зуурч чаддаггүй. Цөөн хэдэн хүн шийдвэрээ хэрэгжүүлэх шийдвэр төгс байдаг агаад бүр ч цөөн хэдхэн хүн үнэн зөв шийдэл нээгдэнэ гэдэгт итгэл төгс байж чаддаг байна. Гэхдээ хичнээн хүн юм бүхэндээ хариу олсон мэтээр ажилладаг билээ? “Мөргөлөөс агуу нэгэн зүйл бол мөргөлийг уншсан тэр сэтгэл санаа юм”

гэсэн үг нь юутай үнэн бөлгөө. Мөргөлийг уншсан тэр сэтгэл санаанаас ч агуу зүйл бол мөргөлөө бодитоор биелүүлэх сэтгэл санаа юм.

- Шоги Эффенди

Дээрх таван шатыг хайрт Асран тэтгэгч Шоги Эффенди нэгэн сүсэгтэнд зориулж, мөргөлийг ашиглан асуудлыг шийдэж болдог тухай санал болгосон юм. Уг санал нь “Мөргөлчдийн тэмдэглэл” хэмээх цувралд ордог бөгөөд албан ёсоор баталгаажуулсан сургаал биш хэдий ч түүний ач тус их санагдсан тул сүсэгтэн олонд зориулан нийтэлье гэж шийдсэн юм.

БАХАЙН АРИУН ӨДРҮҮД БА ТЭМДЭГЛЭЛТ ӨДРҮҮД

- * Ризваны анхны өдөр
(Бахауллагийн Тунхаглал):
4-р сарын 21 (1863)
- * Ризваны ес дэх өдөр:
4-р сарын 29
- * Ризваны арван хоёр дахь өдөр:
5-р сарын 2
- * Бабын Тунхаглал:
5-р сарын 23 (1844)
- * Бахауллагийн тэнгэрт хальсан өдөр:
5-р сарын 29 (1892)
- * Бабын баатарлагаар амь үрэгдсэн өдөр:
7-р сарын 9 (1850)
- * Бабын мэндэлсэн өдөр:
10-р сарын 20 (1819)
- * Бахауллагийн мэндэлсэн өдөр:
11-р сарын 12 (1817)
- * Абдул-Бахагийн мэндэлсэн өдөр:
5-р сарын 23 (1844)
- * Гэрээсийн өдөр:
11-р сарын 26
- * Абдул-Бахагийн тэнгэрт хальсан өдөр:
11-р сарын 28 (1921)
- * Мацаг барилтын өдрүүд:
3-р сарын 2-ноос эхлэн 19 хоног
үргэлжлэнэ
- * Наврузын баяр (Бахайн шинэ жил):
3-р сарын 21

Хэрэв боломжтой бол анд нөхөд тодорхой тэмдэглэлт өдрүүдийг дараах цагуудад тэмдэглэх нь зүйтэй гэж Асран тэтгэгч зөвлөсөн юм. Үүнд:

- Бабын Тунхаглалын ойг 5-р сарын 22-нд нар жаргаснаас хойш хоёр цаг орчмын дараа,
- Ризваны анхны өдрийг 4-р сарын 21-нд 15 цагийн орчим,
- Бабын баатарлагаар амь үрэгдсэн өдрийг 7-р сарын 9-нд үд дундад,
- Бахауллагийн тэнгэрт хальсан өдрийг 5-р сарын 29-нд шөнийн 3 цагт,
- Абдул-Бахагийн тэнгэрт хальсан өдрийг 11-р сарын 28-нд 13 цагт тус тус дурсан тэмдэглэвээс зохино.

Хэвлэлийн хуудас: 5.6
Хэвлэсэн он: 2004 он

“СОЁМБО ПРИНТИНГ” ХХК-д хэвлэв.